

Mea oweru Iesu sapuwo to Ruka ro gisioidiro

Mea Oweru Ruka ro Gisioidiro, Bamu Oweru
ato

Nedi urubia ro buka woko neio ro
gosioidiro-rimo:

- oweru kiwesegere orobo ra uramu ra
- kiwarebai orobo ra uramu ra
- sabowa ato oweru kowaibia urubia
- Bamu oweru rido keakea urubia oweru to
kiwesegere orobo ra uramu ra
- saro rido iana kowaibia orobo, urubia mutu

Ruka ro gisioidiro nedi oweru ro Tiopira aboto

¹⁻² Karatamuai moro rido nimo abato edi
tanaro ro na-gororosiodiro-rimo, ina simara
idomari to edi urubia ro giauri-rimo nedi oweru
ro nimo neio ro nimowauti-rimo. Taie urubia
sirio ro peba to nato gisioidiro-rimo.

³ Mo ro tanaro patu mea se niosoratiti amia
urubia aboudo na-nimade-ro edi tau ro nato
Iesu woko na-gitamuai womu tato abora. Mo ro
na-nimaragoidiro modobo ie buka to kisioidiro
beda tanaro gororosiodiro-rimo. Auna dubu
Tiopira oro aboto mo ro nou ri nisioidiro nedi
oweru ro,

⁴ oro umoro kowai sapuwo to ibo arua urubia
ro oro na-gemowauti-rimo io morobise oweru ie.

Sekaraia sowake urio ro mea oweru gemowapotai

⁵ Iedi tau ro nato Herodi eputa dubu to
na-imidirotiti Iudia duriomoro ato, ata dubu

masiro Sekaraia nou Godi ra urubia ra turituri dubu e nou Godi woko emesioidirotiti Ierusarema sabowa ato. Abaia Eroni aramu e ina Sekaraia gu nou aboudo orobu-die. Sekaraia orobo masiro Erisabeti, ina neitiro atu nasa ie Eroni.

⁶ Sekaraia ra Erisabeti ra neitiro tuputupu orobo ra uramu ra ie, Abera Naramu edi owera ro na-iamo neitiro ro aise isioidirotiti-do. Neitiro ata ubauba tato ie Godi sabi patu mea mino to ibodorotiti-do,

⁷ kaupoti nedi orobo ra uramu ra ro merebusere tato ie, teri orobo ra uramu ra ro imidirotiti-do. Erisabeti abere ie mere koroto aboto modobo pua. Neitiro teibo imese abere ra nogere ra ta-go-i-rido.

⁸ Sekaraia ro Godi ra urubia ra turituri edi woko ro nou isioidirotiti. Iedi tau ro nato Abaia gu urubia Sekaraia mutu neio tau ro gowamo Tarena Moto ato woko kosioidiro aboto.

⁹⁻¹⁰ Neio ro simara tanaro to na-gosioidiro-rimo keba se Sekaraia masiro ro gorowapotai-ro, nou masiro edi korowapotai ro na-gorowapotai-ro nou imese godoro Tarena Moto goro to meamea nibo nakomu iwatuti ri Godi sapuwo to.

Urubia sirio isana Godi gararatoro-rimo Tarena Moto araradi ato.

¹¹ Taie edi tau ro nato Godi edi sowake urio ro Sekaraia aise gemotobowa tumodi sapuwo ato patapata abato meamea nibo nakomu bato giriware-rimo.

¹² Sekaraia ro na-gowea iedi sowake urio ro nou aborabora ro gorobai.

¹³ Suwake urio ro iato gutura, 'Sekaraia oro tere na ie. Oro edi karatoro owerā ro Godi ro ta-emewidiro-titi-ro. Oro orobo Erisabeti abere nou mere saiki ata ama-oroto-ri, nitiro ro Ioane to ba-diduti-do,

¹⁴ oro auna kamade ama-oi-ri iedi tanaro ro nama-ororosioidiro-ri, edi bamuai kainai ro Erisabeti ro nama-oroto-ri. Ibose urubia sirio ro neio kamade amadimo-oi-ri,

¹⁵ mabu iedi dubu ro nou ata auna dubu to ama-ararasoro-ri Godi sosoro gabo ato.

Ioane nou auna nama-oi-ri nou koko obo idio-ri pua, iedi tau ro nato nou nama-oroto-ri Erisabeti ro, nou Tarena Urio ro ama-oworohutiti-ri.

¹⁶ Nou ro sirio urubia ama-iwarebai-ri nedi Isiraere duriomoro nato korowame Godi edi mea gabo ro neito.

¹⁷ Abera Naramu keba se gabo nou ia ro amadi-emaipo-ri. Nedi dubu ro Ioane nou pupuwo tanaro ama-isioidiro-ri Eraia beda sosoro tanaro isioidiro-titi. Mamio abeamio daro merebusere neio turituri ato nou ro miro ama-iaremo-ri. Nou ro ibose amadi-iwame-ri etio ro garagarewado-rimo morobise gabo rido, ibose neio meamea kimaragoidiro nou ro ama-imio-ri. Nedi dubu ro nou ro urubia idaibo tanaro to ama-imododiai-ri, Abera Naramu edi tau ato namadi-ou-ri nou sapuwo to ie.'

¹⁸ Ina Sekaraia ro ibo, 'Mo umoro beda sosoro to nama-oi-ri nedi tanaro kororosioidiro aboto? Mo modobo pua, oromano ta-noi, mo orobo abere ia ie. Modobo pua nou mere koroto aboto.'

¹⁹ 'Mo masiro Gabiriere ie. Mo Godi sosoro gabo ato nitoititi. Mo nou sowake koroho urio ie.

Mo Godi ro notiodorai-die oro mea owerā
emowapotai ri.

²⁰ Abora owerā neito ma-dirowidiro-ro. Oro
imibiria pua ra mo ro edi owerā ro
na-nemowou-die? Nedi tanaro ro morobise to
amadimo-ororosioi diro-ri. Oro nedi tau ro neido
owerā tato ama-imidiro-ri, womu tato tanaro
namadimo-ororosioi diro-ri oro owerā nato
ama-utura-ri.'

²¹ Urubia dubu patu ibose ti-gorowotoi nou
gemasebidiro-rimo. Neio iato kimaragoidiro
siriosirio mutu gorowotoi, Sekaraia dese odoro
pua Tarena Moto goro to. Urubia dubu patu
ibose to gemowarabu goto ato, ibo gemowarabu,
ibo gemowarabu, Sekaraia imese tuturu tau to
ta-gomidirowado Tarena Moto goro ato.

²² Taie saro to nato gosuruo-ro. Nou
na-gosuruwo-ro nou matagoro rudo owerā kodu
ata emororowai pua urubia ro. Neio umoro nato
goi-rimo ibo nou ro ata nakomu ata ta-wowea
Tarena Moto goro ato, mabu nou tu to se
gorowati.

²³ Taie nou woko kosioidiro tau na-goporeai
nou imese gorowameai simara moto to.

²⁴ Tuturu to pua nou orobo abere niro aise
gowea, nou niro 5 sogomi to na-goworohuti,
moto nou ro emeseretiti pua, moto ato aise
iropirotiti.

²⁵ Taie Erisabeti ro nato gutura, 'Abera
Naramu ia ro nedi tanaro ro nou ro
gosioidiro-die mo aboto. Mo urubia ro siripo
nematiti-mo teri na-nimidiro, kaupoti nedi tau
ro nato Abera naramu ro nedi siripo tanaro ro
ta-giwagare mo aboudo.'

Iesu koroto sapuwo to sowake urio ro gorowauti

²⁶ Erisabeti nou mere niro mutu na-imidirotiti 6 sogomi to edi tau ro nato, Godi edi sowake urio ro Gabiriere nato gemeiriai-ro Nasareti sabowa to Gariri duriomoro ato na-owamo.

²⁷ Sowake urio ro ata umoro owera gowou-ro ata besere aboto, edi besere ro gabo ta-gemoworohuti-rimo Iosepa aboto nou ro edea ri. Iosepa nou Deibidi nasa ie. Iedi besere ro masiro Maria.

²⁸ Sowake urio nato gou-ro nou aboto, taie nou ro ibo, 'Godi auna kamade ie oro aboto. Abera Naramu oro mutu e.'

²⁹ Kaupoti Maria daradara goi sowake urio beda owera gutura nou aboto. Maria ro ibo gimaragoidiro, 'Nou etou owera aro-die mo aboto?'

³⁰ Taie sowake urio ro nou nato gemowapotai, 'Oro tere na ie, mabu Godi kamade ie oro aboto.

³¹ Oro mere ama-oroto-ri, ina edi mere ro Iesu to ba-diduti.

³² Nedi dubu ro auna ia dubu to ama-ararasoro-ri, ibose nou Godi mere ie imese ohu ia to na-imidirotiti-die. Abera Naramu Godi nou ro ama-omia-ri pupuwo daro nou ro ama-imidiro-ri gabamani to, Deibidi beda sosoro to imidirotiti nou nasa ibo ama-omidiro-ri, eputa dubu to nou ro ama-ararasoro-ri.

³³ Nedi dubu ro, Isiraere urubia nou ro ama-iwaboi-ri womu tato womu tato, nou ro kiwaboi tanaro aise ama-owamotiti-ri womu tato womu tato.'

³⁴ Maria ro iato gemodowa sowake urio, 'Io idaibo tanaro beda sosoro ama-ororosioiido-ri mo aboto? Mo irimo ie uramu ro edea pua.'

³⁵ Sowake urio ro ibo, 'Oro aboto Tarena Urio ro amadi-ou-ri, nou edi pupuwo ro oro aboto ama-iwateai-ri. Ina nou mabu rido ie nedi tarena mere ro Godi mere to ama-ararasoro-ri.

³⁶ Abora oro neito ma-dirowidiro-ro oro edi mamu saro ro nou abere ie, kaupoti nou niro mutu e. Urubia ro ibo imaragoidirotiti-mo nou modobo pua mere koroto aboto mabu nou abere ie, kaupoti abora nou niro mutu e. Netewa didi sogomi peteibi nama-iherai-biri nou bamuai mutu ama-omidiro-ri.

³⁷ Godi aboudo tanaro koko tato ie kisioidiro aboto.'

³⁸ Taie Maria ro ibo, 'Mo Abera Naramu woko besere ie, oro ro beda sosoro to aro-die idaibo sosoro ba-mororosiodiro-mo mo aboto.'

Maria sowake urio ro iato aise gemeserai.

Erisabeti Maria ro garaturioma

³⁹ Edio tau ro nato Maria imese gaimai-ro ata podo duriomoro to, masiro Iudia.

⁴⁰ Taie Sekaraia bato gomidiro nedi moto ro neito nou imese godoro, iato nou ro Erisabeti aboto kamade owera iato gutura.

⁴¹ Ibose Erisabeti ro na-girorowai edio kamade owera ro Maria aboudo, bamuai kainai na-gomidiro Erisabeti niro turi ato, pua ie tu ra sairo ra na-giwimowado. Edio tau ro nato Erisabeti iato Tarena Urio ro aise goworohuti.

⁴² Ina Erisabeti ro auna se iato gutura ibo Maria aboto, 'Morobise ie Godi ro oro ia gomia pupuwo korosa, arua mamio marasio ie. Ibose oro ro edio mere ro nama-oroto-ri Godi ro pupuwo korosa ama-omia-ri.

⁴³ Abera Naramu mamu oro nouse ie mo naraturiomai-die. Mabu boira idaibo sosoro mea ia tanaro na-wororosioidiro-die mo aboto?

⁴⁴ Edio tau ro nato mo ro na-nirowai oro edi kamade oweru ro na-utura-die, bamuai kainai na-omidiro mo niro turi ato nou kamade ri tu ra sairo ra aise iwimowado.

⁴⁵ Ina abora oro kamade ta-woi mabu oro kimibiria tiamo ibo Abera Naramu edio oweru ro na-gowou-die oro aboto, morobise to amadimo-ororosioidiro-ri.'

Maria ro Godi a-gemowabu

⁴⁶ Maria ro iato gutura, 'Mo maumo giropu mutu Abera Naramu mo ro a-nemowabu.

⁴⁷ Mo kamade ie Godi aboto mabu abora nou mo kapopo dubu e.

⁴⁸ Mo nou dorogora se sowake besere ie kaupoti nou ro mo mea mino to niaurititi. Abora noudo womu tato boira urubia ro amadima-aro-ri ibo mo Godi ro meana ta-nomia-ro,

⁴⁹ mabu edi auna tanaro ro nou ro na-gosioidiro mo aboto. Nou masiro tarena ie.

⁵⁰ Godi ro imese sirio tau nirimagare kiaiwo ie imese urubia aboto nou etio ro emati-dumo tere.

⁵¹ Godi edi tu teibo ro pupuwo ia ie. Urubia etio ro eremowabu-dumo, etio ro imaragoidirotiti-dumo auna se simara sapuwo to neio nou ro kiburutai ie.

⁵² Etio ro gabamani to na-orowomidiro neio ohu rido nou ro kiamodorai ie. Etio ra dorogora se na-orowomidiro sopu ato, neio nou ro kiwoubua ie.

⁵³ Etio ra sogoi ro na-iwati Godi ro neio kiwarebai ie meamea namabu to, ibose namabu sirio urubia nou ro tu kawakawa kimeriai ie.

⁵⁴ Godi ro tiwarebidirotiti nou sowake urubia Isiraere. Nou auna ia nirimagare ie neio aboto, neio nou ro woki imatiti pua.

⁵⁵ Abera Naramu nou edi owera to na-garo kebase nimo orora dubu Aberaham nou aboto nou ro gisoidiro ina nou aramio merebusere aboto ibose to amadimo-ororosoidiro-ri womu tato womu tato.'

⁵⁶ Taie Maria tuturu to omidiro pua Erisabeti abato 3 sogomi neito gomidiro, taie imese gorowameai simara sabowa to.

Ioane masiro gemiditi-rimo

⁵⁷ Erisabeti mere ro na-gemeriai-ro nou ro dubu mere se goroto.

⁵⁸ Nou moto aupi ato etio ro gorowomidiro nou simara urubia mutu, neio ro atu se na-girowai-rimo Abera naramu edi nirimagare ro na-gowapotai-ro nou aboto, neio nou mutu auna kamade ro giwati.

⁵⁹ Iedi bamuai kainai ro nou 8 saiki na-giporeai, amia urubia iato gou-rimo Sekaraia aboto, Ioane dubu simara takamai kowasiai aboto, iedi tanaro ro nou aboto gou-rimo neio. Neio ubi ie nedi bamuai ro Sekaraia masiro to emiditi ri abera edio masiro to na-warasoro mabu neio simara tanaro ie, Isiraere urubia idaibo sosoro ie mere na-warasomai karasomai abera masiro neito kemiditi ie. Namuturubi ro na-gowapotai-rimo idaibo sosoro owera,

⁶⁰ nou mamu ro na-girowai neio edi owera ro nou ro aise giseai. Nou ro ibo, 'E e marasio, nio

ro neito iduti ate! Nou Ioane to
ama-ararasoro-ri.'

⁶¹ Ina urubia ro Erisabeti aboto, 'Nio gu ato
idaibo sosoro masiro to kebase a-gararasoro ra?
Io beda sosoro ra idaibo?'

⁶² Taie neio na-gerewesegegerai-rimo abera
negere aboto neio ro tu to iato
gemesioidiro-rimo ibo, 'Nou beda masiro to
namadima-asoro-ri?'

⁶³⁻⁶⁴ Taie neio nou kiatiti nakomu
na-gemowosiomai-rimo, kemedea taie nou
masiro iato gematiti IOANE. Nou ro masiro edi
tau ato na-giatiti Godi nou ro aise gemowabu.
Urubia ro edi masiro na-gowea-rimo neio iato
aborabora ro girobai.

⁶⁵⁻⁶⁶ Urubia iato na-gorowomidiro auna ia tere
ro girobai etou tanaro gororosioidiro-rimo neio
abato.

Beda tanaro gororosioidiro-rimo edi owera ro
imese nato gorobodorouti Iudia podo duriomoro
ato, ina neio kimaragoidiro auna ia se giamo
iedi bamuai kainai ro nou sapuwo to. 'Nedi
mere ro nama-ororomai-ri nou ro etou tanaro
ama-isioidiro-ri?' Neio ibose umoro ta-goi-rimo
Abera Naramu nou mutu ta-gidabuti.

Sekaraia ro Godi gemowabu

⁶⁷ Sekaraia iedi tau ro nato Tarena Urio ro
goworohuti. Taie Godi ipusu owera nou ro
urubia aboto iato gimowauti ibo,

⁶⁸ 'Nimo Isiraere urubia Abera Naramu nou
Godi ie, nou ia se memowabu-rimo, nou
ta-gou-die simara urubia iwarebai ri ibose
iapopo ri ubauba aboudo.

⁶⁹ Auna pupuwo dubu Godi ro nimo kiapopo dubu to gapoi-ro, nou edi sowake dubu ro Deibidi nou gu dubu e.

⁷⁰ Godi ro owera kebase gaiwai-ro nou tarena ipusu owera urubia aboto tagara tau ato etio ro gorowomidiro,

⁷¹ ibo Godi ro nimo nasa rubi aboudo anama-iapopo-ri, ibose nimo etio ro nihoio-dumo neio aboudo anama-iwagare-ri.

⁷² Godi ro ibose ta-gutura-ro ibo nou ro nirimagare ama-iwawuti-ri neio nasa naminami aboto ibose nou ro ama-emaragoidiro-titi-ri edi tarena hodo ro na-gasubiai.

⁷³ Nimo nasa Aberaham aboudo iedi hodo kemasubiai owera ro

⁷⁴ ibo owamo nimo nou ro anamadi-iwatateai-ri nasa urubia aboudo. Ina nou do ie nimo ro nou woko kemesioidiro ata tere tato ie,

⁷⁵ ina nimo tuputupu se orowomidiro-ri tarena mino to nou sosoro gabo ato ibo nama-orowomidiro-ri.'

⁷⁶ Taie Sekaraia iato gerewesegerai simara mere dubu aboto, nou ro ibo, 'Mo mere, oro Godi ohu ia ato na-omidiro-die nou ipusu owera dubu to ama-ararasoro-ri. Oro kebase ama-ou-ri Abera Naramu saro rudo amadi-ou-ri, nou gabo kebase oro ro ama-emaipo-ri urubia aboto.

⁷⁷ Keremiro gabo nou urubia aboto oro ro ama-imowapotaiddiro-ri. Oro ro ibo ama-imowauti-ri, "Nio ubauba Abera Naramu ro kimatopeamuti ato keremiro gabo nio ro nato amadimo-owea-ri."

⁷⁸ Saiki beda sosoro kowaroho ra, Godi edi

nirimagare ro idaibo sosoro
amadi-orowapotai-ri nimo aboto.

⁷⁹ Nimo korowaburo tere mutu nirowomidiro
duwoduwo maumo ato, ina Godi edi nirimagare
ro pina sosoro ie, miro gabo edi pina ro nou ro
imowapotaaidiro rie.'

⁸⁰ Edi mere ro auna na-goi, nou Tarena Urio ro
pupuwo aise gowai. Ioane ibo pua nou urubia
mutu moro ato komidiro, urubia tato moro ato
imidirotiti womu tato ti-gorowapotai-ro Isiraere
urubia aboto neio Godi oweru to itomudiro ri.

2

Iesu na-goroto Maria ro

¹ Roma sabowa gebari auna gabamani eputa
dubu to etu ro gararasoro nou masiro Ogasiti
Sisa nou ro iaurititi, ibose imese duriomoro patu
Roma rido iaurititi. Iedi tau ro nato nou ro
oweru iato gimerio imese duriomoro urubia
modobo ie neio masiro aise kiaremuti buka to.

² (Ina Sisa ro Kuiriniasi ta-gapoi Siria
duriomoro emeauri ri, ina iedi tau ro nato keba
tau e urubia sirio kou masiro kiaremuti aboto.)

³ Taie imese sirio urubia etio ro gorowomidiro
muso duriomoro ato, neio simara sabowa to
imese aise gemowameuti masiro iato iaremuti
ri.

⁴⁻⁵ Taie iedi tau ro Iosepa nou imidirotiti
Nasareta sabowa ato, Maria ra Iosepa ra neitiro
ereredeua pua, osio ra irimo ra ie, gabo se
gimowou-marimo. Nedi sabowa ro neitiro
na-gemeserai-rido Gariri duriomoro ato
na-owamo neitiro imese giodori-marou ioudo,

Iudia podo duriomoro na-gemidiai-rido, womu tato Beterehema sabowa to ti-gorowateai-rido. Keba ia tau ato Deibidi Beterehema sabowa ato iato goroto mamu ro. Iosepa gu Deibidi aboudo orobu-die, neitiro nou ri gorowameai-rido Beterehema sabowa to, masiro iato iaremuti ri.

⁶⁻⁷ Taie iedi tau ro nato Maria niro mutu goroho. Neitiro na-gorowateai-rido Beterehema sabowa to, iato neitiro apira rubi kirobuti moto neito na-gou-rido, urubia sirio iedi moto gebari ro neio ro imese ta-gorobai-rimo. Neitiro gabo tato ie iedi moro ro iato kirobu-ma, taie sarupo kiwoubua nakomu iedi moto ato na-irowotoititi neitiro neito imese gou-rido. Ito na-gou-rido taie Maria nou mere temeteme ro nato gemowatumuti-ro, taie iato mere aise goroto.

Mere na-goroto nou ro mea mino to obotama kerekere to gemokoumiriamuti. Taie sarupo kiwoubua nakomu edi na bokose ro ohona boido ihotiti-dumo edi mere kainai ro koupiriamuti mamu ro ito aise gowotodai.

Sipisipi kimowotoi urubia Iesu sapuwo to oweragirowai-rimo

⁸ Arua sipisipi kimowotoi urubia iedi duwo ro nato neio sabowa aupi ato sipisipi gimowotoi-rimo, tumu na aboudo giwasiouti-rimo.

⁹ Ina iedi tau ato na-gimowotoi-rimo Godi edi sowake urio ro nato gorowapotai-ro neio aboto, taie Godi edi auna ia woroworo ro nou ro gereredeadea, neio paea se imese gorowotoi. Nedi sipisipi kimowotoi urubia ro neio auna tere ro girobai.

¹⁰ Taie iedi sowake urio ro neio iato gimowapotai ibo, 'Nio tere na ie, mo ro mea ower a nimowou-die nio imowauti rie. Imese sirio urubia iedi ower a ro namadimi-irowai-ri auna ia kamade ro ama-iwati-ri.

¹¹ Abora nedi saiki ro nato nio ubauba aboudo kiapopo dubu, nou mamu ro ta-woroto Deibidi edi sabowa ro Beterehema iedi bamuai ro iato torobu. Nou Godi ro kohodowa dubu e, nu nio Abera Naramu e.

¹² Nio ro namadimo-owea-ri bamuai koupiriamuti nama-orobu-ri kiwoubua nakomu ohona bokose ato, nio umoro amadimo-oi-ri ibo mo ro morobise ower a naro.'

¹³ Tuturu to pua neibi na-girarowea-birimo sowake urio dawarea gebari iato aise garapusia-ro, keba sowake urio mutu neio atu se Godi iato gemowabu-rimo,

¹⁴ 'Ohu ia ohu ia ato etu ro omidiro-die, modobo ie nou kemowabu. Beda urubia ra Godi kamade na-goï neio aboto, mea komidiro keremiro nou ro kimio ie.'

¹⁵ Iedi sowake urio sirio ro sipisipi kimowotoi urubia neio ro aise gimeserai-rimo, taie imese gorowameai-rimo Adiri sabowa to.

Taie iedi sipisipi kimowotoi urubia ro neio nakara se iato geremowagomea-rimo ibo, 'Beterehema sabowa to ma-mou-rimo sowake urio ro beda sosoro nimowapotai-die, iedi tanaro ro na-wororosioïdiro nou owea rie.'

¹⁶ Taie iedi sipisipi kimowotoi urubia ro neio ioudo samo to imese gou-rimo.

Neio ito na-gorowateai-rimo Maria ra Iosepa ra neitiro se giwia-marimo, ibose bamuai kainai

mere ta-gowea-rimo na-gorobu kiwoubua
nakomu ohona bokose goro ato.

¹⁷ Taie iedi bamuai kainai na-gowea-birimo
neibi ro urubia owera iato gimowauti-birimo
sowake urio ro edi na owera to gimowauti-biro
iedi bamuai kainai ro nou sapuwo to.

¹⁸ Ina sirio urubia ro nedi owera ro
na-girowai-rimo neio aborabora ro girobai.

¹⁹ Taie Maria ro sipisipi kimowotoi urubia edi
owera na-gorowauti-rimo nou ro na-girowai
nou niro turi ato aise giedea, sirio tau nou
emaragoidirotiti.

²⁰ Nodi owera ro neibi ro korowauti
na-goporeai-birimo taie neibi imese
gorowameai-birimo sipisipi bato
gimeserai-birimo neito. Neibi
na-gorowameai-birimo Godi neibi ro auna ia se
gemowabu-birimo nou masiro ohu ia to
gowouburio-birimo mabu neibi ro edi tanaro
na-gowea-birimo morobise to gororosioihiro
sowake urio ro beda sosoro to gimowapotai-biro.

Iesu masiro gemiditi-rimo

²¹ Iesu 8 saiki na-giporeai nou dubu simara
takamai na-gasiai-rimo iato guriai-rimo, Isiraere
urubia beda sosoro isioidirotiti-dumo. Ibose nou
masiro iato gemiditi-rimo Iesu to, kebase
sowake urio ro ta-gutura-ro Maria aboto nedi
masiro ro neito asoro ri.

Iesu Tarena Moto to gowodoro-rido

²²⁻²⁴ Maria ra Iosepa ra iedi tau ro ta-gorobai
Mose edi sabi ro na-giaiwai Isiraere urubia
aboto neio beda tanaro isioidirotiti-mo idaibo

agimari orobo na-osuruwo-die moto rido, nou meana kowai sapuwo to. Dubu mere koroto ato mamu nou 40 saiki to komidiro ie agimari. Nedi sabi ro Mose ro nou gaiwai neitiro ro nou gobodoro-rido.

Mose sabi ato ibose towamo agimari orobo ro mani to kimidai-ma ie *dumu teibo o gimai teibo*, nou kiwou-ma ie Godi ra urubia ra turituri dubu aboto emematowo na nou agimari aboudo meana kowai sapuwo to.

Neitiro ro ibose nedi bamuai ro Abera Naramu aboto nato gaiwai-rido mabu Mose sabi ato towamo ibo *Keba koroto dubu mere Abera Naramu aboto aise gi-aiwo-ri*. Maria ra Iosepa ra nou ri gou-rido Ierusarema sabowa to idaibo tanaro isioidiro ri.

Simioni ro ta-gowea Iesu

²⁵ Ata dubu nou Ierusarema sabowa ato imidirotiti nou masiro Simioni. Nou mea dubu e, Godi ro beda owera kutura ra nou ro aise isioidirotiti mea mino to, Tarena Urio ro oworohutititi. Isiraere urubia beda tau ato Godi ro namadi-iwosuruwo-ri ubauba aboudo Simioni nou emasebidirotiti.

²⁶ Taie nou Tarena Urio ro kebase ta-gemowapotai ibo, 'Mo kohodowa dubu nedi duriomoro ro neito namadi-ou-ri, oro ido to ama-araburai-ri, oro ro simara idomari to ama-owea-ri.'

²⁷ Taie iedi tau ro nato Simioni Tarena Urio ro gowaboi Tarena Moto to, edi atu tau ro nato Maria ra Iosepa ra neitiro Iesu bamuai kainai nato gowou-rido Tarena Moto to Godi aboto aiwai ri.

²⁸ Simioni ro edi bamuai kainai ro na-gorobai-ro Godi iato gemowabu,

²⁹ 'Abera Naramu mo oro sowake dubu e, modobo ie mo ata ubauba tato karaburai.

³⁰ Nimo urubia ubauba aboudo kiapopo dubu mo ro simara idomari to ta-nowea, oro ro beda sosoro to garo-ro.

³¹ Oro ro nou mea mino to ta-gemododiai erere duriomoro urubia patu neio sosoro gabo ato,

³² nou woroworo ie imese urubia nou ro ama-imewiti-ri. Ibose arua urubia ro Isiraere urubia masiro nou mabu ato auna amadimo-owai-ri.'

³³ Iesu mamu ra abera ra neitiro auna ia kimaragoidiro gowea-rido, Simioni ro beda sosoro oweru garo iedi bamuai ro nou sapuwo to.

³⁴ Taie Simioni ro neibi atu se korosa aise gimia-ibi. Maria aboto na-gerewesegerai, nou ro ibo, 'Nedi urubia sirio ro Isiraere duriomoro ato na-orowomidiro amia ama-iretuti-ri, amia ama-orowotoi-ri, mabu nedi mere kainai ro Godi ro garapoi-ro nedi tanaro ro isioidiro ri. Urubia sirio ro nou amadime-ebeiouti-ri,

³⁵ ina nou do ie urubia edi maumo kimaragoidiro ro nou ro paeapaea ama-imowaititi-ri. Maria, oro auna mibo ro ama-orobai-ri idaibo iona oro durupi ato na-otobowa idaibo temeteme oro ro nou ama-owaibia-ri.'

Ana ro ta-gowea Iesu

³⁶ Iedi tau ro nato ata abere ibose to gomidiro nou masiro Ana, Godi ipusu oweru kemoworohuti orobo ie. Nou abera Panuere,

Asere gu dubu e Isiraere ato owamo. Nou kebase uramu ro ta-gedea, 7 kisimisi to gomidiro-rido nou

³⁷ mutu, taie nou uramu aise garaburai. Nou nakara ia se imidirotiti uramu tato, ina abora 84 kisimisi ta-girobai. Kaupoti nedi abere ro Godi edi Tarena moto ro nou ro kemesere pua, nou sirio tau Tarena Moto to aise irohotiti, Godi nou ro iato emowabutititi duwo saiki. Nou iato komidiro ie ohona kiho tato Godi aboto kararatoro ie nou woko isioidirotiti.

³⁸ Iesu iedi tau ato na-gowou-rido mamu ra abera ra ro Ana neibi aboto aise garadabuai, taie eso owera iato garo Godi aboto. Iu urubia arua etio ro geremasebidiro-rimo Godi ro ubauba aboudo beda tau ato ama-iwosuruwo-ri, Ana ro idaibo urubia neio gimowauti Iesu sapuwo to.

Iosepa ra Maria ra Nasareta sabowa to gorowameai-rido

³⁹ Iosepa ra Maria ra neitiro edio tanaro aboto na-gou-rido Ierusarema sabowa to imese na-gemopodiauti-rido nedi tanaro ro, taie neibi atu se imese gorowameai-birimo Nasareta sabowa to. Iedi sabowa ro Gariri duriomoro ato owamo.

⁴⁰ Neibi iato na-imidirotiti-bimo Iesu iato ororomaititi womu tato nou kanikani ro ti-gorobai. Ibose nou pupuwo, muro mutu gororomai, ina Godi edi korosa ro nou abato ta-owamotiti.

Iesu kanikani Tarena Moto ato na-gomidiro

⁴¹ Kisimisi gabogabo Iesu mamu ra abera ra neitiro aise idiowadotiti-do Ierusarema sabowa

to Kimasaudai Soriomu aboto, Isiraere urubia mutu.

⁴² Ina Iesu nou 12 kisimisi na-gorobai taie neibi atu se nato gidiai-birimo Ierusarema sabowa to nedi soriomu ro nou aboto.

⁴³ Ina iedi soriomu ro kiamo na-goroporeai taie urubia sirio duriomoro gabogabo to iato aise gorowameai-rimo. Kaupoti Iesu kanikani orowameai pua nou Ierusarema ato geremeserai. Nou mamu ra abera ra umoro oi pua iedi tanaro na-gororosioiido ibo nou ta-weremeserai Ierusarema sabowa ato.

⁴⁴ Taie neitiro isana borubi mutu saiki tuturu na-gou-rimo neitiro ro adimo ato nato gowasosorai-rido, neitiro ro iato otoruti-do urubia na-gorowame-rimo, 'Iau, neitiro mere a-wou-ro ra?'

Taie neitiro iato gosora-rido urubia kimodoruti

⁴⁵ kaupoti owea pua, egea se gosora-rido. Taie neitiro iato aise gorowameai-rido Ierusarema sabowa to nou osora ri. Neitiro ro ibo gosora-rido ibo gosora-rido owea pua,

⁴⁶ netewa didi saiki neitiro ro ta-giporeai-rido nou kosora.

Iesu nou isana a-gomidiro Tarena Moto ato, Mose sabi patu etio ro gitamudi-ro nou neio topira maumo ato gomidiro. Neio owera gimerewidiro, nou ro na-gimedeia gare, taie nou ro iato gi-imodoruti-ri. Taie wisa neio ro iato gemowame-rimo, io idaibo sosoro gorowati-rimo neio.

⁴⁷ Ina iedi urubia ro iato na-gorowomidiro neio imese auna ia se gimaragoidiro-rimo nou

beda sosoro wisa giwame neio aboto, mabu nou umoro auna ia ie neibi mea se gibo-ibi.

⁴⁸ Taie nou mamu ra abera ra nou osora-diodo, neitiro na-gorowateai-rido Tarena Moto to, nou iato gowea-rido a-gomidiro. Neitiro ibose auna kimaragoidiro ro giopia-ma, taie nou mamu ro ibo, 'Iesu neitiro oro nosora-do oro idaibo tanaro etou ri gosoioidiro? Neitiro oro ro auna kimaragoidiro nimia-madie!'

⁴⁹ Ina nou ro ibo gimowameai-ma neitiro, 'Mo nitiro ro etou nakomu ri nosora-do? Nitiro umoro kiamo modobo ie ibo Abera woko bato owamo io mo nitiro ro iato kowea ie.'

⁵⁰ Maria ra Iosepa ra nou edi oweru to na-garo neitiro ro mea se ememidai pua.

⁵¹ Taie nou mamu ra abera ra mutu atu se imese gorowameai-birimo Nasareta sabowa to.

Iesu ro mamu ra abera ra beda oweru kutura ra nou ro eseiai-ri pua, aise kisioidiro ie. Taie edi tanaro sirio ro na-gororosioidiro-rimo Maria giropu aise geremohiai nou ro woki imati pua kimaragoidiro to aise iworohutititi.

⁵² Iesu na-ororomaititi nou mea muro mutu ororomaititi. Nou auna na-go urubia nou aboto auna kamade ro iwatititi, ibose Godi kamade ro owatititi nou aboto.

3

Ioane ro gemaipo-ro Iesu gabo

¹ Ata auna dubu masiro Taiberia Sisa sirio duriomoro patu nou ro iaurititi Roma sabowa rido. Arua dubu nou maumo ato isioidirotiti-mo woko nou ro giapoi neio. Idaibo Ponita Pairiti ro Iudia duriomoro nou emeaurititi. Ina Herodi

ro Gariri duriomoro emeaurititi, nou naramu
Piripi ro Ituria daro Tirakoniti duriomoro teibo
nou emeaurititi-ma. Raisania ro Abirini
duriomoro emeaurititi,

² ina iedi tau ro nato ta-gomidiro-rido ibose
Anasi ra Kaiapa ra neitiro Godi ra Urubia ra
turituri urubia eputa dubu teibo ie, neitiro
Ierusarema sabowa ato imidirotiti-do.

Taiberia 15 kisimisi to na-gomidiro eputa
dubu to, taie iedi tau ro nato Godi owera nato
garo-ro Ioane aboto Sekaraia edi mere ro, nou
imidirotiti goto se duriomoro ato.

³ Taie Ioane ioudo na-gohau-ro, Iodeni oromo
bara ato irohotiti urubia iato imowautititi,
'Derewesegerai-mo Godi aboto ina nio mo ro
obo to nato anama-iwarumiauti-ri, iato Godi ro
nio edi ubauba ro ama-imatopeamuti-ri.'

⁴ Aisaia Godi ipusu owera dubu owera tiamo
Tarena Buka ato Ioane sapuwo to. Nou ro ibo,
'*Ata dubu kaunene tiarotiti goto se duriomoro
ato, "Abera Naramu gabo ba-demesioidiro-mo
tuputupu se ba-demowou-mo ata kerewai kerewai
tato se.*

⁵ Podo gawagogo ba-diatumuti-mo ibose podo
kiokio ba-diasio-mo atu mako ato ba-miamo.
Gabo beda moro ato owamo kerewai kerewai se,
tuputupu se ba-dowou-mo emia ba-dimotoho-mo.
Ibose bobobo gabo ba-diatumuti-mo, goto paupau
na-iamo ba-dimatauti-mo.

⁶ Ina imese urubia ro paea se amadimo-owea-ri
Godi edi kiapopo tanaro ro beda sosoro
owamo-die." '

⁷ Ioane aboto urubia sirio nato gou-rimo, neio
nou ro obo to iwarumiauti ri. Ioane

na-giraroweauti nou ro iato gutura neio aboto ibo, 'Nio imese pamo bagawe sirio ie! Nio umoro etu ro iwai Godi serawo na-wou-die nou aboudo korowadau?

⁸ Nio modobo ie meamea tanaro kisioidiro, ina iedi meamea tanaro ro urubia neio ro amadimi-iwapotaidiro-ri ibo nio tau kerewesegerai e ubauba aboudo. Nio modobo pua ibo kutura "Nimo modobo ie mabu nimo nasa Aberaham ie, nimo nou urubia ie." Nio mo ro abora a-nimowapotai Godi nou modobo ie Aberaham orio urubia kimesioidiro nedi nadi sirio ro neito!

⁹ Kabi towamo-die abora, paea se ta-gedea-die ota iebuti ri. Beda ota ra iopu tato io neio kiebuti aboto ama-orowotoi-ri, iato era to ama-ihere-ri. Beda ota ra iopu mutu neio ro ama-orowotoi-ri.'

¹⁰ Urubia sirio edi owera ro na-girowidiro-rimo neio ro Ioane iato gemodowa-rimo, 'Ina nimo ro beda tanaro anamadimi-isioidiro-ri?'

¹¹ 'Oro abato sodo teibo kiamo-ma ato, oro ro modobo ie ata kaiwai sodo tato mere aboto. Ibose oro abato ohona na-iamo modobo ie arua kaiwai ohona tato mere aboto.'

¹² Ioane aboto ibose takesi kimade urubia ta-gou-rimo, neio ubi ie Ioane ro iwarumiauti ri obo to. Taie takesi kimade urubia neio iato ibose to gutura-rimo Ioane aboto, 'Kitamudiro dubu nimo beda tanaro namadimi-isioidiro-ri?'

¹³ 'Nio ro modobo pua gabamani ro beda mako kimedea ra didi mani kimade kawa kimade piro to.'

¹⁴ Ibose boso koroho urubia ro ibo, 'Ina nimo beda ra? Beda tanaro namadimi-isioidiro-ri?'

‘Nio mutu ibose masawe to arua urubia mani imediawado mamo, nio karasaubuti tanaro kisioidiro modobo pua. Nio gabamani ro beda mani imiotiti modobo ie kamade mutu kimade.’

¹⁵ Iedi tau ro nato urubia Godi ro kohodowa dubu nou gemasebidiro-rimo. Neio ro Ioane na-giauri-rimo beda tanaro gisioidiro, neio ro nu a-gatidiouti-rimo. Neio ibo gimaragoidiro-rimo, ‘Etu moro ra nou Godi ro kohodowa dubu nou se ie?’

¹⁶ Taie Ioane ro ibo, ‘Ata dubu tou-die mo saro rido, nou auna dubu e, mo modobo pua nou tamaka hodo kemopuruti aboto. Nio mo ro obo kawakawa to niwarumiauti kaupoti nedi dubu ro nio nou ro Tarena Urio to ama-iwarumiauti-ri, daro era to ama-iwarumiauti-ri.

¹⁷ Nou namadi-ou-ri nou ro ama-imododiai-ri ota iopu, takamai nou ro ama-iamotuti-ri, mea ota iopu nou ro takamai rido ama-iwagarewado-ri. Takamai tima moro to ama-iaremo-ri, meamea ota iopu tima moro to ama-iaremo-ri. Takamai nou ro kaupoti moro to nama-iwoiriamuti-ri, taie era to nato ama-iherai-ri. Iedi era ro korodouti pua, iato ibose to iriwaretiti, womu tato womu tato era ie. Isana nou ro meamea ota iopu kiaremo moto ato nato ama-iaremo-ri.’

¹⁸ Ioane orodiobutiti pua, meamea owera nou ro urubia neito aise itomutititi neio pupuwo kiwaititi sapuwo to.

Iesu Ioane ro gowarumia obo to

¹⁹⁻²² Iedi tau ato na-iwarumiautiti urubia Ioane ro obo to, taie Iesu nou ro nato

gowarumia obo to. Iesu kararatoro owera iato garo Godi aboto. Iedi kararatoro na-gararatoro toboro magere aise gorodobura-ro, taie Tarena Urio nato gororuwo-ro toboro rido nou aboto dumu sosoro. Taie owera kodu toboro rido nato gutura-ro ibo, 'Oro mo ia mere buro ie, mo auna nirimagare ie oro aboto, ibose mo oro aboto auna kamade ro nowatititi.'

Ata saiki ato Herodi owera Ioane ro paea mata se gemowapotai ibo, 'Oro ro ubauba tanaro gosioidiro Herodiasi na-gedea, nou oro eterera ie!'

Herodi ro ibose sirio ubauba ta-isioidirotiti urubia aboto, nou ubauba idaibo sosoro ohu ra maumo ra aise iremotomotiti. Ioane ro Herodi paea mata se emowapotaidirotiti, ina noudo ie Herodi ro Ioane dibura to nou mabu ato gedea.

Iesu aramio negenege sapuwo to kiwasoro

²³ Iesu 30 kisimisi sosoro ie nou woko nato gatamuai. Urubia a-gimaragoidiro-rimo ibo nou Iosepa ro garasomai. Ina Iosepa Heri ro garasomai.

²⁴ Heri Matata ro garasomai. Matata Riwai ro garasomai. Riwai Meriki ro garasomai. Meriki Ianai ro garasomai. Ianai Iosepa ro garasomai.

²⁵ Iosepa Matatia ro garasomai. Matatia Eimosi ro garasomai. Amosi Nahuma ro garasomai. Nahuma Esiri ro garasomai. Esiri Nagai ro garasomai.

²⁶ Nagai Mata ro garasomai. Mata Matatia ro garasomai. Matatia Semeini ro garasomai. Semeini Ioseke ro garasomai. Ioseke Ioda ro garasomai.

²⁷ Ioda Ioanane ro garasomai. Ioanane Resa ro garasomai. Resa Serubabere ro garasomai. Serubabere Searitiere ro garasomai. Searitiere Neri ro garasomai.

²⁸ Neri Meriki ro garasomai. Meriki Adi ro garasomai. Adi Kosama ro garasomai. Kosama Eremadama ro garasomai. Eremadama Eri ro garasomai.

²⁹ Eri Iosua ro garasomai. Iosua Eriesere ro garasomai. Eriesere Iorimi ro garasomai. Iorimi Matata ro garasomai. Matata Riwai ro garasomai.

³⁰ Riwai Simioni ro garasomai. Simioni Iuda ro garasomai. Iuda Iosepa ro garasomai. Iosepa Ionama ro garasomai. Ionama Eriakimi ro garasomai.

³¹ Eriakimi Merea ro garasomai. Merea Mena ro garasomai. Mena Matata ro garasomai. Matata Natani ro garasomai. Natani Deibidi ro garasomai.

³² Deibidi Iesi ro garasomai. Iesi Obedi ro garasomai. Obedi Boasi ro garasomai. Boasi Saromoni ro garasomai. Saromoni Nasoni ro garasomai.

³³ Nasoni Aminadabi ro garasomai. Aminadabi Rama ro garasomai. Rama Hesoroni ro garasomai. Hesoroni Peresi ro garasomai. Peresi Iuda ro garasomai.

³⁴ Iuda Iakobo ro garasomai. Iakobo Aisaki ro garasomai. Aisaki Aberaham ro garasomai. Aberaham Tera ro garasomai. Tera Nahoro ro garasomai.

³⁵ Nahoro Seruge ro garasomai. Seruge Reu ro

garasomai. Reu Perege ro garasomai. Perege Eberu ro garasomai. Eberu Seraha ro garasomai.

³⁶ Seraha Kainani ro garasomai. Kainani Apakisadi ro garasomai. Apakisadi Sem ro garasomai. Sem Noa ro garasomai. Noa Rameke ro garasomai.

³⁷ Rameke Metusara ro garasomai. Metusara Inoki ro garasomai. Inoki Iaredi ro garasomai. Iaredi Mahararere ro garasomai. Mahararere Kenan ro garasomai.

³⁸ Kenan Inosi ro garasomai. Inosi Seti ro garasomai. Seti Adam ro garasomai. Adam Godi ro gosioidiro. Taie.

4

Iesu Satani ro owaibiriotiti

¹ Iesu Iodeni oromo rudo na-gidiai-ro, edi tau ro nato nou Tarena Urío ro goworohuti, iato imese gewedei goto se duriomoro to, nou iato imidirotiti.

² Nou iato na-imidirotiti goto se duriomoro ato, Satani ro nato owaibiriotiti Iesu ro ubauba tanaro isioidiro ri. Ibo owaibiriotiti ibo owaibiriotiti iboooooooo 40 saiki ti-giporeai kowaibirio to. Iedi saiki sirio ro Iesu ro ohona ihotiti pua, iato nou auna sogoi ro gemeriai-ro.

³ Satani ro nou ina iato gowaibia nou ro ibo, 'Oro Godi mere ie, nedi nadi iopu ro na-owamo oro ro demowapotai dokou to mararapoi.'

⁴ Iesu Satani aboto aise gerewesegerai nou ro ibo, 'E e ibo pua, Tarena Buka ato ibo iamo, *Ohona kiho ato se owamo pua keremiro.*'

⁵⁻⁶ Iato Satani ro Iesu imese gowioro ohu to, hio ito nou ro nato gemowapotai ibo, 'Iedi duriomoro gebari ro urubia imese namabu mutu ma-diauri! Imese mo doie, mo ubi etu aboto niedea mo ro nou aboto anama-iaiwai-ri ina nou mabu ato ie nedi duriomoro gebari ro oro tu to nama-emeseruti-ri oro ro iauri ri.

⁷ Oro ro mo namadi-emowabu-ri nedi duriomoro gebari ro oro do ie.'

⁸ Iesu ro ibo, 'E e Tarena Buka ato ibo iamo, *Oro ro Abera Naramu Godi nouse gi-emowabu-ri. Nou ubi tanaro se gi-isioidiro-ri.'*

⁹ Taie Iesu Satani ro Ierusarema sabowa to iato gowou Tarena Moto ohu to gowioro. Nou ro nato gutura, 'Oro Godi mere ie neido dererepeduai!

¹⁰ Mabu Tarena Buka ro taro ibo, *Godi ro sowake urio ama-imeriai-ri oro neio ro amadimi-iauri-ri.*

¹¹ *Oro neio ro tu to amadimo-orobidiro-ri, oro sairo nadi ato iteamoidiro-ri pua.'*

¹² Iesu ro ibo gemowameai, 'E e ibose tiamo Tarena Buka ato, *Oro modobo pua Abera Naramu Godi oro ro kowaibirio oro ubi tanaro kisioidiro aboto.'*

¹³ Taie Iesu sirio kowaibirio tanaro na-giporeai Satani ro nou iato aise gemeserai-ro womu tato nou ata tau nato amadi-orrowameai-ri.

Iesu woko a-gitamuai

¹⁴ Iesu nou Gariri duriomoro to na-gorowameai-ro, nou Tarena Urio ro goworohuti pupuwo korosa nou abato ta-gowamo. Ina nou sapuwo to owera nato gorobodorouti imese sabowa gabogabo to.

¹⁵ Iesu ibose Iu urubia karadabuti moto sirio sabowa gabogabo ato na-irowotoititi nou neito idoutititi, nou ro urubia iato itomudiroititi. Urubia ro na-giauri-rimo nou edi tanaro na-gisioidiro neio ro nou iato gemowabu-rimo.

Nasareti urubia ubi tato goi-rimo Iesu aboto

¹⁶ Iesu bato gororomai nou neito gorowameai Nasareti sabowa to. Taie nou beda sosoro tanaro to irohotiti, edi tau ro nou nato gou Iu urubia karadabuti moto to komidiro saiki ato. Nou iato na-gotobowa Tarena Buka ioputi ri,

¹⁷ buka kiauri dubu ro na-gemowosuruo-ro Iesu ro kimapimai iato gimoputi. Godi ipusu oweru dubu Aisaia nou edi buka ro na-gisioidiro nou ro noudo gimoputi ibo,

¹⁸ *Abera Naramu aboudo ie Tarena Urio mo aboto tomidiro abora nu mo mutu e. Mo nou ri narapoi-ro urubia mo ro imowauti ri mea oweru, etio ra namabu tato na-orowomidiro nedi oweru ro neio aboto ie. Mo nou ro nemeiriai-ro nedi duriomoro neito mo ro urubia oweru imowauti ri, etio ra simara ubauba maumo ato na-orowomidiro neio idaibo sosoro ie dibura to orowomidiro, neio magere imodobuti ri iwosuwoduti ri ioudo. Ibose mo a-nou-ro etio ra idomari pogo na-orowomidiro neio idomari mo ro meana imowaititi ri. Ina etio ra wagoha to na-ituti-dumo arua urubia ro mo ibose neio aboto nou-ro neio iwarebai ri kiwagare aboto.*

¹⁹ *Ibose mo a-nou-ro oweru imowauti ri ibo, 'Abera Naramu ro edi tau ro na-garapoi-ro urubia meana iwai-ri edi tau ro abora nou e ta-gorowateai-die.'*

²⁰ Taie iato Iesu ro buka kopai, imese gowameai buka kiauri dubu aboto, nou iato urubia kitomudiro aboto aise gomi. Urubia sirio iato na-gorowomidiro neio idomari Iesu ato se gorowotoi.

²¹ Iesu ro idaibo ower a gimowauti, 'Nodi ower a ro mo ro na-nimoputi Godi ro kohodowa dubu nou sapuwo to abora nou e notororosioidiro-dumo!'

²² Neio aborabora ro girobai daro auna se gimaragoidiro-rimo Iesu ro beda mea ower a garo neio aboto. Neio nakara se iato geremowauti-rimo ibo, 'Nedi dubu ro auna to ararasoro ri ra? Nou Iosepa mere ie.'

²³ Iesu ina aise gerewesegerai neio aboto, 'Nedi ower a ro morobise ie mo sapuwo to nio ro amadima-aro-ri ibo, "Dokota dubu, oro nakara se meana dorowai!" Nio ro ta-girowai-rimo kebase mo ro edi korosa tanaro na-nisioidiro Kapeniam a sabowa ato, ina nio ubi ie mo ro atu sosoro tanaro kisioidiro mo ia simara kororomai sabowa ato nato.

²⁴ Nio abora umoro ba-doi-mo mo ro beda ower a nama-aro-ri, io morobise ia ower a ie. Godi ipusu ower a urubia neio simara sabowa urubia ro kibeiouiti ie.

²⁵ Eraia edi tau ato na-gomidiro netewa didi kisimisi 6 sogomi kidabuai-bi ata daroho ata iarotiti pua. Isiraere urubia sirio iato na-gorowomidiro auna ia sogoi ro giwati. Ina Isiraere duriomoro ato upi garamio sirio iato

²⁶ ta-gorowomidiro kaupoti Eraia Godi ro neio aboto emeiriai pua, ata moro to gemeiriai sabowa masiro Sarepata Sidoni gomo ato

na-gowamo. Ata daimodaimo garamu orobo iato imidirotiti nou aboto gemeiriai nou ro iato owarebai ri.

²⁷ Godi ata ipusu oweru dubu Eraisa edi tau ato na-gomidiro, Isiraere urubia sirio durupi kukupi ro ta-giopia-rimo neio mutu gorowomidiro. Iedi kukupi ramutu urubia ro neio ata meana owai pua iedi tau ro nato, kaupoti dubu masiro Namani nouse gowai meana Eraisa ro. Namani Isiraere dubu pua, nou Siria duriomoro dubu e.'

²⁸ Iesu ro beda oweru gimowauti neio iedi karadabuti moto ro nato urubia iato na-gorowomidiro neio auna serawo aise goi-rimo.

²⁹ Neio ioudo na-giriribua-rimo Iesu neio ro korobai iato kohoiouti kohoiouti imese gowou-rimo iedi sabowa ro neido. Sabowa beda moro ato gowamo edi podo kiasiai ro nou neito gowioro-rimo neio ubi ie nou ioudo eherai ri,

³⁰ kaupoti nou ioudo aise gururiai-ro neio dubu patu maumo rido imese gorowameai-ro.

Iesu ro ubauba urio a-gemabodorai

³¹ Iesu nou Nasareta sabowa rido aise godori-ro Kapeniamu sabowa to Gariri duriomoro ato na-owamo. Taie nou komidiro saiki ro iato na-gorobai urubia nou ro iato gitomudi-ro.

³² Urubia ro na-giauri-rimo nou kitomudi-ro muro neio iato aborabora ro girobai mabu nou iedi kitomudi-ro ro na-itamudirotiti pupuwo kosora mutu itomudirotiti.

³³ Iedi Iu urubia karadabuti moto ro nato urubia dubu ubauba urio ro na-goworohuti nou iato ibose ti-gomidiro, nou ioudo auna ia se nato giaia-ro.

³⁴ 'Ei! Iesu! Nasareti dubu! Oro etou tanaro amadi-osioidiro-ri nimo aboto? Oro neito na-wou-die nimo ubauba iwai ri ra? Mo umoro ie oro Godi ro kohodowa dubu e.'

³⁵ Iesu ro nou aise gemadohodai ibo, 'Oro deremasiai, oro ro abora edi dubu ro demeserai, ioudo dosuruwo-ro!'

Iedi dubu ro ubauba urio ro iato aise geteamoidiro urubia sosoro gabo ato, ata ubauba ata osioidiro pua nou aboto, taie aise gemeserai.

³⁶ Urubia ro na-gowea-rimo edi tanaro ro na-gororosioidiro neio kimaragoidiro ro giopia. Neio ro ibo, 'Ee! Nou ata pupuwo korosa mutu iarotiti oweru ubauba urio kimabodoidiro aboto!'

³⁷ Iedi duriomoro nato edi tanaro ro na-gisioidiro, Iesu urubia ro na-giauri-rimo, oweru duriomoro gabogabo to aise gorobodorouti.

Temeteme urubia sirio Iesu ro meana giwaititi

³⁸ Iesu Iu urubia karadabuti moto rido ioudo na-gosuruwo-ro nou aise gemobodiai Saimoni moto to. Saimoni moto ato isa na nou emapura abere a-gorobu auna kabena ro gowati, taie neio ro Iesu nato gemowapotai-rimo nou sapuwo to.

³⁹ Ina Iesu aise gosiomai nou korobu moro to, iato edi kabena ro nou ro nato gemadowerai nou aboudo aragare ri. Tuturu to pua nou

kabena ro aise gemeseruti. Nou ioudo na-geribua-ro neibi ohona iato gimio-ibi.

⁴⁰ Saiki ta-goriodoi urubia sirio temeteme urubia nato giwou-rimo Iesu aboto, neio ro erere temeteme urubia giwou-rimo nou aboto. Taie Iesu ro neio nato giwaseidiro kaokao se iato imese urubia nou ro meana aise giwaititi.

⁴¹ Ibose ubauba urio Iesu ro ta-gimabodoidiro urubia aboudo neio ro ibo gi-imiaiauti-ri, 'Oro Godi mere ie!'

Taie Iesu ro neio auna se iato gi-imadowerai-ri ibo, 'Deremasiai orowauti ate!'

Ubauba urio umoro ta-goi-rimo Iesu nou Godi ro kohodowa dubu e.

Iesu Iu urubia karadabu moto ato itamudiroititi

⁴² Ata kowaroho Iesu urubia koroho tato moro to neito imese gou. Urubia ro na-gowasosorai-rimo nou neio ro iato gosora-rimo. Neio ro na-gowea-rimo nou iato egea se godiobo-rimo.

⁴³ Iesu ro neio neito gimowameai, 'Modobo ie arua sabowa urubia mo ro kimowauti mea oweri Godi ro kiwaboi tanaro beda sosoro ra nou sapuwo to. Mo neito nou mabu ato nemeiriai-ro.'

⁴⁴ Ina Iesu Iu urubia duriomoro gebari ato neio karadabuti moto sirio ato, nou iato ibose ta-itamudiroititi.

5

Iesu ro keba urubia girapoi nou owasoro-ri

¹ Iesu Gariri obo paruo bara ato gotoi urubia sirio nou ro neido gimowauti. Neio na-gou-rimo

nou aboto neio ro aise gemosopa-rimo Godi edi mea oweru ro nou irowidiro ri.

² Paruo bara ato nou ro nato giwia-ma pe teibo na-girobu-ma neti kimesere urubia ro giatai-marimo neio isa na ta-gou-rimo neti iaseruwouti ri.

³ Iesu nou Saimoni pe to aise gorora nou aboto iato gutura nou egea mere damo to owabumaidiro ri. Taie nou pe ato na-gomi urubia sirio nou ro ioudo gimowauti-ro.

⁴ Nou ro urubia kimowauti na-goroporeai taie nou Saimoni aboto nato gutura, 'Pe ito ma-dowabumaidiro damo to, neti iato ba-didobiti nakere kodoro sapuwo to.'

⁵ Taie Saimoni ro ibo, 'Auna dubu, nimo duwo tuturu neti egea se nimesere-dumo, ata nakere ata odoru pua neti to, kaupoti oro ro beda oweru utura-die io mo ro anama-osioidiro-ri.'

⁶ Taie neti neio ro na-gimidai-rimo iato gidobiti-rimo nakere sirio imese ta-godoro-rimo neti kititouti aupise ie, sapuwo sapuwo rido turi nakere ro se giroridiro.

⁷ Ina neibi ro borubi iato giramairiai-birimo ata pe to edi urubia ro goroho-birimo neibi iwarebai-biri, neti kidimo neio atu se nakere iato giahuruti-rimo pe teibo nakere ro ta-giarumia-ma aupise kiroru-ma.

⁸⁻¹⁰ Saimoni borubi Iemisi ra Ioane ra Sebedi mere teibo ie neitiro mutu neibi atu se nakere giahuruti-birimo a-giwagogorai-birimo.

Saimoni Pita ro na-gowea nedi tanaro ro nou kauhio to aise gomi Iesu sosoro gabo ato, nou ro ibo, 'Abera Naramu, oro neito mamu mo aboto, mo ubauba kisioidiro dubu e.'

Iesu ro nato gutura Saimoni aboto, 'Oro tere na ie, abora nakere beda sosoro irobo, oro ro urubia idaibo mino to ama-irobo-ri.'

¹¹ Taie neibi ro na-girowai-birimo nedi owera ro neibi pe teibo aise giwairio-mabirimo, beda mutu namabu ro giamo pe ato iato aise gimeseruti-birimo, ina Iesu beda moro to gou neibi ro aise gowasoro-birimo.

Iesu ro katio dubu meana gowai

¹² Iesu ata sabowa to na-gou-ro, iato ata dubu ta-gomidiro nou durupi imese katio ro ta-gopia-rimo. Taie iedi dubu ro Iesu nou ro na-gowea, nou kauhio to aise girimusubua Iesu edi sosoro gabo ro nato, taie Iesu aboto auna se iato gorowaro. Nou ro ibo, 'Abera Naramu oro pupuwo korosa mutu e, oro ubi ato, mo meana dowai-ro!'

¹³ Iesu tu iato gitomai nou ato. Nou ro ibo, 'Mo ubi ie oro meana kowai aboto. Abora oro meana ta-nowai.'

Nedi tanaro ro hio ia to gororosioidiro, nou edi katio ro na-giamo durupi ato imese aise gikokoiriai-rimo.

¹⁴ Taie Iesu nedi dubu ro iato gemowapotai ibo, 'Oro ro ata dubu ata emowapotai ate. Oro ba-dou Godi ra urubia ra turituri dubu aboto oro durupi nou ro ba-memowea. Oro ro arua nakomu ba-diwow Tarena Moto to, Mose sabi ro beda sosoro aro idaibo sosoro ba-disioidiro. Ina urubia sirio neio umoro nato amadimo-oi-ri ibo oro meana ta-woi.'

¹⁵ Iedi tanaro na-gosioidiro Iesu ro, owera nato gorobodorouti. Taie iato urubia sirio nato

gou-rimo nou owera irowidiro ri, daro temeteme urubia sirio nou ro meana iwaititi ri.

¹⁶ Kaupoti Iesu nou sirio tau ta-irohotiti nakara moro to Godi mutu eremowauti ri.

Iesu ro togiri dubu meana gowai

¹⁷ Iesu nou urubia na-gimowauti mea owera Godi sapuwo to iato ibose ta-gorowomidiro Parasi urubia Mose sabi kitamudiro urubia mutu. Neio erere sabowa rido goroho-rimo, Gariri ato iedi sabowa ro na-iamo, Iudia ato edi sabowa ro na-iamo ina Ierusarema sabowa gebari ioudo neio aise gou-rimo. Iedi tau ro nato Abera Naramu edi korosa ro ta-gowamo Iesu abato urubia meana kiwaititi aboto.

¹⁸ Taie ata togiri dubu namuturubi ro nato gowou-rimo Iesu aboto, patapata mutu. Namuturubi ro na-gowou-rimo Iesu aboto neibi ubi ie owodoro ri Iesu aboto,

¹⁹ kaupoti egea se gowaibia-birimo aise gowameai-birimo mabu bobo tato ie, urubia ro gabo imese ta-gowasiai-rimo. Taie iato neibi ata kimaragoidiro nato gowea-birimo, 'O, ito mowioro-birimo moto ohu to.' Taie neibi ro ohu to kowioro pito na-gemepito-birimo taie nu ioudo gowororuo-birimo nedi dubu ro umodi to na-gowororuo-birimo Iesu beda moro ato gotoi nou nato buru kereredeia ie.

²⁰ Neibi Iesu ro ta-gieibimai-bi, 'Io, nibi ro nedi tanaro ro kimibiria mutu osioidiro-diebimo.' Taie nou aise gerewesegerai iedi dubu ro nou aboto, 'Namutuna, oro ubauba mo ro a-nematopeamuti.'

²¹ Parasi urubia Mose sabi kitamudiro urubia neio nakara se iato gereriauri-rimo 'Ei, nedi

dubu ro modobo pua nou ro ubauba
kimatopeamuti aboto, Godi masiro nou ro
ubauba ta-wowai, Godi nakara se modobo ie
urubia ubauba kimatopeamuti aboto, ata dubu
ro kosioidiro modobo pua.'

²² Iesu umoro ta-goi neibi edi kimaragoidiro
ro, beda sosoro owera to
geremowagomea-birimo taie nou ro ibo, 'Nibi
etou mabu ato imaragoidiro-bimo idaibo?

²³ Mo aboudo koko ra idaibo owera kutura ibo
oro ubauba mo ro a-nematopeamuti, o koko ra
ibo kutura deribua, dou?

²⁴ Mo Imese Urubia Kiauri Dubu nou e, mo
abato korosa towamo imese urubia ubauba
kimatopeamuti aboto, ina mo ro
anama-osiodiro-ri ata tanaro nibi umoro koi
sapuwo to.'

Iesu iato gutura iedi dubu ro nou aboto, 'Oro
mo ro a-nemowapotai, deribua! Keta doumai!
Dorowameai simara moto to!'

²⁵ Iedi dubu ro urubia sirio sosoro gabo ato
aise geribua-ro keta na-goumai aise gosuruwo,
imese gorowameai simara moto to, Godi nou ro
iato imese gemowabu.

²⁶ Iedi urubia ro neio auna se
gimaragoidiro-rimo, Godi neio ro iato
gemowabu-rimo. Neio nakara se iato
geremowagomea-rimo, 'Morobise ie idaibo
tanaro na-wororosiodiro abora nimo ro
ta-nowea-mo nedi korosa tanaro ro.'

Iesu ro Riwai garapoi nou obodoro ri

²⁷ Iesu Iu urubia karadabuti moto rido
na-gosuruwo-ro, nou ro Riwai iato gowea takesi

kimade opesi ato gomidiro. Taie Iesu ro nato gutura nou aboto, 'Mo abora dobodoro-ro!'

²⁸ Riwai ro edi owera ro na-girorowai nou ro sirio namabu aise gimeseruti taie Iesu nou ro saro rido iato gobodoro.

²⁹ Riwai ro auna soriomu Iesu sapuwo to nato gosioidiro, iedi soriomu ro nou moto ato giamo. Urubia sirio ta-garadabuti ito idaibo takesi kimade rubi, arua urubia mutu. Iesu mutu neio atu moro ato gorowomidiro ohona giho-rimo.

³⁰ Taie Parasi urubia daro Mose sabi kitamudiro urubia neio ro urubia na-giwia-rimo Iesu mutu atu moro ato na-giho-rimo, neio auna masawe ro girobai. Taie Iesu kowasoro urubia neio ro iato gimodowa-rimo, 'Mabu boira nio nedi takesi kimade urubia ro atu moro ato na-iho-dumo, ina arua ubauba urubia mutu?'

³¹ Taie Iesu ro neio neito gimowameai, 'Mea durupi urubia dokota aboto oroho-ri pua durupi meana iwaititi ri, kaupoti urubia etio ra temeteme mutu na-orowomidiro dokota ro neio durupi meana kiwaititi ie.

³² Mo ro meamea urubia iroru-ri pua neio ubauba aboudo kerewesegerai aboto. Mo a-nou-ro ubauba urubia iroru ri neio ubauba aboudo erewesegerai ri.'

Tagara tanaro orio tanaro mutu imasaupiai-ri pua

³³ Urubia ro iato gutura-rimo Iesu aboto ibo, 'Ioane edi kowasoro urubia ro daro Parasi edi kiwasoro urubia ro Godi kararatoro sapuwo to neio amia saiki kiho tato korowomidiro ie. Kaupoti oro edi kowasoro urubia ro neio ro

idaibo tanaro isioidiro pua, neio ohona sirio tau aise ihotiti-dumo.'

³⁴ Taie Iesu ro neio neito gimowameai, 'Marete soriomu oro ro kosioidiro ato, ina urubia karadabuti ato, edi marete dubu ro neio mutu komidiro ato, urubia ohona kiho tato korowomidiro ra? E e oro ro namuturubi ohona kiho tato iwomidiro-ri pua. Nou idaibo tau ato na-womidiro nou namuturubi modobo ie ohona kiho nou mutu.

³⁵ Kaupoti ata tau tou-die nedi marete dubu ro namadimo-owagare-ri ata moro to, taie nedi urubia ro kiho tato nato ama-orowomidiro-ri.'

³⁶ Ina ata totomu Iesu ro urubia nou gimowauti, 'Ata mere ro orio sedo ekekeai-ri pua ina tagara sedo pito neito kemowateai. Mabu idaibo tanaro kosioidiro ato iedi orio sedo ro ubauba kowai ie, ina edi orio sedo kere ro kowateai ato iedi sedo ro mea se obodiai-ri pua.

³⁷ Ibose ata mere ro orio tuba tagara kepuru to arate-ri pua. Mabu idaibo tanaro kororosiodiro ato, orio tuba tagara kepuru to karate ato, iedi tuba ro keremagaubuti ato iedi kepuru ro aise kerepeputi ie, iedi tuba ro aise karasiai ie, ina kepuru ubauba koi ie.

³⁸ Ina ibo ie, orio tuba orio kepuru to kiratuti ie.

³⁹ Urubia dubu ubi tato ie orio tuba kidio aboto mabu nou ro tagara tuba na-idio imese modobo na-woi, taie nou ro kutura ie ibo, "Tagara tuba modobo ia ie imese, orio tuba ubauba ie." '

Iesu Iu urubia komidiro saiki Abera Naramu e

¹ Iesu Iu urubia komidiro saiki ato woiti pariturturi ato gou-ro, taie gabo turi ato iedi woiti iopu ro na-gorowotoi nou kowasoro urubia ro nato gidoho-rimo. Neio ro na-giakukuti-rimo iato giho-rimo.

² Neio Parasi urubia ro na-giwia-rimo edi tanaro ro na-gisioidi-ro-rimo neio ro nato gutura-rimo ibo, 'Mabu boira nio ro idaibo tanaro na-isioidiro-dumo? Mose sabi ro ibo aro pua idaibo tanaro isioidiro ri. Nimo komidiro saiki ato, idaibo tanaro kisioidiro imese sabi ia ie.'

³ Ina neio Iesu ro ibo gimowameai, 'Nio ro keremoputi pua ra Deibidi ro edi tanaro gosioidi-ro nou sogoi ro na-gorobai? Deibidi edio urubia mutu goroho neio ibose sogoi ro ta-girobai,

⁴ taie nou nato godoro Godi edi Tarena parai moto ro neito, nou ro dokou ioudo nato gimidai-ro, edi dokou ro tarena ia ie, modobo pua dorogora se urubia ro kiho. Taie edi dokou ro nou ro ioudo na-gimidai-ro imese gouho, arua nou ro borubi aboto giaiwai neio atu se imese giho-rimo. Ina iedi tanaro ro neio na-gosioidi-ro-rimo Mose sabi ro ta-gowapotai-ro ibo nedi dokou ro imese tarena ia ie, modobo ie Godi ra urubia ra turituri urubia neio ro se kiho, arua urubia ro kiho sabi ie.'

⁵ Taie Iesu ro nato gutura Parasi urubia aboto, 'Mo Imese Urubia Kiauri Dubu e, mo komidiro saiki Abera Naramu e.'

⁶ Ina ata Iu urubia komidiro saiki ato Iesu imese gidiai Iu urubia karadabu moto to, taie

nou ro urubia iato imese gitamudiro. Iedi moto ro nato ata dubu iato ta-gomidiro nou tu ubauba dubu e.

⁷ Ina Mose sabi kitamudiro urubia Parasi urubia mutu neio ibose iato ta-gorowomidiro edi moto ro nato. Neio ro Iesu idomari to gemaipirio-rimo ibo etu moro ra nou ro ata mere ata komidiro saiki ato meana ama-owai-ri. Neio ubi ie Iesu ro ata ubauba tanaro ata osioidiro ri taie neio ro nato emowapotai rie ibo oro ro ubauba tanaro osioidiro

⁸ kaupoti neio edi kimaragoidiro ro nou ro ta-gimowea.

Taie nou ro nato gutura iedi tu ubauba dubu ro nou aboto, 'Oro abora dotobowa neio sosoro gabo ato!' Taie edi dubu ro Iesu beda oweru gutura nou ro aise gosioidiro, nou na-gotobowa taie imese gou, neio sosoro gabo ato imese gotobowa.

⁹ Taie Iesu ro nato gutura ibo, 'Nio Parasi urubia daro Mose sabi kitamudiro urubia nio mo ro a-niratodai, nimo komidiro saiki ato sabi ra meamea tanaro kisioidiro o ubauba tanaro ra? Urubia mere keremiro meana emowai ri ra o ubauba emowai ri ra?'

¹⁰ Taie Iesu ro nedi urubia ro neio se giauri na-gorowotoi taie iedi tu ubauba dubu ro nou aboto nato gutura ibo, 'Oro tu neito dotuturai-ro!' Taie iedi dubu ro aise geribua, tu Iesu aboto iato gotuturai-ro, iedi kotuturai ro na-gotuturai-ro iedi tu ubauba ro modobo aise goi ata pokiri iopu tato ie.

¹¹ Taie iedi Parasi urubia ro Mose sabi kitamudiro mutu neio auna ia serawo ro girobai. Neio nakara se iato geremowauti-rimo,

‘Nedi dubu ro nimo ro beda mino to anamadimo-oworohuti-ri?’

Iesu nou 12 kitiodorai urubia giaubai

¹² Iedi tau ro nato Iesu imese gidiai podo ohu to Godi mutu eremowauti ri. Nou iato duwo tuturu ta-gomidirowado Godi mutu geremowauti-rido.

¹³ Taie saiki na-gowaroho nou kowasoro urubia sirio atu moro ato nato gidabuai. Taie iedi tau ro nato nou ro 12 dubu nato aise giaubai, edio 12 dubu ro neio giapoi kitiodorai urubia to, nou neio masiro ie,

¹⁴ Saimoni ata masiro Pita Iesu ro gomia, nou neama Enduru, Iemisi, Ioane, Piripi, Batoromiu,

¹⁵ Mataio, Tomasi, ata Iemisi nou Arapisi mere ie, ata Saimoni, Roma urubia masawe nou ro iaurititi,

¹⁶ Iudasi (ata Iemisi nou mere ie), ina Iudasi nou Kerioti sabowa dubu e, Iesu ido nasa rubi aboto nou ro gapoi.

Iesu ro urubia na-gitamudiro temeteme urubia meana iato giwaititi

¹⁷ Iesu nou kowasoro urubia mutu podo rido ioudo na-giodori-ro, durio goto to na-gereredea-rimo iato aise gororodiobo-rimo Iesu sosoro gabo ato. Ibose urubia imese ta-garadabuti-rimo kaupoti moro to. Nedi urubia ro arua Iudia duriomoro rido gou-rimo, arua Ierusarema sabowa rido gou-rimo. Ibose netewa teibo auna sabowa teibo auna oromo bara ato na-giamo-ma Taia ra Sidoni ra duriomoro ato ibose ioudo ta-gou-rimo.

¹⁸ Neio imese sirio ia se a-gou-rimo Iesu oweru gare emedea ri. Neio ibose ata mabu ato gou-rimo neio edi temeteme ro durupi ato na-iworohutiti-mo, Iesu ro meana iwaititi rie. Etio ra ubauba urio ro na-giworohuti-rimo neio Iesu meana aise giwaititi.

¹⁹ Urubia sirio auna ubi ro giamo Iesu neio ro owaseidiro ri, mabu imese pupuwo korosa nou aboudo gosuruo-ro, neio meana neito giwaititi.

²⁰ Iesu idomari na-giwesegerai kowasoro urubia bato giwotobowa iato gutura neio aboto, 'Nio etio ra namabu tato na-orowomidiro nio ro Godi aboudo meana amadimi-iwia-ri mabu Godi edi kiwabo tanaro ro nio do ie.

²¹ Nio etio ra sogoi ro na-iwati nio ro Godi aboudo meana amadimi-iwia-ri mabu ido nio abato ohona modobomodobo ato ama-iamo-ri.

Nio etio ra abora idobi na-iroto-dumo nio ro Godi aboudo meana amadimi-iwia-ri mabu saiki ata nio gaga kamade mutu amadimi-irorouti-ri.

²² Urubia ro nio ubauba na-iwaititi-dumo daro nio aboto ubauba tanaro na-isioidiro-dumo, nio ro Godi aboudo meana amadimi-iwia-ri. Urubia ro nio sapuwo to ubauba oweru na-warodumo mabu nio ro mo nowasoro-dumo, nio ro Godi aboudo meana amadimi-iwia-ri.

²³ Iedi tau ro nato nio modobo ie auna kamade mutu kererepedu mabu nio Godi aboudo meamea wisa amadimi-iwia-ri Adiri sabowa to namadimo-orowateai-ri. Idaibo ubauba tanaro neio nasaio ro ta-gisioidiro-rimo Godi ipusu oweru urubia aboto. Ina idaibo atu sosoro ubauba tanaro neio ro tisioidiro-dumo nio aboto.

²⁴ Nio etio ra namabu sirio mutu na-orowomidiro auna ia ubauba tanaro nio

aboto ama-ereredeade-ri, mabu nio meana kebase ta-gomidai-rimo, ina nio ro ido ata meana ata omidai-ri pua.

²⁵ Nio etio ra ohona modobomodobo ato na-iamo, auna ia ubauba ro ama-ereredeade-ri nio aboto mabu nio edi tau ro nato sogoi ro ama-iwati-ri.

Nio etio ra gaga na-irorouti-dumo, nio abato ubauba ama-ereredeade-ri, saiki ata nio idobi amadimi-iroto-ri.

²⁶ Nio sapuwo to sirio urubia ro meamea oweru karo ato, nio aboto auna ubauba ama-ereredeade-ri. Mabu neio edi nasaio ro idaibo sosoro meamea oweru ta-garo-rimo Godi ipusu oweru karatigi urubia aboto.'

Oro masawe etio ro iauri-dumo neio aboto meamea tanaro disioidiro

²⁷ Iesu ro urubia ina ibo gimowauti, 'Nio etio ro irowidiro-dumo nedi oweru ro mo ro nama-imowauti-ri, nasa dubu aise gi-adabuti-ri. Nio etio ro ihoio-dumo, modobo ie nio ro meamea tanaro kisioidiro neio aboto.

²⁸ Nio oweru to ubauba etio ro iwaititi-dumo, Godi ba-dararatoro-mo neio nou ro meana ba-miwai. Nio ubauba se etio ro iworohuti-dumo, neio sapuwo to Godi ba-dararatoro-mo.

²⁹ Ibose oro ata dubu ro tawe dao ato na-iatoia, ina derewesegerai ata sapuwo rido iatoia ri. Oro sedo ata dubu ro na-owomidai emowairiai mamu, modobo ato momidai. Ina siginisi ohu rido demotomai.

³⁰ Etu ro orowaro-die ata nakomu ri oro aboto, ematimai mamu aise gi-iomia-ri. Ibose oro edi

namabu ro ata dubu ata ro ubi na-emedea emagege mamō emowameai ri.

³¹ Oro ubi beda sosoro owamo arua urubia ro oro koworohuti aboto, oro ro idaibo sosoro ba-diworohuti.

³²⁻³³ Oro etio ro owarebai-dumo ina neio se nirimagare na-imati, ina neio se na-iwarebai, oro ibo a-imaragoidiro ra Godi ro mea wisa oro aboto amadi-aiwai-ri? Idaibo sosoro tanaro ubauba tanaro urubia ro kisioidiro ie, neio etio ro iwarebai-dumo, wisa neio ro kiwarebai ie.

³⁴ Oro mani urubia aboto na-iaiwō, ina oro ro na-imaragoidiro ibo, “O mo neio ro atu sosoro ibose to namadidime-emowame-ri,” oro ibo a-imaragoidiro ra Godi ro mea wisa oro aboto amadi-aiwai-ri? E e, idaibo sosoro tanaro ubauba urubia ro tisioidiro-dumo, neio mani tiaiwō-dumo amia ubauba urubia aboto, mabu neio ubi ie iedi mani ro ina kimowame aboto.

³⁵ Kaupoti etio ra masawe na-iamo-die oro aboto, wisana oro ro neio nirimagare kimati modobo ie, meamea tanaro se ba-disioidiro neio aboto. Oro edi namabu ro neio ro kiworohuti modobo ie, ina kiwame aboto imaragoidiro mamō. Edi kiwarebai tanaro ro oro ro nama-isioidiro-ri, oro Godi aboudo mea wisa nato ama-iauri-ri. Ibose nedi tanaro ro oro neio ro amadimo-owapotai-ri ibo oro Godi ohu ia ato na-omidiro-die, oro nou ro morobise ia mere to ta-gapoi. Mabu Godi nou auna ia nirimagare ie auna ia ubauba urubia aboto, neio meamea kiwarebai tanaro Godi aboudo kimade kawa kimade ie.

³⁶ Ina modobo ie oro ro arua urubia natonato kimati, mabu ohu ato na-womidiro-die oro

Abera idaibo sosoro natonato tiwawutiti-die urubia aboto.'

Oro nakara se derereauri

³⁷ Iesu ro urubia ina ibo gimowauti, 'Modobo pua arua urubia oro ro kidoromuti. Oro ro neio nama-idoromuti-ri ina Godi ro atu sosoro tanaro ibose to ama-osioidiro-ri oro aboto. Ibose arua urubia ubauba urubia to iasoro mamu. Ina oro ibose Godi ro ubauba to apoi-ri pua. Ibose arua urubia ro beda ubauba tanaro isioidiro-dumo oro aboto, neio edi ubauba ro oro ro woki kimati modobo ie, ina oro edi ubauba ro Godi ro nato ama-ematopeamuti-ri.

³⁸ Oro edi namabu ro arua urubia neito ba-diwarebai, oro ro wisa Godi aboudo ama-iauri-ri. Oro ro namabu masawe tato nama-iaiwo-ri arua urubia kiwarebai sapuwo to, oro Godi ro wisa aise ama-emodiawado-ri sapuwo ama-iretuti-ri. Oro ro beda sosoro iaiwo arua urubia kiwarebai aboto ina iedi gabo ro noudo Godi ro oro aboto ibo amadi-iaiwo-ri.'

³⁹ Iesu ro neio ina iato gimowauti, 'Modobo ra pogo dubu ro boinana pogo dubu kowaguwo? Modobo pua! Neitiro gabo kiauri tato goto bobo to atu se kiretei-ma ie.

⁴⁰ Ibose sikuru mere nou simara kitamudiro dubu mutu atu modobo pua. Kaupoti nedi sikuru mere ro sirio tanaro kitamudiro dubu aboudo umoro nama-oititi-ri, taie nou simara kitamudiro dubu nou edi mako ro nato ama-orobai-ri.'

⁴¹ Iesu ro ina iato gutura, 'Mabu boira oro kimibiria namutuna momoso nou idomari ato na-emeauri, kaupoti oro simara idomari ato ota agagi na-wotoi a-remowea ra?

⁴² Oro ibo utura nou aboto, “Momoso anamadi-ewehai-ri.” Ina oro nakara se ota agagi a-remowea ra?

Nio kimibiria urubia to aratigi-dumo! Oro modobo ie kebase simara idomari rido ota agagi kerewehai. Ido nakara se mea se nato ama-ororowea-ri, ina namutuna idomari rido momoso nato amadi-ewehai-ri.’

Totomu ota iopu sapuwo to

⁴³ Iesu ro ina ibo, ‘Mea ota rido ubauba ota iopu isuwoduti-ri pua, ibose ubauba ota rido meamea ota iopu isuwoduti-ri pua.

⁴⁴ Ota iopu ro, oro umoro kowai ie ibo beda ota rido araubo-die. Urubia ro woimu ota iopu imade-ri pua ununu ota rido. Ibose buni iopu urubia ro imade-ri pua badari ota rido.

⁴⁵ Ina idaibo atu sosoro ie, mea dubu meamea tanaro nou niro turi ato na-iamo ioudo neio ro kosuwoduti ie. Kaupoti ubauba dubu ubauba tanaro nou niro turi ato na-iamo ioudo neio ro kosuwoduti ie. Urubia ro niro turi to beda tanaro kibiti ra, io matagoro rudo neio ro kosuwoduti ie.’

Totomu moto keremari dubu teibo sapuwo to

⁴⁶ Iesu ro ina iato gutura, ‘Mo ro edi oweru ro niarotiti nio ro kisioidiro pua. Ina mabu boira nio ro mo Abera Naramu to na-nasoro-dumo?

⁴⁷ Etu ro oroho-die mo aboto mo oweru na-irowidiro, ina durupi to na-isioidiro

⁴⁸ nou idaibo ie, urubia dubu beda sosoro ra moto na-gididi damera goto ato. Nou posi mea se gimobuti, iato gimowodu koko kiwaititi sapuwo to. Ina iato abata na-gioro-ro surama ro iato egea se gado owaburuti pua, iedi moto ro

koko se gotoi. Mabu edi moto ro nakomu abera ro kididi to ta-gosiodorai.

⁴⁹ Ina etu ro irowidiro mo owera, kaupoti nou ro durupi to isioidiro tato io nou idaibo ie. Ata dubu moto pusuru goto ato gididi, nou ro posi bobo mea se imobuti pua. Abata obo pupuwo to gohau-ro ina edi moto ro koko se otoi pua, aise gowaburuti, posi tima moro ato giamo, oga tima moro ato giamo, edi moto ro imese ubauba ta-gowai.'

7

Iesu ro Roma boso eputa dubu nou edi sowake dubu ro meana gowai

¹ Iesu ro urubia sirio owera kimowauti na-goporeai nou iato imese gohau Kapeniama sabowa to.

² Iedi sabowa ro nato, ata Roma boso eputa dubu nu edi suwake dubu ro, auna temeteme ro gorobai-rimo aupise gowamo karaburai. Iedi Roma boso eputa dubu ro nou ro nu mea woko dubu to asorotiti.

³ Roma boso eputa dubu ro na-girorowai Iesu kou owera, Iu sabowa kiauri urubia iato gitiodorai Iesu ou ri nu sowake dubu meana kowai aboto.

⁴⁻⁵ Iedi sabowa kiauri urubia ro neido na-gou-rimo neio ro Iesu aise gemagege-rimo ou ri edi dubu ro meana kowai sapuwo to. Neio ro ibo, 'Iesu, Roma boso eputa dubu oro ubi emedea-die nu oro ro owarebai rie. Iu urubia nimo nou ro nimatiti-die nirimagare, nou mea dubu e, nimo karadabu moto nou ro nimidi. Modobo ie oro aboudo nou ro mea wisa kowea.'

⁶ Iesu ro na-girorowai edi oweru ro iedi sabowa kiauri urubia ro nou neio aboto aise garadabuai atu se imese gou-rimo. Edi Roma boso eputa dubu ro moto Iesu ro aupiaupi na-gemowaititi, taie edi auna dubu ro nou ro urubia ina iato gitiodorai Iesu aboto neio ro ipi gabo ato emowapotai ri, ibo, 'Nimo auna dubu ibo utura-die Abera Naramu, modobo pua oro kou mo moto to. Mo meana dubu pua, oro neito ou ate mo aboto.

⁷ Mo ia nou ri nomidiro-die ou tato oro aboto. Oweru kawakawa se ba-dutura-ro mo suwake dubu sapuwo to nou meana nato ama-oi-ri.

⁸ Mo umoro ie oro ro modobo ie idaibo tanaro kosioidiro, mabu boso eputa urubia mo aboto ata oweru kutura ato mo ro neio ubi tanaro aise kisioidiro ie, ina ibose mo boso urubia mutu e, ina mo ro kutura ato neio aboto, neio ro edi tanaro ro aise kosioidiro ie. Mo ro ibo kutura ato ata dubu aboto, "Dou!" nou mo aboto aise kou e. Mo ata aboto ibo kutura ato, "Dou-ro!" nou aise kou e. Ina mo ro kutura ato mo suwake dubu aboto, "Nedi tanaro ro dosioidiro!" nou ro aise kosioidiro ie.'

⁹ Iesu ro nedi oweru ro na-girorowai nu auna kimaragoidiro ro gopia iato nu edi urubia sirio ro gobodoro-rimo neio aboto aise gerewesegerai. Nou ro ibo 'Nio mo ro nedi oweru ro nou ri nimowapotai nedi Roma dubu ro auna ia kimibiria dubu e. Isiraere urubia abato, mo ro ata dubu ata nou sosoro owea pua morobise kimibiria mutu.'

¹⁰ Iedi urubia gimeriai boso eputa dubu ro, neio neido na-gorowameai-rimo iedi temeteme dubu ro a-gomidiro meana ta-goi.

Iesu ro pamo osio mere geitorai

¹¹ Tuturu to owamo pua Iesu imese gedei ata sabowa to masiro Naini. Nu ibo pua nakara se kedei, kowasoro urubia ta-garadabuai-rimo ibose auna dubu patu nou saro rido ta-gou-rimo.

¹² Neio ito na-gorowateai-rimo Iesu kodouti magere damo rido neido girarowea pamo osio mere namuturubi ro idobi gemerete-rimo. Ata garamu orobo nou mere kaupoti edi na ro oworohutiti nou ro garaburai. Urubia sirio nedi sabowa ro neido ta-garadabuti edi garamu orobo ro nou aboto. Neio ro edi osio mere ro patapata to aise gowotodai-rimo atu se imese gowosuruwo-rimo idobi mutu,

¹³ Iesu isana kodouti moro rido edi garamu orobo ro nou ro ioudo gowea-ro. Iesu auna ia nirimagare goi nou aboto. Taie nou ro ibo, 'Oro idobi na ie, deremasiai buro.'

¹⁴ Taie Iesu ioudo na-giaubai-ro pamo osio beda patapata ato gowotodai-rimo nou ro iato gowasomai ina edi urubia ro gowou-rimo neio iato aise gotobowa-rimo. Taie Iesu ro ibo edi pamo osio mere ro nou aboto, 'Osio mere oro mo ro abora a-nemowapotai, "Deribua-ro!" '

¹⁵ Taie edi osio mere ro aise geribua-ro owera imese garo iato Iesu ro nou aise gotiodorai simara mamu aboto.

¹⁶ Urubia iato na-gorowotoi neio ro edi tanaro ro na-giauri-rimo neio imese auna ia tere ro girobai. Neio ro Godi iato gemowabu-rimo, ina arua ro ibo garo-rimo, 'Godi edi ipusu owera dubu ro auna ia pupuwo mutu nimo aboto

ta-gorowateai-die! Godi nou simara urubia giraturioma-die.'

¹⁷ Taie Iesu ro odio tanaro ro na-gisioidiro nou sapuwo to oweru imese nato gorobodorouti Iudia duriomoro gebari ato ibose arua sabowa gomo ato na-giamo nedi oweru neio ro ta-girorowai-rimo.

Ioane ro gemodowa Iesu

¹⁸ Ioane edi kowasoro urubia ro Ioane iato gemowauti-rimo ibo Iesu ro beda tanaro sirio gisioidiro.

¹⁹ Nou ro netewa teibo kowasoro dubu teibo iato gimeiriai-ma Iesu aboto ou ri kararatoro oweru mutu. Nou ro ibo, 'Nedi karatoro oweru ro ba-dowou-do Iesu aboto, "Oro nou se ra Godi ro kohodowa dubu, o nimo ro ata dubu ata emotoi-ri ra?" '

²⁰ Taie iedi dubu teibo ro iato gou-rido Iesu aboto karatoro oweru mutu. Iesu aboto na-gorowateai-rido neitiro ro ibo, 'Neitiro Ioane obo to edi dubu ro iwarumiautiti neitiro nou ro nimeiriai-madie oro aboto oro emodowa ri. "Oro Godi ro kohodowa dubu nou se ra o ata dubu ata emotoi-ri ra nimo ro?" '

²¹ Iedi tau ro nato Iesu ro urubia sirio temeteme aboudo meana ta-giwaititi, idaibo idomari pogo urubia nou ro idomari meana ta-gimowaititi. Ibose ubauba urio edio urubia abato na-gorowomidiro nou ro aise giwagarewado.

²² Taie Iesu ro ibo iedi dubu teibo neitiro aboto, 'Mo ro beda tanaro nisioidiro ina ibose beda oweru nimowauti nitiro ro simara idomari to ta-iauri-do ina simara gare to ta-irowidoro-do.

Nitiro abora ba-dorowameai-do Ioane ba-demowauti-do. Idomari pogo urubia abora modobo ato tirarowo-dumo, sairo ubauba urubia, neio abora modobo ato toroho-dumo, katio gebarigebari urubia na-irohotiti-dumo abora katio pua ie. Ibose gare koropai urubia neio abora oweri mea se tirowidiro-dumo, pamo urubia abora torowomidiro. Ibose mo ro mea oweri dorogora se urubia ta-nimowautiti.

²³ Etio ra karagare tato mo edi kowasoro gabo ro neido neio Godi ro korosa ama-imio-ri.'

²⁴ Taie Ioane edi kowasoro dubu teibo ro Iesu neitiro ro aise gemeserai-rido, ina Iesu ro urubia iato gimowauti Ioane sapuwo to. 'Nio goto se duriomoro to na-iredutiti-mo etu iaurititi-mo? Nio ro gurigo daimo nou a-wiaurititi-mo ra gawia ro na-iwadudumawadotiti? E e.

²⁵ Ina nio ro iato etu iauri-mo, ata dubu meamea namabu to keremeduti nou a-iaurititi-mo ra? E e, nou pua mabu urubia etio ra meamea namabu mutu neio irowomidiroiti eputa urubia awawo moto ato.

²⁶ Kaupoti nio ito na-iredutiti-mo goto se duriomoro to etu iaurititi-mo? Godi ipusu oweri dubu ra? Io morobise ie, nio ro nou iaurititi-mo. Kaupoti nio mo ro mimowapotai-ro Ioane nou arua Godi ipusu oweri urubia sosoro pua.

²⁷ Ioane sapuwo to tagara tau ato Godi ipusu oweri dubu Marakai ro oweri ta-gisioidiro ibo *Keba moro to mo ro anama-emeiriai-ri ata dubu, oro gabo nou ro ama-emaipo-ri.*

²⁸ Ina mo ro a-nimowapotai nedi tau ro nato, Ioane nou ata auna dubu e, ibo pua arua urubia na-irowomidiroiti nou neio sosoro pua, nou ata

sosoro ie. Kaupoti Godi edi kiwaboi tanaro maumo ro nato, dorogora urubia to na-wararasoro-dumo edi urubia ro neio imese awawo masiro urubia ie, neio ro Ioane sopu to amadimi-iauri-ri.'

²⁹ Taie takesi kimade urubia arua urubia mutu, neio ro nedi owera ro na-girorowai-rimo Iesu aboudo neio ro ubi to aise gomidai-rimo. Neio ro ibo, 'Godi edi gabo ro morobise gabo ie.' Neio ro ibo garo-rimo mabu keba se nedi urubia ro Ioane ro obo to ta-giwarumiauti.

³⁰ Kaupoti Parasi urubia daro Mose sabi kitamudiro urubia keba se neio ubi tato goi-rimo Ioane ro neio obo to kiwarumiauti aboto. Neio ubi tato na-goi-rimo, Godi edi ubi gabo ro neio simara sapuwo to idaibo mino to a-gebeiouti-rimo.

³¹ Ina Iesu ro ibo, 'Mo ro beda owera to nama-imowapotai-ri nio abora na-orowomidiro nio sapuwo to?

³² Nio abora beda sosoro orowomidiro nio nama-iwauti-ri. Abora nio merebusere kainakaina sosoro ie karakarau moro ato irowomidiro nio abora ibo orowomidiro. Merebusere ibo irororu-dumo, "Nimo ro pate ra gama ra na-niadotiti-mo nio orowamaro-ri pua, ibose nio nimo ro gido na-nimabodutititi-mo nio idobi nato iroto-ri pua." Ina atu sosoro ie nio sapuwo to.

³³ Mabu Ioane koko obo idiotiti pua, ibose ohona aise iraiautiti, ina nio nou ri iarotiti-mo ibo, "Ioane ubauba urio ro oworohutiti."

³⁴ Imese Urubia Kiauri Dubu mo nou se ie. Mo ohona ti-nihotiti arua urubia beda sosoro ihotiti-dumo, daro mo koko obo egea mere se

ti-nidiotiti. Ina mo sapuwo to nio ibo taro-dumo, “Nedi dubu ro ma-diauri-mo, auna sogoi dubu e, auna kidio dubu e! Nou auna kidabuti ie takesi kimade urubia mutu, ibose arua ubauba urubia mutu.”

³⁵ Kaupoti Godi edi muro ro etio ro ibodoro-dumo neio ro kiwawuti ie ibo morobise muro nou se ie.’

Ata orobo ro gemowiouti Iesu sairo teibo

³⁶ Ata Parasi dubu ro gutura Iesu nou mutu iho ri. Taie, Iesu imese gou edi Parasi dubu ro nou moto to, iato aise gomi ohona iho ri.

³⁷ Edi sabowa ro nato ata ubauba tanaro kisioihiro orobo iato imidirotiti, nou ro ta-girorowai ibo Iesu Parasi dubu moto ato ohona tiho-die. Iesu isana a-giho iedi moto ro nato, taie iedi orobo ro nato gou-ro nou aboto mea nibo dehero botoni mutu.

³⁸ Iedi orobo ro Iesu abato aise gotobowa idobi se gememai. Taie Iesu iedi sairo teibo ro nou ro idobi suwo to iato gemowiouti ina sobo to iato gewipiti, ibose Iesu sairo teibo kamade mutu giohihiro-ma. Nou ro edi nibo dehero ro gowou-ro sairo teibo nouto aise gemadiriti.

³⁹ Iedi moto abera ro nou ro nato giauri edi tanaro ro gororosioihiro-rimo Iesu aboto, nou iato auna kimaragoihiro ro gopia. Nou ro ibo kimaragoihiro to, ‘Iesu Godi ipusu oweru dubu rasiri ie, nu umoro a-sowamo ibo nedi orobo ro owasomai ata ubauba orobo ie, nou ro emaidodorai-ri pua.’

⁴⁰ Iesu ro ibo nou aboto, ‘Saimoni, mo ata oweru towamo oro kemowapotai aboto.’

Taie Saimoni ro ibo, 'Io kitamudiro dubu ma-demowapotai-ro.'

⁴¹ Iesu ro ibo, 'Netewa teibo dubu teibo ro mani doro to auna mani dubu aboudo gimade-rido. Ata dubu ro a-gimidai K500, ina ata dubu ro a-gimidai K50.

⁴² Nedi dubu teibo ro modobo pua mani abera kemowameai. Kaupoti mani abera ro neitiro teibo ibo gimowapotai-ma, "Marasio mo mani nitiro ro emowameai ate."'

Ina Iesu ro Saimoni ibo gemodowa, 'Auna nirimagare etu ro gowapotai mani abera aboto?'

⁴³ Ina Saimoni ro ibo, 'Mo ro ibo a-nimaragoidiro etu ro gomidai auna to nou ro gowapotai auna nirimagare mani abera aboto.'

Iesu ro ibo, 'Oro ro morobise ower aro-die.'

⁴⁴ Iesu ina aise gerewesegerai iedi orobo ro nou aboto, taie Saimoni aboto iato gutura, 'Nedi orobo ro oro ro ma-dowe a. Mo neito na-nou-die oro moto to, mo sairo kiwiouti obo oro ro emedea pua. Kaupoti nedi orobo ro mo sairo teibo idobi suwo to nou ro nemowiouti ina sobo to iato newepiti.

⁴⁵ Mo oro ro kamade mutu ohiai pua. Kaupoti mo sairo teibo ato nedi orobo ro nou ro kamade mutu aise nohidiro.

⁴⁶ Mo neito na-nou-die mo eputa dehorro to oro ro emadiriti pua, mo sairo teibo nou ro auna wisa nakomu to nemadiriti.

⁴⁷ Oro mo ro a-nemowapotai nedi orobo ro beda mutu ubauba ra mo ro ta-nematopeamuti. Nedi tanaro ro nou ro na-wosioidiro paea se osioidiro-die nu auna ia nirimagare owapotai-die mo aboto. Kaupoti ubauba tanaro

kainakaina etio ro isioidiro-dumo ina Godi ro nato na-imatopeamuti, nedi urubia ro neio ro mo nirimagare auna se ematiti-ri pua.'

⁴⁸ Taie Iesu ro nedi orobo ro nou aboto nato gutura 'Abora oro mo ro ubauba ta-nematopeamuti.'

⁴⁹ Iedi urubia ro na-gorowomidiro kiho moro ato neio nakara se iato geremowapotaaidiro-rimo ibo 'Nou beda dubu ra, nou ro beda sosoro kimatopeamuti ra ubauba?'

⁵⁰ Taie Iesu ro iato gutura edi orobo ro nou aboto ibo, 'Oro ubauba aboudo ta-napopo-ro mabu oro kimibiria mutu e. Abora dorowameai miro maumo ato ba-dimidirotiti.'

8

Iesu beda mamio ro gowarebai-rimo

¹ Arua saiki na-gororoporeai-rimo Iesu ro nato giraturio awawo sabowa, kainakaina sabowa, nu na-goroho nou ro urubia iato gimowauti Godi ro kiwaboi tanaro beda sosoro owamo. Nu 12 kowasoro urubia mutu atu se goroho-rimo,

² ina amia mamio ibose ta-garadabuai-rimo Iesu aboto. Neio keba se temeteme ro na-iwatiti neio meana Iesu ro giwaititi, ibose beda mamio aboudo gimabodoidiro ubauba urio neio ibose ta-garadabuai-rimo. Nedi mamio ro neio ie: Maria Magadarena, nedi orobo ro Iesu ro nou aboudo gimabodorai 7 ubauba urio,

³ ina ata orobo Ioana nou Kusa orobo ie (Kusa eputa dubu Herodi, mani nou ro emeaurititi). Ina ata orobo Susana, daro amia mamio neio ibose ta-garadabuai-rimo, nedi mamio ro Iesu

nou kowasoro urubia mutu mani to neio ro iwarebidiro-mo.

Erere goto sapuwo to nou totomu e

⁴ Ata tau Iesu aboto urubia sirio nato garadabuti-rimo. Nedi urubia sirio ro sabowa gabogabo rido goroho-rimo. Taie Iesu ro neio nedi totomu ro nato gimowauti,

⁵ ‘Ata pari kisioidiro dubu ro ota iopu nato giheruti goto ato. Ota iopu nou ro edi kiheruti ro na-giheruti arua ota iopu dorogora se gabo bara ato gararemuti-rimo. Gabo bara ato edi na ro gararemuti-rimo, urubia goto ato na-goroho-rimo edi ota iopu ro neio ro aise gituti-rimo, iato pawa ro giroruwo-ro, iedi ota iopu ro neio ro aise giwadaudi-ro-rimo.

⁶ Amia ota iopu nou ro na-giheruti nadi goto ato gararemuti-rimo. Iedi ota iopu ro neio na-gisuruo-rimo, iato aise gorowaburai-rimo mabu nadi goto ato obo tato ie.

⁷ Ina arua ota iopu neio ununu ota sere maumo to giretuti, nedi ota iopu ro ibose neio mea se ta-gisuruwo-rimo, kaupoti edi ununu ota sere ro neio mea se kosuruwo moro rido aise giwasiouti-rimo.

⁸ Kaupoti sipu tato edi na gararemuti-rimo mea goto ato nedi ota iopu ro neio ro gisuwoduti-rimo mea se, arua ota rido ota iopu imese sirio ia se gisuwoduti-rimo.’

Iesu ro owera neito gopai, ‘Etio ra mo owera modobo ato kirowidiro aboto, neio ro mo owera gare se ba-memedea-rimo.’

⁹ Taie nou kowasoro urubia ro nato gemodowa-rimo, 'Nedi totomu ro oro ro na-worowauti nu maumo beda sosoro ra?'

¹⁰ Iesu ro neio neito gimowameai, 'Godi ro kiwaboi tanaro keba se piro se ta-gowamo mo ro abora paeapaea ta-niwai nio aboto. Kaupoti arua urubia mo ro neio totomu se nimowautiti mo ro nedi tanaro ro nou ri nisioidiro, *ina noudo ie neio ro kowea ie, kaupoti neio ro eibimai-ri pua. Ina ibose owera neio ro kirowidiro ie kaupoti maumo neio ro meana se imade-ri pua.*

¹¹ Nedi totomu ro maumo ibo ie. Ota iopu ro Godi owera iwapotaidiro-die.

¹² Beda ota iopu ro gararemuti-rimo gabo bara to, idaibo urubia imabuti etio ro irowidiro-dumo Godi edi mea owera ro, ina iato Satani ro kou e neio niro turi rido nou ro aise kiwagareawado ie. Ina nedi owera ro neio ro modobo pua mea mino to kimibiria, neio ro mea mino to kimibiria rasiri ie, neio Godi ro ubauba aboudo kiwagarewado ie.

¹³ Ina beda ota iopu ro gararemuti-rimo nadi goto ato urubia ro neio imabuti-die. Neio ro Godi owera kirowidiro ie kamade mutu kimade ie, kaupoti neio sipi maumo to mea mino to iwodouti-ri pua. Neio tuturu tau to imibiria-ri pua. Ina neio aboto beda koko tau ro kou ra neio Godi edi mea gabo ro ioudo aise karaseperai ie.

¹⁴ Ina beda ota iopu ro gararemuti-rimo ununu ota sere abato, idaibo urubia neio imabuti-die. Neio ro Godi owera kirowidiro ie mea mino to kimade ie, kaupoti nedi urubia ro neio kimaragoidiro sirio duriomoro tanaro ato kiamo ie. Nedi tanaro sirio ro neio ro kimohuti

ie kiroromai moro rido. Ina neio aboudo meamea ota iopu isuwoduti-ri pua.

¹⁵ Kaupoti beda ota iopu ro gararemuti-rimo mea goto ato, iedi goto ro idaibo urubia neio imabuti-die. Nedi urubia ro Godi owera morobise giropu to neio ro gimibiria-rimo. Neio ro Godi edi ubi tanaro ro aise kisioidiro ie ina ipi ato ororodiobo-ri pua, womu tato meamea tanaro nou ro paea se kiwawuti.'

Oro abato beda umoro ro owamo dowawuti

¹⁶ Ata totomu Iesu ro nou gorowauti 'Oro erempa kowateai ato edi erempa ro oro ro ata nakomu to owasiai-ri pua. Nedi erempa ro oro ro kenene ato paea se kakoka ie. Etu ro kodoro ra edi woroworo ro nato nou ro namabu mea se kiauri ie.

¹⁷ Piro se na-iamo paeapaea amadimo-oi-ri. Ibose piro se na-giatumuti-rimo saiki woroworo ro ama-iwaroho-ri.

¹⁸ Mea se! Oweru beda mino to kirowidiro ra modobo ie oro nakara se mea se keremowotoi, owera mea mino to kirowidiro aboto, ina umoro mea se kimade aboto. Mabu etio abato iamou umoro Godi edi mea owera ro nou sapuwo to, neio aboto ina amia umoro ohu rido Godi ro ama-imotomo-ri. Kaupoti etio ro gimidiai-rimo egea mere se umoro Godi edi mea owera ro nou sapuwo to neio ibo na-imaragoidiro-dumo "neio modobo ie, neio abato umoro tiamo", edi urubia ro neio aboudo edi umoro kainakaina ro na-iamo Godi ro ama-iwatateai-ri.'

Iesu morobise mamu daro niramio etio ra

¹⁹ Iesu mamu daro niramio na-gou-birimo nou aboto, kaupoti nou auna ia topira maumo ato gomidiro, neibi ro kowea aboto modobo pua.

²⁰ Amia urubia ro gemowapotai-rimo Iesu ibo, 'Oro mamu daro niramio moto araradi ato totoi-diebimo, neibi ubi ie oro kowea.'

²¹ Taie neibi Iesu ro ibo gimowapotai-bi, 'Godi edi mea owera ro etio ro irowidiro-dumo ibose durupi to na-isioidiro-dumo io neio mo ia mamio ie ibose mo ia niramio ie.'

Iesu ro surama ra bukupu ra a-giadibiai-ma

²² Ata saiki Iesu kowasoro urubia mutu pe to na-giora-rimo taie nou ro ibo, 'Nimo ito ma-miabu-rimo obo paruo ata sapuwo to.' Taie neio sawa na-gemobodorai-rimo imese giabu-rimo.

²³ Neio edi kiabu ro na-giabu-rimo Iesu iato norou aise gutuwa. Nou norou na-gorobu tuturu to pua surama na-gihudurai-ro obo ato gororosowa-ro bukupu samo to giriribua-rimo. Edi pe ro bukupu sapuwosapuwo rido gorowiti-rimo aupise ie kimarumo.

²⁴ Taie neio iato gorowadodoro-rimo Iesu norou maumo rido amutia ri, 'Auna dubu oro deribua-ro nimo etou ri nimaauriai-die obo to iroruwo-ri ra?'

Taie Iesu norou maumo rido ioudo na-geribidiro-ro, nou ro surama ra bukupu ra nato gimadowerai-ma, 'Nitiro abora dorodiobo-do!' Taie nou ro edi kutura ro na-gutura ororodiobo ri surama ra bukupu ra aise geremasiai-rido, edi obo paruo ro imese gasio ia se gemowadau ata bukupu tato ie.

²⁵ Taie Iesu aise gerewesegerai kowasoro urubia aboto nou ro ibo, 'Nio kirorowai boira?'

Iesu owera neio ro na-gemororowai-rimo neio tere ro aise girobai. Neio ro auna se gimaragoidiro-rimo nou ro edi tanaro gosioidiro. Taie neio ro ibo, 'Nu beda dubu ra? Nou ro idaibo owera kutura ato egea nakomu aboto tanaro aise kororosiodiro ie. Nou ro surama ra bukupu ra aboto na-utura neitiro ro aise irorowai-do!'

Urubia dubu ubauba urio ro goworohuti-rimo

²⁶ Iesu kowasoro urubia mutu sawa pe to imese giabu-rimo Gariri obo paruo ata sapuwo to Gerasa duriomoro bato gowamo.

²⁷⁻²⁹ Neio ito na-gorowateai-rimo Iesu pe rido keba se gerepeduai. Ata kawakawa dubu nedi sabowa ro neido ie nu dorogora moro ato imidirotiti Iesu nou ro na-gowea nou ro ioudo gema-a-ro. Iedi dubu ro ubauba urio sirio nou niro goro ato irowomidirotiti. Tuturu tau to nedi dubu ro porose se imidirotiti pamo urubia boba abato. Nou moto ato imidirotiti pua. Sirio tau nedi dubu ro ubauba urio ro aise ememidirotiti-mo, neio ro emesera i pua. Nou urubia ro tu ra sairo ra seni to egea se kemotohiti ie, kaupoti seni nou ro aise iasioutiti ina goto se duriomoro to neio ro iato kewedei ie.

Nedi dubu ro Iesu nou ro na-gowea-ro nu ioudo giaea-ro auna ia se, goto ato aise gereteamoidiro Iesu sairo mabu ato. Nou auna se ioudo giaea-ro Iesu aboto, 'Mo umoro ie oro! Iesu oro ro etou tanaro amadi-osioidiro-ri mo aboto? Abera Naramu ohu ato na-omidiro-die

oro nou mere ie! Mo oro ro ubauba owai ate!
Ubauba urio ro nou ri gutura mabu Iesu ro
a-gimadowerai iedi dubu ro nou aboudo
osuruwo rie.

³⁰ Taie nedi dubu ro Iesu ro nato gemodowa,
'Oro masiro etu ra?'

Ina nou ro ibo, 'Sirio mo masiro ie.' Mabu
ubauba urio sirio ia se irowomidirotiti nou
abato.

³¹ Taie nedi ubauba urio sirio ro Iesu aboto
binio to iato gutura-rimo, 'Nimo oro ro imeiriai
ate era paruo to, ata moro to dimeiriai-ro!'

³² Podo gawagogo ato giro sirio ohona
geremosora-rimo. Ubauba urio ro ibo, 'Nimo
giro niro turi to dimeiriai-ro.'

Taie Iesu ro nedi tanaro ro ororosioidiro ri
gabo aise

³³ gimapoi. Giro sirio beda ipi ato goroho-rimo
neio niro turi to na-gorowateai-rimo iato edi
dubu ro neio ro aise gemeserai-rimo. Taie edi
giro sirio ro imese gorowodori-rimo damera
gawagogo rido obo paruo to neio sirio se imese
obo ro aise giopia.

³⁴ Taie edi giro kimowotoi urubia ro neio ro
nedi tanaro ro na-gowea-rimo neio tere ri aise
gorowadau. Neio ro nedi owera ro iato
gobodorouti-rimo erere duriomoro ato,

³⁵ ibose aupi sabowa urubia ta-gou-rimo nedi
tanaro ro na-gororosioidiro nou iauri ri. Neio
Iesu aboto na-gou-rimo iedi dubu ro modobo ato
gomidiro Iesu gomo ato. Nou obotama
ta-gowori-rimo nou mutu gomidiro. Nou
kimaragoidiro patu mea mino to
ta-gorowameai-rimo mabu ubauba urio sirio

nou aboudo ta-gosuruwo-rimo. Beda urubia ro gou-rimo iedi dubu ro iauri ri neio tere ro giwati.

³⁶ Ina beda urubia ro giauri-rimo nedi tanaro ro na-gororosioidi-ro-rimo neio ro Iesu sapuwo to urubia aise gimowauti-rimo, Iesu ro beda sosoro to gowai nedi dubu ro meana.

³⁷ Gerasa duriomoro urubia ro Iesu nou mabu ato gebeiouti-rimo ioudo aragare ri. Neio ro ibo, 'Oro nato omidi-ro ate dorowameai neido simara sabowa to!' Mabu neio tere ro giwati.

Taie Iesu pe to na-gorora kowasoro urubia mutu imese giabu-rimo Gariri obo paruo ata sapuwo to.

³⁸ Ina edi dubu ro Iesu ro meana na-gowai nu Iesu aboto aise gararaipirio-ro. Kaupoti nou Iesu ro simara sabowa to gemeiriai. Nou ro ibo,

³⁹ 'Oro ba-dorowameai simara sabowa to urubia ba-dimowauti Godi ro beda tanaro osioidi-ro-die oro aboto.' Taie edi dubu ro Iesu ro beda oweri to gemowapotai nou ro aise gosioidi-ro, simara sabowa urubia nou ro iato gimowauti Iesu ro beda tanaro gosioidi-ro nou aboto.

Iesu ro giwai-ma meana pamo besere, ata temeteme orobo mutu

⁴⁰ Iesu ta-gorowameai-ro Gariri obo paruo ata sapuwo rido urubia sirio ta-gemahaudi-ro-ro nou gemotoi-rimo kamade emowai rie.

⁴¹ Ata dubu masiro Iairo nato gou-ro Iesu aboto, nu ata eputa dubu e nou ro iaurititi lu urubia karadabu moto. Iairo ro na-gowea Iesu, nu iato kauhio to aise girimusubua Iesu sairo mabu ato. Taie Iesu nou ro iato garamairiai-ro

neitiro atu se ou ri nou moto to, 'Oro aise kou modobo ra mo moto to?

⁴² Mo besere kaupoti ia ie, nu abora 12 kisimisi ie. Nou auna ia temeteme ro owati aupise ie karaburai.'

Taie Iesu Iairo mutu aise gou-rido nou moto to, ipi ato urubia sirio ro nou sapuwosapuwo rido gemohutauti-rimo.

⁴³ Edi topira ro nou maumo ato, ata orobo ta-garadabuai-ro. Nedi orobo ro 12 kisimisi ta-giporeai durupi tama rido auna karima ro ororuwotiti-ro, ina nu ata ro meana nato owai pua.

⁴⁴ Nedi orobo ro topira maumo rido gosuwoidiro urubia ro owea pua huru rido gateai-ro nou ro Iesu obotama gare nato gemowasomai. Iedi kemowasomai ro na-gemowasomai, nou karima egenabo aise gororodiobo.

⁴⁵ Iesu ro ibo, 'Mo etu ro nowasomai-die?'

Ina urubia sirio ro nu ibo gemowameai-rimo, 'Nimo umoro pua, oro nimo ata ro owasomai pua.'

Ina Pita ro ibo, 'Auna dubu, oro ro ma-diauri dubu patu imese auna ia ie, urubia aise ororohoiouti-dioumo. Oro neio ata ro ta-emowasomai obotama.'

⁴⁶ Taie Iesu ro ibo, 'Morobise ie mo ata ro nowasomai-die, mo nakara se umoro ta-noi mabu mo aboudo pupuwo korosa ta-wosuruwo.'

⁴⁷ Iedi orobo ro ta-geremasibai nu modobo pua korowopirowa. Nou ro ibo, 'Iesu mo ro nowasomai.' Nou iato soro korowamaro gou-ro Iesu sosoro gabo ato kauhio teibo to aise

gorodiriti. Iedi orobo ro urubia sirio nou ro iato gimowauti etou mabu ato gemowasomai Iesu obotama, ibose nou ro iato gimowauti nou karima beda sosoro gororodiobo nou aboudo.

⁴⁸ Taie Iesu ro ibo edi orobo ro nou aboto, 'Urubia orobo, ba-dorowameai oro meana ta-woi mabu oro kimibiria mutu e. Miro oro abato aise ba-mowamotiti.'

⁴⁹ Ina Iesu ibose to geremowagomea, iato ata dubu ro girario-ro Iairo moto rido. Nou ro ibo, 'Auna dubu oro besere ta-wotobowa, kitamudiro dubu neito owou ate, nou amadi-orowagumaidiro-ri.'

⁵⁰ Kaupoti Iesu ro na-girorowai nedi owera ro nou ro ibo Iairo aboto, 'Oro ata kimaragoidiro na ie, aise dimibiria, nou meana ama-oï-ri.'

⁵¹ Iesu odio tau ato na-gorowateai Iairo moto to nou ro Pita, Ioane, Iemisi neibi se gidabuai-ibi besere ia mamu ra abera ra mutu neibi atu se imese godoro-birimo.

⁵² Urubia sirio iato na-gorowomidiro neio idobi diamo ro garo. Edi urubia ro giroto-rimo idobi, Iesu ro iato gimadohodai ibo, 'Nio idobi na ie! Besere kainai norou orobu. Nou pamo pua.'

⁵³ Urubia ro na-girorowai-rimo neio ata sosoro kimaragoidiro giwia-rimo iato neio ro nu gaga gemororouti-rimo. Neio umoro ta-goï-rimo iedi besere ro morobise pamo ia ie.

⁵⁴ Kaupoti edi besere ro Iesu ro tu rido na-gorobai-ro nou ro iato gamutia, 'Mona ia mo besere, deribua.'

⁵⁵ Taie iedi besere ro urio aise gorowameai-ro durupi mamu aboto, iato aise geribidiro-ro.

Iesu ro mamu ra abera ra owera iato gimowapotai-ma, 'Ata kouho nakomu ata domia-do.'

⁵⁶ Mamu ra abera ra ro na-gowea-rido nedi tanaro ro neitiro auna ia se gimaragoidiro-rido. Ina neitiro Iesu ro koko owera iato gimowapotai-ma ibo, 'Abora nedi tanaro ro na-wororosioiro nitiro ro urubia imowauti ate!'

9

Iesu ro 12 kowasoro urubia gitiodorai

¹ Iesu ro 12 kowasoro urubia iato gidabuai atu moro to taie nou ro pupuwo korosa nato gimia, neio ro isioidiro ri pupuwo korosa tanaro. Idaibo temeteme urubia neio ro meana kiwaititi aboto, ina ibose erere ubauba urio neio ro imabodoidiro ri urubia aboudo.

² Taie neio Iesu ro iato gitiodorai urubia imowauti ri Godi ro kiwaboï tanaro beda sosoro owamo, ibose temeteme urubia meana iwaititi ri.

³ Neio Iesu ro iato gimowauti, 'Nio namadimo-ou-ri namabu tato ba-dou-mo. Nedi namabu ro nio ro iwou ate, kiradiouti gonopu, bukio, dokou, mani ibose kiroidiro namabu.

⁴ Nio namadimo-ou-ri beda moto rido kiramairiai ra, iedi moto ro iato se gi-orowomidiro-ri womu tato edi sabowa ro nio ro na-emeserai-dumo.

⁵ Nio ata sabowa urubia ro kiramairiai tato iedi sabowa ro aise gi-emeserai-ri, sairo panese se gi-imahudumai-ri neio umoro koi sapuwo to ibo morobise ie nimo Godi aboudo ubauba wisa anamadimi-iwia-ri.'

⁶ Nedi kowasoro urubia ro imese gaimai-rimo, sabowa gabogabo goroho-rimo urubia iato gimowauti-rimo mea oweru Iesu sapuwo to. Neio ro ibose temeteme urubia meana ta-giwaititi-rimo.

Herodi ro Iesu a-waratititi nou etu ra

⁷ Herodi Gariri duriomoro eputa dubu e, nou ro na-irowidiro Iesu ro edi tanaro ro na-isioidiro nu a-iradorutititi kimaragoidiro mutu. Amia urubia ro ibo iarotiti-mo, 'Iesu nu Ioane ie obo to kiwarumiauti dubu ina bobo rido ta-geribua-die.'

⁸ Ina arua ro ibo iarotiti-mo, 'Iesu nu Eraia ie nou ro gorowameai-die nimo aboto.' Ibose arua urubia ro ibo, 'Iesu nu Godi ipusu oweru dubu e keba ia tau ato na-irowomidiro neio ata ro gorowameai-die.'

⁹ Kaupoti Herodi ro ibo, 'Ioane mo oweru to ta-garia-rimo ina nedi oweru ro mo ro beda dubu sapuwo to nirowidiro?' Herodi auna ia ubi ro owamotiti Iesu sosoro kowea.

Iesu ro auna topira gebari ohona to na-giwarebai

¹⁰ Iesu kowasoro urubia na-gorowame-rimo erere sabowa rido, neio ro edi tanaro gisioidiro-rimo, Iesu aboto iato giwauti-rimo. Ina neio ioudo Iesu ro ata sabowa to aise gioupiriai, sabowa masiro Betesaida neito gou-rimo. Iesu ubi ie neio atu se aradabuai ri nakara moro ato.

¹¹ Kaupoti urubia umoro ta-goi-rimo Iesu kowasoro urubia mutu beda moro to gou-rimo, ina Iesu neio ro saro rido aise gobodoro-rimo. Taie Iesu ro neio na-giwa nou ro kamade mutu

aise giramairiai ina nou ro iato gimowauti Godi ro kiwaboi tanaro sapuwo to. Etio ro gou-rimo temeteme mutu Iesu ro meana aise giwaititi.

¹² Saiki ta-goriodidiro adimo ro gereredea-ro, Iesu aboto 12 kowasoro urubia nato gou-rimo, neio ro ibo, 'Nedi moro ro urubia mutu moro pua, nedi urubia ro ba-ditiodorai, neio aupi sabowa to morowame-mo, iato ba-mirobu ohona simara mani to ba-meremamade-mo.'

¹³ Ina Iesu ro nato gutura 12 kowasoro urubia aboto, 'Ina nibi ia ro modobo ie nedi urubia ro ohona to kiwarebai.'

Kowasoro urubia ro ibo, 'Neibi abato 5 dokou koura, nakere koura teibo mutu neibi ro iamo-ibi taie nou se ie. Ina oro beda sosoro imaragoidiro nedi urubia sirio ro neio sapuwo to, ohona nimo ro imamade-ri ra?'

¹⁴ Dubu kawakawa kioputi ato imese 5,000.

Iesu ro iato gimowapotai nou kowasoro urubia, 'Urubia ibo ba-diwomititi-mo ata soirio 50, ata soirio 50.'

¹⁵ Iesu oweri gabo modobo kowasoro urubia ro urubia iato giwomititi-rimo.

¹⁶ Taie Iesu ro 5 dokou koura nakere koura teibo mutu iato gimidai, toboro to na-gawota eso oweri iato garo ohona sapuwo to. Taie Iesu ro dokou nakere mutu na-gisebuti kowasoro urubia aboto iato giaiwo, urubia soirio gabogabo neio ro imoworoho ri.

¹⁷ Urubia sirio edi ohona ro na-giho-rimo neio imese modobo ta-goi-rimo, ata erihe pua. Neio aboudo edi ohona sapuwo ro na-geremeserai-rimo kowasoro urubia ro 12 gatere nou giodiawado-rimo.

Iesu nou Godi ro kohodowa dubu nou se ie

¹⁸ Ata tau Iesu nakara moro to na-gou Abera Godi aboto araratoro ri, kowasoro urubia nou aboto nato gou-rimo. Neio nou ro nato gimodowa, 'Mo urubia ro etu to nasoro-dumo?'

¹⁹ Ina kowasoro urubia ro ibo, 'Arua ro ibo aro-dumo oro Ioane ie obo to edi dubu ro iwarumiautiti oro nou e. Ina arua ro ibo aro-dumo oro Eraia ie, ina arua ro ibo aro-dumo oro Godi ipusu owera dubu e keba se edi urubia ro na-gorowomidiro, oro neio ata ro gorowameai-die.'

²⁰ Iesu ro neio ina iato gimodowa, 'Kaupoti ina nio ia beda sosoro imaragoidiro-dumo, mo nio ro etu to nasoro-dumo?'

Ina Pita ro ibo gemowameai, 'Oro Godi ro kohodowa dubu nou se ie.'

²¹ Taie Iesu ro neio koko owera iato gimia, 'Nio ro urubia imowapotaiddiro ate!'

Iesu pamo kowea sapuwo to urubia nou gimowauti

²² Iesu ro nou kowasoro urubia ibo gimowauti, 'Imese Urubia Kiauri Dubu mo nou se ie. Mo saiki ata Iu duriomoro kiauri awawo urubia ro, Godi ra urubia ra turituri awawo urubia mutu, ibose Mose sabi kitamudiro urubia, mo neio ro ubauba mino to anamadimo-oworohuti-ri. Mo neio ro anamadime-ebeiouti-ri, ibose mo neio ro anamadimo-opia-ri, ina netewa didi saiki nama-orobai-ri mo Godi ro pamo rido anamadi-owameai-ri.'

²³ Iesu ro sirio urubia aboto iato gutura, 'Etio ra ubi na-iamo mo kobodoro aboto neio simara durupi nakara se eremaragoidiro-ri pua, neio ro

simara ubi tanaro isioidiro-ri pua. Ibose neio ro modobo ie saiki gabogabo ato Godi ubi tanaro se kisioidiro, ina pamo kowea nou sapuwo to, io modobo ia ie, ina mo saro rido kowasoro.

²⁴ Mabu etio ra simara durupi sapuwo to na-eremaragoidiro-dumo, neio edi keremiro ro saiki ata amadimi-iaseperai-ri. Etio ra keremiro namadimi-iasepere-ri mo sapuwo to, neio ro orio keremiro amadimi-iauri-ri.

²⁵ Nio etio ra sirio namabu na-iworohuti-dumo ina nio pamo nato namadimi-iauri-ri, nio era ato ama-irowomidiro-ri modobo ra nio aboudo? E e modobo ia pua.

²⁶ Ibose mo etio ro nemowabe-dumo ina mo oweru na-waratiouti-dumo, wisana neio mo ro ubi tato anama-iwia-ri. Mo nou se ie Imese Urubia Kiauri Dubu to na-napoi-ro ina mo korowameai tau ato nedi urubia ro mo ro ubi tato anama-iwia-ri. Mo edi tau ato namadi-orowameai-ri Godi tarena sowake urio sirio mutu mo abera edi woroworo ro nou ato anamadi-orowameai-ri.

²⁷ Nio morobise oweru nimowapotai, nio abora etio ro orowotoi nato, nio arua ido to amadimo-orowaburo-ri, saiki ata Godi edi kiwaboi tanaro ro nio ro amadimo-owea-ri.'

Iesu durupi benenio ia se gowotoi

²⁸ 8 saiki koroporeai aupiaupi Iesu ro nedi oweru ro kimowauti na-goporeai, taie nou ro Pita, Ioane, daro Iemisi neibi se gidabuai-ibi imese gidiai-birimo podo ohu to Iesu Godi mutu eremowauti rie.

²⁹ Iesu kararatoro oweru na-garo nou sosoro woidomari ata sosoro giwotoi, ibose nou edi

obotama giroidiro benenio ia se
gerememiouti-rimo.

³⁰ Taie nou sosoro gabo ato netewa teibo dubu
teibo Mose ra Eraia ra

³¹ nato gorowapotai-rido, nou mutu
geremotoi-birimo, neibi durupi imese benenio ia
se gerememiouti-birimo. Iesu beda sosoro
ama-aimai-ri Ierusarema rido Godi ubi tanaro
oporeai ri, neitiro nedi owera ro neito
geremowagomea-rido Iesu mutu.

³² Isana Pita, boinana dubu teibo mutu neibi
ata umoro tato ie edi tanaro ro
na-gororosoidiro-rimo neibi norou ia ro
giwagumaidiro-ibi. Kaupoti neibi norou aboudo
na-gireribua-birimo neibi ro Iesu nato
gowea-birimo netewa teibo dubu teibo mutu
na-geremotoi-birimo, neibi edi durupi ro atu se
ta-garatidiai-birimo imese woroworo ia se
giwotoi-birimo.

³³ Mose ra Eraia ra ro Iesu emesera i rie taie
Pita ro ibo Iesu aboto, 'Eputa dubu, modobo ie
neibi atu se nato komidiro, neibi ro netewa didi
mapagea Peteibi anamabimi-imotomai-ibiri, ata
oro do ie, ata Mose do ie, ata Eraia do ie.'
(Kaupoti Pita umoro pua nou ro beda owera
garo.)

³⁴ Pita ro nedi owera ro karo, toboro kere
duwoduwo gororuwo-ro neibi nou ro aise
giatimai-ibi. Toboro kere ro edi tau ato
giahidimai-ibi kowasoro na Peteibi neibi tere ro
aise girobai-ibi.

³⁵ Ina toboro kere maumo rido owera ioudo
gutura-ro, 'Nou mo ia mere ie, mo ro nou
nohodowa. Modobo ie nibi ro nou owera se

kirowidiro.'

³⁶ Taie iedi owera ro neibi ro odio kirowai ro na-girorowai-birimo neibi ro nato Iesu se gowea-birimo na-gotoi. Ina iedi tau ro nato Pita, Ioane, daro Iemisi neibi ro edi tanaro ro na-gowea-birimo ata dubu ata neibi ro emowauti pua.

Ata mere ubauba urio ro na-oworohutiti Iesu ro meana gowai

³⁷ Ata saiki Pita Ioane Iemisi neibi mutu Iesu podo ohu rido na-giroruo-ibiro, neibi ro auna topira gebari nato gowea-birimo, neio imese ta-garadabuti-rimo Iesu gemotoi-rimo.

³⁸ Taie ata dubu topira maumo rido owera mutu ioudo gerehidiro-ro. Nou ro ibo, 'Kitamudiro dubu, nirimagare mo mere ma-dowea-ro! Mo kaupoti ia mere nou se ie

³⁹ ubauba urio ro oworohutiti, nou ro kemahodowado pua, sirio tau aise eteamotiti, iamo mutu goto ato imese kerebesiouti ie. Ibose goto ato keteamoidiro ato tu ra sairo ra koko poroporo kiwaititi ie matagoro rido matatabu se kararadi ie. Mo mere sirio tau nou ro ubauba ibo owaitititi.

⁴⁰ Oro edi kowasoro urubia ro mo ro egea se niwaibia neio ro edi ubauba urio ro nou aboudo owagare ri, kaupoti neio ata ro kosioidiro modobo pua.'

⁴¹ Iesu ro ibo, 'Nio abora na-orowomidiro kerewaekerewae se ou-dumo, nio kimibiria tato ie! Mo dese a-neremiri ra nio mutu koroho? Mo beda mutu saiki niporeai nio mutu?'

Taie Iesu ro ibo iedi dubu ro nou aboto, 'Oro mere neito ma-dowou-ro.'

⁴² Iedi mere ro abera ro na-gowou-ro Iesu aboto ubauba urio ro iato aise geteamoidiro imese giwiti. Kaupoti Iesu ro edi ubauba urio ro nou ro masawe to gemowapotai iedi mere ro nou ro emeserai ri, taie edi mere ro meana aise goi. Edi mere ro Iesu ro na-gorobai, imese gowameai-ro simara abera aboto.

⁴³ Urubia ro na-gowea-rimo Godi edi auna ia pupuwo korosa ro neio auna ia kimaragoidiro ro giopia.

Iesu pamo kowea sapuwo to geremabowa

Iesu ro imese tanaro na-isioidiro-titi urubia sirio isana neito geremowagomea-rimo. Iesu neio ro kamade ri aise gemowabu-rimo. Iedi tau ro nato, Iesu ro ibo kowasoro urubia aboto,

⁴⁴ 'Nio ro woki imati ate abora mo ro edi oweru to nama-imowauti-ri, modobo pua nio ro gare to se kirowidiro. Mabu Imese Urubia Kiauri Dubu nasa urubia aboto amadima-apoi-ri.'

⁴⁵ Kaupoti kowasoro urubia ro Iesu edi oweru to garo maumo mea se ememidai pua. Iedi maumo kimaragoidiro ro neio aboudo Godi ro a-gowopirua, ina noudo ie neio umoro koi tato. Kowasoro urubia ro na-girorowai-rimo nedi oweru ro neio tere ro giwati nou kemodowa aboto.

Auna to etu ro ama-ararasoro-ri

⁴⁶ Iesu edi kowasoro urubia ro auna oweru to geremowauti-rimo ibo, 'Neibi ata auna to etu ro ama-omidiro-ri?'

⁴⁷ Kaupoti Iesu umoro ta-goi neio kimaragoidiro beda sosoro giamo. Ina noudo ie Iesu ro mere kainai aise gorobai-ro, nou mutu

imese gotobowa-rido atu moro ato neio sosoro gabo ato.

⁴⁸ Taie Iesu ro nedi owera ro nato gimowapotai, 'Etio ro kemaিদodorai idaibo sosoro mere kainai mabu nu mo do ie, idaibo sosoro mo neio ro kemaিদodorai ie. Mo etio ro kemaিদodorai ra ibo pua mo nakara se kemaিদodorai, mo iedi dubu ro na-nemeiriai-ro nedi duriomoro ro neito nou ro ibose kemaিদodorai ie. Etio ra na-orowomidiro nio abato idaibo kimaragoidiro mutu, "Mo dorogora se dubu e," io Godi sosoro gabo ato awawo to neio ro ama-orowomidiro-ri.'

Etio ra ubauba kisioidiro tato nio aboto io neio nio urubia ie

⁴⁹ Ioane ro ibo, 'Auna dubu, nimo ro ata dubu ta-nowea-mo oro edi pupuwo korosa ro ubauba urio urubia aboudo neito imabodoidiro. Ina nedi dubu ro nimo ro egea se nodiobuti-dumo idaibo tanaro kisioidiro aboto, mabu nu nimo mutu iradabutiti pua.'

⁵⁰ Iesu ro nou ibo gemowameai, 'Idaibo sosoro urubia nio ro iadohodai mamō. Etio ra ubauba kisioidiro tato nio aboto neio ia ro amadimi-iwatuti-ri nio aboto.'

Samaria sabowa urubia ro Iesu a-gebeiouti-rimo

⁵¹ Tuturu to owamo-ri pua ata tau tou-die Iesu Godi ro Adiri sabowa to ama-owameai-ri. Ina noudo ie Iesu nou kimaragoidiro patu modobo pua kiwesegerai, nou ro na-gutura nedi owera ro ibo Ierusalem sabowa to ou ri, taie nou aise gaimai.

⁵² Iesu ro sowake urubia ata Samaria sabowa to keba se gitiodorai tanaro patu imododiai ri nou sapuwo to.

⁵³ Kaupoti iedi sabowa ro urubia iato na-gorowomidiro nu kamade mutu neio ro aramairiai pua. Neio ro nou ioudo a-gebeiouti-rimo, mabu nou Ierusarema sabowa to ou rie.

⁵⁴ Ioane ra Iemisi ra neitiro Iesu kowasoro dubu teibo ie neitiro ro na-gowea-rido Iesu na-gebeiouti-rimo, neitiro ro ibo, 'Abera Naramu, oro ubi ra neitiro ro Godi kemowapotai Adiri sabowa rido era emeiriai ri nedi urubia ro ipisiamuti ri?'

⁵⁵ Kaupoti Iesu masawe mutu aise gororoupiriai, neitiro aboto nou ro iato gimaro-ma.

⁵⁶ Taie Iesu kowasoro urubia mutu ata sabowa to imese gaimai-birimo.

Etio ro goi-rimo ubi Iesu kowasoro aboto

⁵⁷ Iesu nou kowasoro dubu peteibi mutu edi kou ro na-gou-birimo Samaria duriomoro rido Ierusarema sabowa to, ipi ato ata dubu neibi ro iato gowea-birimo. Taie edi dubu ro nou ro ibo Iesu aboto, 'Mo ubi ie oro kowasoro, oro beda moro to kou ra mo saro rido ibose to kou e.'

⁵⁸ Taie edi dubu ro Iesu ro ibo gemowameai, 'Tumu soka neio kirobuti moro mutu e, ibose pawa neio toto mutu e toto neio kirobuti moro ie, kaupoti Imese Urubia Kiauri Dubu korobuti moro tato ie.'

⁵⁹ Ina ibose Iesu ro ata dubu aboto iato gutura ibo, 'Mo dowasoro-ro!'

Ina edi dubu ro Iesu nou ro ibo gemowameai, 'Tauo keba se mo simara sabowa to morowameai-ro, womu tato mo abera negere pamo kowea. Nou pamo durupi bobo to kedea, taie oro saro rido nato nama-owasoro-ri.'

⁶⁰ Kaupoti iedi dubu ro Iesu ro ibo gemowapotai, 'Oro urubia urio pamo mutu na-orowomidiro, oro abera pamo durupi neio ro ba-memoba-mo. Isana oro dou Godi edi kiwaboi tanaro ro nou sapuwo to urubia neito ba-dimowautiti.'

⁶¹ Ina iato ata dubu ro gutura Iesu aboto, 'Abera Naramu mo ubi ie oro kobodoro. Tauo keba se mo anama-orowameai-ri iana owera nama-utura-ri simara urubia aboto, ina nato namadi-ou-ri oro owasoro ri.'

⁶² Iesu ro edi dubu ro ibo gemowameai, 'Etio ro kitamuai ra siware na kiwotouti neio modobo pua egea moro to kirarowo, neio modobo ie idomari siware na to se kiwotoi. Neio egea moro to kirarowo ato, siware na neio ro mea mino to iwati-ri pua. Idaibo urubia neio aboudo modobo pua Godi edi kiwaboi tanaro ro nou sapuwo to woko kisioidiro.'

10

Iesu ro 72 urubia gitiodorai

¹ Abera Naramu Iesu ro urubia owera kimowauti na-goporeai taie nou ro iato giaubai arua 72 urubia, taie sabowa gabogabo to nou ro netewa netewa se gitioduti. Iesu ro neio na-gitioduti nu saro rido nato gou nedi sabowa sirio ro iraturio ri nou owera gabo modobo ato tanaro aise gororosiodiro-rimo.

² Tauro kebase neio nou ro ibo gimowapotai, 'Duriomoro gabogabo ato sirio urubia ro eremasebidiro-dumo mo kowasoro aboto. Neio pari ohona sosoro ie gumuni ta-goï-dumo kidoho aboto. Kaupoti kidabuti aboto mea oweru kimowauti urubia sipu tato ie. Abera Naramu nu pari abera nou se ie. Ina noudo ie nou aboto ba-dararatoro-mo arua woko urubia nou pari to imerio ri.

³ Abora dasiriai-mo! Kimaragoidiro mutu gi-oroho-ri, nio mo ro kakaba sarupo mino to nimeiriai, ikio toroho-dumo neio se ba-diwaruwo-mo.

⁴ Ibose nio namadimo-ou-ri namabu iwou ate idaïbo mani pauso, keta popo, tamaka, nio toutou se ba-dou-mo. Nio gabo ipi ato etio ro kiwotobowa ra neio mutu oweru tuturu tau to eremowauti mamu.

⁵ Nio ata moto rido kimaïdodorai ato ibo gi-outura-ri, "Miro Godi aboudo nedi moto ro nato ba-mowamo."

⁶ Ibose miro dubu iedi moto ro iato na-omidiro, iedi miro ro iato aise ama-erediai-ri. Kaupoti iedi moto ro nato miro dubu omidiro tato, iedi miro ro neio abato erediai-ri pua, nio aboto korowameai ie.

⁷ Nio beda urubia ro kimaïdodorai ra edi moto ro iato se gi-omidiro-ri, womu tato iedi sabowa ro nio ro namadime-emeserai-ri. Iedi urubia ro beda dokou ra ohona ra imio-dumo nou se gi-iho-ri. Mabu woko urubia ro arua urubia woko kimesioidiro ato, modobo ie neio wisa kimade nedi urubia ro neio aboudo. Nio modobo pua kororosuwu ata moto rido

kosuruwo ina ata moto to kodoro, ibo korowati ubauba ie.

⁸ Ina nio ata sabowa to na-wou-dumo, urubia ro ioudo na-iramairiai-dioumo, edi urubia ro neio ro nio etou ohona kimia ra aise gi-iho-ri, ibeouti mamō.

⁹ Ina modobo ie edi sabowa ro nato temeteme urubia meana kiwaititi. Ibose nedi urubia ro nio ro aise gi-itomu-ri ibo Godi edi kiwaboī tanaro ro abora nio aboto aupise ta-gosiomai-die.

¹⁰ Kaupoti nio kodoro ato ata sabowa to ina urubia ro imaidodorai tato na-ibeīouti-mo ioudo, nio iato orowomidiro mamō, aise gi-osuruwo-ri gabo bara to edi urubia ro orowomidirotiti neio aboto iato gi-outura-ri ibo,

¹¹ “Nimo ro abora sairo panese a-nipiti-dumo nio umoro koi sapuwo to, ibo nio abato towamo ubauba. Kaupoti nio umoro ba-doi-mo Godi edi kiwaboī tanaro ro aupise towamo nio abato.” ’

¹² Ina Iesu ro ata owera iato gemoguai, ‘Nio mo ro umoro owera nimia abora morobise owera ie, koto saiki namadi-ou-ri Godi ro nedi sōpu duriomoro urubia ro koto nato ama-iwai-ri. Sodom urubia beda sosoro ubauba isioidirotiti-mo io edio ubauba wisa ro neio ro kainai se amadimi-imidai-ri. Kaupoti nio beda sabowa rido amadimi-ibeīouti-ri, neio ro saiki ata auna ubauba wisa amadimi-imidai-ri.’

Kimibiria tato urubia Iesu ro koko owera gimia

¹³ Iesu ro ibo kowasoro urubia aboto, ‘Korasini sabowa urubia na-worowomidiro neio ro auna ubauba amadimo-owea-ri, ibose Betesaida sabowa urubia neio iasoperai-ri pua neitiro atu se ubauba emesio-do. Keba se neitiro duriomoro ato idaibo pupuwo korosa tanaro na-nisioidiro,

mo ro Taia ra Sidoni ra ato idaibo sosoro pupuwo korosa tanaro kisioidiro rasiri ie, io nedi Godi umoro tato urubia ro samo to ba-gerewesegerai-rimo ubauba aboudo. Ina neio kerekere koropukoropu obotama ba-giroiti-rimo panese to durupi ba-garadiriti-rimo. Neio ro nedi tanaro ro paea se nou ba-gowawea-rimo ibo, “Nimo ubauba aboudo ta-nerewesegerai-dumo.”

¹⁴ Auna koto tau namadi-ou-ri Taia ra Sidoni ra urubia beda sosoro ubauba isioidirotiti-mo, io edi ubauba wisa ro neio ro kainai se amadimi-imidai-ri. Kaupoti Korasini urubia Betesaida urubia mutu neio ro saiki ata auna ubauba wisa amadimi-imidai-ri.

¹⁵ Ina Kapeniama urubia nio ibo a-imaragoidiro-dumo ra nio Godi ro ama-iwioro-ri ra Adiri sabowa to auna masiro imade ri? Marasio ia ie! Nio pusuru maumo to ama-ioubiri-ri. Nio ata ioudo erereihai-ri pua.

¹⁶ Mo kowasoro urubia, nio oweru etio ro irowidiro-dumo io mo ia oweru irowidiro-dumo. Ina nio etio ro ibeiouti-dumo io neio ro mo nebeiouti-dumo. Ibose mo etio ro nebeiouti-dumo, mo neito etu ro nemeiriai-ro neio ro nou ebeiouti-dumo.’

72 kowasoro urubia Iesu aboto gorowameai-rimo

¹⁷ 72 Iesu kowasoro urubia sabowa gabogabo to na-goroho-rimo nou aboto kamade mutu gorowameai-rimo. Neio ro beda tanaro gisioidiro-rimo Iesu neio ro iato gemowauti-rimo. Neio ro ibo Iesu aboto, ‘Abera Naramu, oro pupuwo ato ubauba urio nimo oweru ta-girowidiro-rimo. Nimo ro karagare

owera kutura ato neio aboto, neio urubia aboudo aise kosuruwo ie.'

¹⁸ Taie neio Iesu ro ibo gimowameai, 'Mo ro ibose to nemowotoi-ro Satani Godi ro na-geherai-ro nedi sopu duriomoro ro neito, penenio beda sosoro ra ibo geretei-ro Adiri sabowa rido.

¹⁹ Ina owera neito ma-dirowidiro-rimo! Nio pupuwo mo ro mabu ato nimia bagawe nio ro amadimi-ituti-ri, esere mutu. Ibose auna pupuwo korosa nio mo ro ta-nimia nimo nasa dubu Satani edi pupuwo ro kiarumiauti aboto, nio ata nakomu ata ro iari-ri pua.

²⁰ Nio modobo ie auna ia kamade ro kiwati mabu nio masiro Adiri sabowa ato tiamo-die Godi ro ta-gisioidiro nou buka ato. Ina ibose nio owera ubauba urio ro na-irowidiro-dumo nou sapuwo to kamade ro iwati mamu.'

²¹ Iedi tau ro nato Iesu Tarena Urio ro auna kamade aise gowai, taie nou ro Godi aboto iato garo ibo, 'Abera, toboro duriomoro gebari mutu imese oro do ie. Mo ro eso owera nutura nedi tanaro ro oro ro modobo ato giwopirowa awawo umoro urubia aboudo. Ina oro ro nedi mea tanaro ro dorogora se urubia aboto giwapotai-ro. Io Abera, oro ro nou ri gisioidiro nedi tanaro ro mabu oro ubi ie nedi tanaro ro kosioidiro aboto.'

²² Ina Iesu kararatoro owera na-goporeai taie nou ro urubia aboto ibo, 'Mo Abera ro imese umoro, pupuwo korosa mutu mo aboto ta-giaiwai-ro. Urubia umoro pua Godi mere beda sosoro ra, Abera nakara se umoro ie. Ina ibose urubia umoro oi pua Abera Godi beda sosoro ra, Mere nakara se umoro ie. Ina edi

urubia aboto nowapotai Abera, io neio umoro ie nu beda sosoro ra.'

²³ Taie Iesu na-gerewesegerai kowasoro urubia aboto nakara moro ato owera nou ro iato gimowapotai, 'Nio dese to meana ta-owea-mo mabu nio simara idomari to tiauri-dumo beda tanaro ro ororosioidiro-dumo.

²⁴ Godi ipusu owera urubia, eputa urubia mutu tagara tau ato na-gorowomidiro neio auna ubi ro ta-iamotiti nedi tanaro ro kiauri aboto, ibose nedi owera ro kirowidiro aboto. Kaupoti nio ro beda tanaro iauro-dumo, neio ro iauro pua. Ibose nio ro beda owera irowidiro-dumo neio ro irowidiro pua.'

Ata dubu Samaria dubu ro gowarebai

²⁵ Ata tau Mose sabi kitamudiro dubu aise gotobowa, nou ubi ie Iesu owaibia ri. Taie nou ro Iesu nato garatoro ibo, 'Kitamudiro dubu, mo ro womu tato womu tato keremiro beda sosoro nama-owea-ri?'

²⁶ Ina nou Iesu ro ibo gemowameai, 'Mose sabi patu ato beda sosoro owera ro iamo? Oro ro beda sosoro eremoputititi?'

²⁷ Taie nedi dubu ro nou ro ibo, 'Mo ro keremoputi ie Mose sabi owera Tarena Buka ato na-iamo, "Godi nirimagare kemati modobo ie morobise giropu to, morobise ubi to, morobise pupuwo to, morobise kimaragoidiro to, imese nou aboto kiaiwai modobo ie. Ina oro ro modobo ie arua urubia nirimagare kimati oro beda sosoro eremati nirimagare nakara se." '

²⁸ Taie Iesu ro ibo, 'Oro ro morobise owera owameai-die, nedi tanaro ro nama-isioidiro-ri

oro ro womu tato womu tato keremiro nato ama-owea-ri.'

²⁹ Kaupoti urubia ibo imaragoidiro rie nu mea muro dubu e, nou ro ibo, 'Arua urubia nirimagare kimati modobo ie. Ina nirimagare mo ro beda urubia kimati ra?'

³⁰ Taie nedi dubu ro Iesu ro ibo gemowameai, 'Neito ma-dirowidiro-ro. Ata Iu dubu Ierusarema sabowa rido godori-ro Ieriko sabowa to. Ipi ato piro urubia ro nato gowea-rimo, nou iato aise gohia-rimo, na-gado-rimo, nou edi namabu ro neio ro aise gowasiti-rimo. Nou iato aise gemesera-rimo sapuwo pamo karima tititi imese gorobu gabo bara ato.

³¹ Ina iato tuturu to pua Godi ra urubia ra turituri dubu ro godori-ro, nou ro nato gowea iedi dubu ro na-gorobu gabo ato. Nou ro aise gorohodorai kakate moro ato gemowagegere, imese gou simara ubi gabo ato.

³² Ina iato Tarena Moto woko dubu ro godori-ro atu gabo ato. Nou ro edi dubu ro na-gowea karima titi na-gorobu, nou ro ibose to gemowagegere kakate moro ato imese gou simara ubi gabo ato.

³³ Ina iato Samaria duriomoro dubu ro godori-ro. Nedi daimodaimo dubu ro nou ro nato gowea nedi dubu ro na-gorobu karima tititi. Nou ro na-gowea nou auna natonato goi nou aboto,

³⁴ ikoni nou ro meresini obo to na-gemowiouti iato gemauputi obotama to. Iedi dubu ro ioudo na-goumai-ro nou ro aise gowomi nou simara

doniki ato, taie imese gowou apira urubia kirobuti moto to, nou ro mea se iato gowarebai.

³⁵ Ata kowaroho Samaria dubu ro ibo moto kiauri dubu aboto, “Mani iopu nou e iedi dubu ro kiauri sapuwo to, nirimagare ie mena se ba-diauri. Mo anama-ou-ri simara ubi gabo ato nama-oro-ro-ri. Mo ioudo korowameai ato oro ro beda mani eherai nou kiauri sapuwo to, oro wisa ioudo kou ato nato namadi-emowameai-ri.”

³⁶ Taie Iesu ro ibo Mose sabi kitamudiro dubu aboto, ‘Edi netewa didi dubu peteibi ro neibi oro ro kiauri-bi ato, beda dubu ro gemati nirimagare edio temeteme dubu ro?’

³⁷ Ina Mose sabi kitamudiro dubu ro ibo, ‘Edi daimodaimo dubu ro saro rido na-godori-ro nirimagare nou ro gemati.’

Taie Iesu ro ibo, ‘Ba-dorowameai idaibo sosoro tanaro nou ba-disioidirotiti imese urubia aboto!’

Iesu ro Mata ra Maria ra giraturiomai-ma

³⁸ Ata tau Iesu kowasoro urubia mutu na-goroho-rimo neio imese gou-rimo ata sabowa to. Iedi sabowa to na-gorowateai-rimo ata orobo masiro Mata neio nou ro gimaidodorai-ro nou moto to ou ri.

³⁹ Mata neama mutu e masiro Maria neitiro ibo imidirotiti-do. Iesu Maria ro na-gowea nou aise gomi nou abato. Iesu totomu na-gorowauti nou oweri gare se gemedea.

⁴⁰ Kaupoti Mata nakara se garasaubuti woko na-gisioidiro ina nou masawe mutu nato girario-ro Iesu aboto, nou ro ibo, ‘Abera Naramu Maria etou ememidiro iato mo nakara se

narasaubuti woko kisioidiro mutu.
Demowapotai mo owarebai ri.'

⁴¹ Abera Naramu ro ibo, 'Ee Mata, natonato ie oro ohona kito siriosirio kimaragoidiro mutu isioidiro.

⁴² Auna tanaro kaupoti nou e. Maria ro mea tanaro osioidiro, mo oweri kirowidiro aboto ata ro odiobo ri pua.'

11

Iesu ro kararatoro sapuwo to gitamudiro

¹ Ata tau Iesu ata moro ato Godi aboto nato gararatoro, kararatoro oweri na-goporeai, taie ata kowasoro dubu nato gou-ro nou aboto. Nou ro ibo, 'Abera Naramu, Ioane obo to kiwarumiauti dubu nou simara kowasoro urubia kararatoro oweri beda sosoro to gitamudiro, ina nimo oro ro idaibo sosoro kararatoro oweri ma-ditamudiro-ro.'

² Ina neio Iesu ro ibo gimowapotai, 'Nio Godi aboto kararatoro ato ibo gi-araratoro-ri, "Nimo Abera Godi oro masiro sirio urubia ro ba-memowabu-mo mabu oro Godi ie. Ina oro ro kiwaboi tanaro maumo ato, imese sirio urubia ba-mirowomidiroiti.

³ Saiki gabogabo ato, oro ro modobo ie nimo ohona simara modobo ato kimio.

⁴ Nimo ia ro woki beda sosoro to nimatiti-dumo arua urubia ro ubauba na-isioidiro-dumo nimo aboto, ina nimo ro ubauba na-nisioidiro-dumo oro ro modobo ie nimo idaibo sosoro kimatopeamuti. Koko kiwaibirio tanaro aboudo, oro ro modobo ie nimo kiwagarewado."'

Sirio tau Godi aboto aise gi-araratoro-ri

⁵ Iesu ro kowasoro urubia nedi totomu ro nou gimowauti. 'Etu umoro ra nio ata, duwo turi ato namutuna moto to na-wou ohona ri nato na-wararatoro ibo, "Namutuna mo modobo ra oro ro netewa didi dokou itaina peteibi to kowarebai?

⁶ Mabu mo ata namutuna dese to orowateai-die, ata nakomu ata mo abato owamo pua nou emitai na."

⁷ Ina oro namutuna ro ibo na-emowameai-die, "Etu ri aramututi-die moto magere ta-nemakoko, mo norou e merebusere mutu, keribua pua."

⁸ Iesu ro ibo, 'Nio mo ro a-nimowapotai ibo, oro namutuna nirimagare ri keribua tato, oro edi korowararo ro nu nou ro kowoubua ie, oro beda ubi nakomu ri orowaro nou ro komia ie, mabu oro siripo owamo-ri pua.

⁹ Ina noudo ie nio mo ro ibo mimowapotai-ro, Auna se dorowaro-mo nio ubi nakomu Godi ro kimia ie. Diosora-mo nio ro nato amadimi-iwia-ri. Magere damo ato kohe to auna se dorowapotaiddo-mo, magere nio aboto nato amadimo-orodobuti-ri.

¹⁰ Etio ra auna se na-irowaro-dumo neio ro aise amadimi-imade-ri. Etio ro amadimi-iosora-ri neio ro aise amadimi-iaurititi-ri. Magere ato etio ro ipogutititi-dumo neio aboto magere amadimo-orodobuti-ri.

¹¹ Abeamio nio merebusere nakere ri na-orowaro-dumo, nio ata ro neio bagawe kimia ra?

¹² Ibose kakaba iopu ri na-orowaro-dumo nio ro esere kimia ra? E e, nio ro idaibo tanaro isioidiro-ri pua.

¹³ Nio imese ubauba urubia ie. Kaupoti nio auna umoro ie merebusere aboto meamea nakomu kiaiwo. Ina nio Abera Godi Adiri sabowa ato na-omidiro-die nu mea tanaro dubu e. Nio korowaro ato, nou ro Tarena Urío kemeiriai ie nio aboto.'

Iesu edi pupuwo ro Godi aboudo ie

¹⁴ Ata tau Iesu ro ubauba urío ata dubu aboudo nato gemabodorai, iedi ubauba urío ro owera karo pua. Iedi ubauba urío ro na-gosuruwo-ro iedi owera karo tato dubu ro nou aboudo, iato nou owera aise gutura. Iedi topira ro gorobu neio ro na-gowea-rimo nedi tanaro ro na-gororosioidiro, neio iato aborabora ro girobai.

¹⁵ Kaupoti arua urubia ro ibo garo-rimo, 'Iesu iedi pupuwo korosa ro Beresebu ro omio-die, nu ata masiro Satani. Nu edi ubauba urío sirio ro neio auna eputa dubu e. Nou edi pupuwo korosa ro ubauba urío urubia aboudo neito imabodoidirotiti.'

¹⁶ Arua urubia neio ubi a-giamo Iesu neio ro owaibia ri, taie nu neio ro nato gararatoro-rimo ibo, 'Nimo ubi ie kiaiuri ata pupuwo korosa tanaro ata ba-dosioidiro nimo umoro koi aboto ibo oro edi pupuwo korosa ro Godi aboudo ie.'

¹⁷ Kaupoti neio maumo Iesu ro keba se ta-gimowea neio beda sosoro gimaragoidiro-rimo. Taie neio Iesu ro ibo gimowapotai, 'Kaupoti duriomoro urubia turi ato na-warapepea-dumo boso nato

na-eremede-a-do neio nasanasa to korowomidiro ie, neio namabu imese keremoweisiamo ie, ata nakomu ata eremeserai-ri pua. Ibose atu moto urubia turi ato na-warepepea-dumo neio imese korohoduti ie oroworohuti-ri pua.

¹⁸ Ina idaibo sosoro ie Satani urubia turi ato na-warapepea-dumo, nato na-warado-dumo, Satani urubia ro kemedio ra? E e, neio ro emedio-ri pua.

¹⁹ Nio ibo aro-dumo mo ro Beresebu edi pupuwo korosa ro ubauba urio neito nimabodoidiro. Kaupoti mo ro Beresebu edi pupuwo korosa ro ubauba urio neito kimabodoidiro rasiri ie, ina nio edi patu urubia ro ubauba urio urubia aboudo etu pupuwo korosa to kimabodoidiro ra? Nio edi woko urubia ro neio ro tiwapotaidiro-dumo ibo nio karasaubuti urubia ie.

²⁰ Kaupoti mo ro ubauba urio Godi edi pupuwo korosa ro neito na-nimabodoidiro Godi edi kiwaboi tanaro ro nio aboto ta-gorowateai-die.

²¹ Ata pupuwo dubu moto kemotoi ato, nou namabu sirio modobo ato kiamo ie, ata dubu ata ro emowadaudiro-ri pua.

²² Kaupoti auna ia pupuwo dubu nato na-orowateai-die, edi dubu ro nu edi boso namabu sirio ro nou ro kowasiti ie, ibose nou moto rido namabu sirio kiwosuwoduti ie iato urubia kimio ie. Mo ro ubauba urio urubia aboudo ibo nimabodoidirotiti.

²³ Etio ra mo mutu woko atu se isioidiro tato, iedi urubia ro mo woko ubauba neio ro nemowaititi-dumo. Etio ra Godi aboto urubia kiroru tato mo sosoro, nedi urubia ro neio ro

Godi aboudo iburutawado-dumo.'

Ubauba urio ina korowameai ato

²⁴ Iesu ro ibo, 'Ubauba urio kosuruwo ato urubia dubu aboudo nou koroho kawa koroho ie obo tato moro ato, komidiro moro kosora ie. Ina nou ro komidiro moro kowea tato nu kimaragoidiro to ibo, "Mo ro edi moto ro keba se na-nemeserai modobo ie mo ina ito korowameai."

²⁵ Taie nou ioudo na-orowameai-die edi moto ro mea mino to kotoi ie namutuna ro kotobiti ie ina namabu mena se kimododiawado ie.

²⁶ Taie nou borubi 7 urio iato kidabuai ie, ina neio imese ubauba ia ie, ibo pua keba se edi ubauba urio ro gomidiro nou sosoro. Taie neio atu se imese kodoro ie edi mea moto ro neito, ina edi dubu ro keba se modobo ato omidiro pua, ina abora imese ubauba ia ie, ibo pua keba se beda mino to gomidiro.'

Iesu ro morobise pupuwo korosa sapuwo to gitamudiro

²⁷ Iesu ro nedi oweru ro na-gimowauti, ina ata orobo oweru mutu soirio rido nato gereihidiro-ro, nou ro Iesu nato gorumai, 'Oro mamu korosa Godi ro ba-momia oro nou ro goroto ina nou nono gidio.'

²⁸ Kaupoti edi orobo ro Iesu ro ibo gemowameai, 'E e idaibo gutura, etio ro irowidiro-dumo Godi edi oweru ro ina nou durupi to na-isioidiro-dumo, mea korosa neio abato ama-owamo-ri.'

Urubia ubi ie Iesu ro ata pupuwo korosa tanaro kosoidiro

²⁹ Iesu aboto urubia ina ina goroho-rimo, taie urubia nou ro paea mata se gimowapotai ibo, 'Nio abora na-orowomidiro nio auna ubi ie imese ubauba tanaro kisioidiro. Nio ubi ie pupuwo korosa tanaro kiauri. Kaupoti mo ro ata auna pupuwo korosa tanaro ata osioidiro-ri pua nio ro kowea sapuwo to. Kaupoti Iona aboto beda tanaro ro gororosioidiro io nou se ie nio ro nou amadimo-owea-ri.

³⁰ Iona aboto beda tanaro gororosioidiro-rimo Niniba urubia umoro na-goi-rimo, taie neio ro ibo, "Iona ro edi oweru to gimowauti Godi aboudo ie!" Mo Imese Urubia Kiauri Dubu e, idaibo sosoro tanaro mo aboto amadi-ororosioidiro-ri. Ina urubia abora na-orowomidiro neio umoro amadimo-oi-ri ibo mo Godi aboudo ie.

³¹ Tagara tau ato eputa orobo Siba duriomoro rido gou-ro nu imese muso ia moro rido gou-ro, Soromoni edi muro oweru ro irowidiro ri. Soromoni nu muro mutu imidirotiti, kaupoti mo muro ohu ato owamo. Soromoni muro sopu to owamo-die. Kaupoti nio ubi tato ie mo muro oweru kirowidiro. Ina nou mabu ato ie nio abora na-orowomidiro nio atu se Siba eputa orobo mutu ama-iwoubua-ri koto saiki ato, taie nio Siba eputa orobo ro nato ama-iapoi-ri ibo, "Nio imese ubauba urubia ie."

³² Keba ia tau ato Niniba urubia Iona ro Godi oweru na-gimowauti ubauba aboudo aise gerewesegerai-rimo. Kaupoti ata dubu tomidiro nato nu Iona sosoro pua, nu imese auna ia ie. Ina nio ubi tato ie kerewesegerai ubauba aboudo. Ina nou mabu ato ie nio abora na-orowomidiro nio Niniba urubia mutu atu se

ama-iwoubua-ri koto saiki ato. Taie nio neio ro nato amadimi-imowapotai-ri ibo, “Nio imese ubauba tanaro kisioidiro urubia ie.” ’

Pina kiriware modobo ie oro abato

³³ Iesu ro urubia totomu ibo gimowauti, ‘Ata dubu ro erempa na-owateai nou ro ata nakomu to owasiai-ri pua, nou ro edi erempa ro kenene ato kakokai ie, urubia ro mea se kiauri aboto.

³⁴ Oro idomari pina beda sosoro ra oro ibo ie durupi mea mino to kowaboi aboto. Oro idomari teibo mea se na-irarowo oro durupi mea mino to kowaboi ie. Kaupoti oro idomari teibo timotimo se kiamo-ma ato oro durupi duwoduwo maumo ato ibose to ama-owaboi-ri.

³⁵ Ina noudo ie oro modobo ie mea mino to keremododiai, oro edi erempa ro na-iriware oro abato korodoia modobo pua, ina oro durupi duwoduwo nou ro kowai ie.

³⁶ Ina ibose oro durupi ato pina sapuwosapuwo na-iriware-dumo ata duwoduwo tato ie. Oro abato pina kiriware ato, ata nakomu to emopai tato, iedi pina ro erempa sosoro mea mino to kimewiti ie.’

*Iesu ro Parasi urubia serawo giwia sabi
kitamudiro urubia mutu*

³⁷ Iesu ro totomu kimowauti na-goporeai, taie nu ata Parasi dubu ro nato garamairiai-ro nou moto ato iho ri. Taie Iesu neido na-godoro keta ato aise gomi,

³⁸ Iesu nou ro ta-gowea tu kiwiouti tato na-gomi ohona iho ri, nu iato boroboro ro gorobai.

³⁹ Taie Iesu ro ibo edi Parasi dubu ro nou aboto, 'Nio Parasi urubia panikere ra mereki ra ohu iremowioutiti-dumo, kaupoti nio maumo imese ubauba ia ie nio namabu aboto auna ubi ie.

⁴⁰ Nio imese meana pua, kawakawa urubia ie. Nio umoro a-iamo ra ibo, Godi ro gisioidiro-ma ohu ra maumo ra?

⁴¹ Nio edi namabu ro na-iworohuti-dumo, nio ro namadimi-imio-ri namabu tato urubia, iedi tau ro nato nio marea tato amadimo-oi-ri.'

⁴² Iesu ro ibo nedi Parasi dubu ro nou aboto, 'Parasi urubia auna ia ubauba nio aboto ama-ereredeadea-ri. Mabu nio auna se imaragoidirotiti-dumo Godi sapuwo kere komio idaibo koromeamata kainakaina ibose pari namabu mutu. Nio ro arua urubia aboto tuputupu tanaro kisioidiro pua. Ibose Godi nio ro nirimagare kemati pua. Kainakaina tanaro nio ro tisioidiro-dumo, kaupoti awawo tanaro imesere mamo, aise gi-isioidiro-ri!

⁴³ Parasi urubia nio ubauba maumo to iraumo-dumo nio auna ubi ie keba moro kimaberawado karadabu moto ato. Nio auna ubi ie urubia nio mutu kidabuti maketo moro ato.

⁴⁴ Kaupoti nio pamo urubia bobo sosoro ie, urubia kotoburio moro ieibimo pua, neio nakara se marea neito irowaititi-dumo.'

⁴⁵ Mose sabi kitamudiro dubu ro Iesu ibo gemowameai, 'Kitamudiro dubu, nimo ibose oro ro ubauba ta-niwai-ro.'

⁴⁶ Iesu ro ibo, 'Mose sabi kitamudiro urubia, auna ia ubauba nio aboto ama-ereredeadea-ri. Urubia nio ro auna mibo imotomo-dumo, kaupoti nio ro ata tu ata iaiwo pua neio toutou kiwai sapuwo to.

⁴⁷ Auna ubauba nio aboto ama-ereredeadea-ri. Godi edi ipusu owera urubia ro neio bobo ato nio ro keremasoro nakomu iwotoburio-dumo. Keba tau ato Godi edi ipusu owera urubia ro nio nasaio ro giesu-rimo.

⁴⁸ Ina abora nio ro nou iwotoburio-dumo nio eremasoro na nio nasaio ro beda tanaro gisioidiro-rimo. Neio ro mea tanaro kisioidiro rasiri ie, Godi owera nato ba-gimibiria-rimo. Kaupoti neio ro Godi owera imibiria pua.

⁴⁹ Godi ia nu simara muro owera nakara se gowapotai-ro, “Nio aboto anama-imeirio-ri mo ipusu owera urubia. Nedi urubia ro arua lu urubia ro amadimi-iopiauti-ri, ina arua neio ro ubauba mino to amadimi-iworohuti-ri.”

⁵⁰ Ina abora nou e, nio etio ro orowomidiro nedi tau ro nato, auna ubauba nio aboto amadimo-ororosiodiro-ri, nio ro auna ia ubauba wisa amadimi-imidai-ri. Keba tau ato Godi ipusu owera urubia ta-giesu-rimo owera neio sapuwo to ibo ie,

⁵¹ Eiboro keba se gesuai ioudo mororuwo-ro womu tato Sekaraia ti-gesuai-rimo. Sekaraia Tarena Moto, kiwoubua nakomu patapata, neitiro turituri ato gopia-rimo. Io morobise ie nio abora etio ro orowomidiro nedi urubia ro na-giopiauti-rimo neio sapuwo to nio ubauba ia wisa amadimi-iwia-ri.

⁵² Mose sabi kitamudiro urubia, auna ia ubauba nio aboto ama-ereredeadea-ri. Gabo nio ro ta-gopai-rimo urubia ro Godi mea se kowea aboto, kaupoti nio neito odouti-ri pua ibose arua urubia mea karatamudiro moro rido gabo nio ro neito imoputi-dumo.’

⁵³ Iesu ro nedi owerā karo na-goporeai nou ou rie, Mose sabi kitamudiro urubia Parasi urubia mutu neio serawo mutu koko ta-goi-rimo, serawo to gemodoruti-rimo.

⁵⁴ Neio ubi ie Iesu ro ata ubauba owerā ata utura ri taie nato owou rie koto aboto.

12

Modobo pua Parasi urubia sosoro korowomidiro

¹ Iesu aboto auna ia dubu patu ro garadabuti. Neio ito nakara se aise gorohoiouti-rimo sairo nabo gorowotuti-rimo. Iesu keba se simara kowasoro urubia aboto gapimaidiro nou ro neio ibo iato gimowapotai, 'Mea se ba-diraroweauti-mo! Parasi urubia karatigi tanaro aboudo ba-daragarewado-mo. Io nakere susuopu beda sosoro karapusia ra nakere kosiouti ato, iedi nakere ro susuopu karakara ro ubauba aise kowai. Io idaibo sosoro ie edi karatigi tanaro kainai ro nio ubauba nou ro imese kiwai ie.

² Piro se beda tanaro isioidirotiti-dumo, neio Godi ro saiki ata paea se amadi-iwapotai-ri.

³ Nakara moro ato piro se beda owerā to eremowauti-dumo, saiki ata urubia sirio ro amadimi-irowidiro-ri. Ibose nakara moto ato piro se beda owerā to irimowapotaaidiro-dumo urubia ro irorowidiro tato, saiki ata urubia sirio ro aise ama-irorowidiro-ri.'

Godi tere gi-emati-ri, urubia tere imati mamō

⁴ 'Namuturubi, nio mo ro ibo nimowapotai, sopu duriomoro durupi etio ro iopiauti-dumo neio tere imati mamō. Nio etio ro kiopiauti ra

ido nio urio aboto neio ro ata tanaro ata osioidiro-ri pua.

⁵ Nio mo ro mimowapotai-ro, etu tere kemati ra nio ro modoboie nakara se nou tere kemati. Nou abato pupuwo korosa towamo nio durupi nou ro kiopiauti ie ina nio urio era paruo to kihere ie. Godi nou se ie nu tere ba-demati-mo.

⁶ Urubia ro 5 pisiwi pawa kaina ia mani to kimade ie, iedi pisiwi kainakaina ro neio Godi ro mea se timowotoititi-die, nou ro woki imati pua.

⁷ Kaupoti Godi auna umoro ie, nio eputa ato beda mutu sobo muruwa ro irowotoititi. Ina noudo ie nio tere eremati mamo. Nio pisiwi kainakaina sosoro pua, nio Godi ro auna se timaragoidirotiti-die.'

Iesu kowauti ato siripo eremati mamo

⁸ 'Nio mo ro a-nimowapotai ibo mo etio ro namadimo-owauti-ri urubia aboto ibo, "Mo Iesu nowasoro," Imese Urubia Kiauri Dubu mo, neio mo ro ibose to anama-iwauti-ri Godi sowake urio sosoro gabo ato ibo, "Nedi urubia ro mo urubia ie."

⁹ Kaupoti beda urubia ra namadima-aro-ri ibo, "Mo Iesu owasoro pua," isana mo ro nedi urubia ro ibose to anama-iwauti-ri Godi sowake urio sosoro gabo ato ibo, "Nedi urubia ro mo urubia pua."

¹⁰ Ina Imese Urubia Kiauri Dubu masiro ubauba etio ro owaititi-dumo, nedi urubia ro neio ubauba Godi ro kimatopeamuti ie. Kaupoti Tarena Urio masiro ubauba etio ro owaititi-dumo neio ubauba Godi ro kimatopeamuti gabo tato ie.

¹¹ Nio koto aboto urubia ro namadimi-iworoho-ri Iu urubia karadabu moto to, ibose gabamani urubia aboto, nio auna se imaragoidiro ate, koto oweru beda mino to amadima-aro-ri. Edi tau ro nato, nio koto abato korowairiai oweru iosora-ri pua,

¹² nio Tarena Urio ro modobo ato ama-imasouti-ri beda oweru to amadima-aro-ri.'

*Iesu ro totomu gimowauti simara durupi
keremaragoidiro sapuwo to*

¹³ Ata dubu topira maumo rido Iesu aboto oweru ioudo gutura-ro. 'Kitamudiro dubu, mo naramu demowapotai, neitiro abera ro edi namabu na-nimowameserai-maroro oro ro ba-dimohoduti-maroro!'

¹⁴ Ina Iesu ro nedi dubu ro ibo gemowameai, 'Etu ro owapotai nitiro namabu mo ro kimohudutia-ma aboto? Mo nitiro gabamani ra?'

¹⁵ Iesu ro ina ibo urubia aboto, 'Nio mea se ba-deremowotoi-mo! Simara durupi keremaragoidiro tanaro nio abato kiamo modobo pua, amia urubia aise gi-imaragoidiro-ri. Namabu siriosirio na-iworohuti-dumo, neio aboudo keremiro owea-ri pua.'

¹⁶ Ina neio Iesu ro nedi totomu ro nou gimowauti, 'Ata namabu sirio dubu nou goto kere mutu e, taie nedi goto kere ro nato nou ro auna pari gosoidiro. Taie nou ro nato gibouti pari namabu, nou ro beda namabu gibouti neio mea se gisuruwo-rimo.

¹⁷ Iedi dubu ro nou nakara se ibo gimaragoidiro, "Ina iato mo ro etou tanaro

nama-osioihiro-ri? Mo pari namabu kiaremuti moro bobo tato ie.”

¹⁸ Taie nou ro ata kimaragoidiro nato gowea, “Nedi tanaro ro nou anama-osioihiro-ri, mo ro kiaremo moto kainakaina anama-iaiouiti-ri, awawo kiaremo moto anama-eremari-ri pari namabu arua namabu mutu iato anama-iaremuti-ri.

¹⁹ Taie mo nakara se ibo anama-eremowauti-ri, ‘Mo namabu mutu modobo ta-noi, komidiro keremiro modobo ato anama-owaboi-ri.’ ”

²⁰ Kaupoti nou edi kimaragoidiro ro Godi ro ta-gemowea-ro. Godi ro ibo edi dubu ro nou aboto, “Oro kimaragoidiro tato dubu e! Abora duwo ro nato, oro keremiro ama-aseperai-ri. Oro edi namabu sirio ro namadi-imeserai-ri, etu ro ama-irahidimai-ri?”

²¹ Beda urubia ra simara namabu ohu to na-iremomotiti-dumo, Godi ubi tanaro imaragoidiro tato, idaibo sosoro tanaro neio aboto ibo amadimo-ororosioihiro-ri.’

Ohona obotama aboto auna se imaragoidiro mamō

²² Iesu ro kowasoro urubia totomu ibo gimowauti, ‘Ina noudo ie nio mo ro a-nimowapotai ibo nio idaibo imaragoidiro mamō, “Mo ro beda ohona nama-ouho-ri, ibose beda obotama nama-iroidiro-ri?”

²³ Mabū keremiro ohona ra obotama ra ato owamo pua. Keremiro auna nakomu e.

²⁴ Koiakoia pawa na-orowadaudio-dumo nio ro ma-diauri-mo, neio ohona kibouti pua, kidabuti pua, ibose neio ohona kiaremo moto tato ie. Kaupoti neio ohona Godi ro imiotiti-die.

Ina nio pawa sosoro pua, nio Godi ro auna se timaragoidirotiti-die.

²⁵ Egea mere se tuturu to kiwaboi aboto nio keremiro kimaragoidiro siriosirio ro neito ama-iwarebai-ri ra? E e, iwarebai-ri pua.

²⁶ Idaibo kainakaina tanaro nio ro kimaragoidiro siriosirio to kisioidiro modobo pua. Ina etou mabu rido ra arua tanaro aboto kimaragoidiro siriosirio kiworohuti?

²⁷ Nio ro woki to ma-diauri-mo, tumu ato kakamu beda sosoro isuwodutiti-dumo. Neio umoro pua woko nakara se keremesioidiro, ibose obotama nakara se keremowaruwoidiro. Eputa dubu Soromoni nu egea dubu gebari ie. Morobise ie, nu meamea kiroidiro namabu to iremedutititi. Kaupoti nio mo ro a-nimowapotai kakamu beda sosoro orowotoi mea ia titi mutu, Soromoni idaibo obotama neito iremedutiti pua.

²⁸ Iedi kakamu ro abora mea ia titi mutu e, mabu neio Godi ro imedutititi. Tuturu to pua, neio pamo ro nama-irobai-ri era ro ama-iho-ri. Godi ubi tato ra nio keremeduti namabu to kiwarebai? E e, nou auna ubi ie nio kiwarebai. Nio kimibiria imese kaina ia ie!

²⁹ Nio modobo pua sirio tau ibo kimaragoidiro, “Nedi saiki ro mo ro beda ohona nama-ouho-ri? Beda obo nama-odio-ri?” Idaibo siriosirio kimaragoidiro mutu auna se orowomidiro mamo.

³⁰ Mabu idaibo sosoro tanaro, kimibiria tato urubia ro auna se isioidirotiti-dumo. Beda nakomu ra nio abato modobo ato iamo tato, Godi nio Abera ie, nou umoro koi ie.

³¹ Kaupoti nio ro modobo ie Godi edi kiwaboi tanaro ro keba se pupuwo to nou kosora, ina

saro rido nedi namabu ro Godi aboudo nio ro nato amadimi-iauri-ri.'

Mani aboto auna se imaragoidiro mamō

³² Iesu ro ina nou kowasoro urubia iato gitamudiro ibo, 'Sipu tato na peteibi nibi tere na ie. Nio Abera Godi nu kamade ie nio magere kimodobura aboto nou edi kiwaboi tanaro ro nou maumo to odouti ri.

³³ Nio edi namabu ro, namabu tato etio ro orowomidiro neio aise gi-imio-ri. Nio ro nedi tanaro ro kisioidiro ato, idaibo ie nio Godi ro Adiri sabowa ato wisana baiko timodiawadotiti. Nio umoro kiamo modobo ie ibo Adiri sabowa ato beda namabu ro iamo baiko ato ubauba oititi-ri pua, imese mea se ama-iamotiti-ri. Adiri sabowa ato ata ro piro to kimade gabo tato ie, kipiri o genoho idaibo sosoro namabu neio ro itotouti-ri pua.

³⁴ Nio meamea namabu baiko beda moro ato iamo, nio giropu kimaragoidiro mutu iato ibose to iamo.'

Sirio tau keremowotoi modobo ie

³⁵⁻³⁶ 'Nio woko urubia sosoro ba-dorowomidiro eputa dubu na-emasebidiro-dumo, nu beda tau ato amadi-orowameai-ri orobo kedea soriomu aboudo. Ina noudo ie obotama mea se pikipiki se ba-diroiti-mo nu woko emesioidiro ri, ibose pina aise mireware-mo. Nou namadi-orowameai-ri magere ato namadi-ipoguti-ri nou wisa tato woko urubia ro magere hio ito amadime-emodobura-ri.

³⁷ Nedi urubia ro neio ro meana amadimi-iwia-ri, mabu neio nou ro kirarowo

moro ato amadi-iwia-ri. Nio mo ro morobise ower a mimowapotai-ro eputa dubu nu wisa tato woko urubia namabu to amadi-eremeduti-ri, nou ro nato ama-imowapotai-ri wisa tato woko urubia omititi ri nou ia patapata abato. Taie neio nou ro ohona nato ama-imoworoho-ri.

³⁸ Etu umoro ra nou duwo turi ato korowameai, o kowaroho duwoduwo ato ra, nou ro beda wisa tato woko urubia iwia-die kirarowo moro ato neio ro amadimi-iwia-ri meana.

³⁹ Nedi ower a ro ba-dimaragoidiro-mo, moto aber a umoro kowamo rasiri ie piro dubu korowateai tau, nou ro edi piro dubu ro ba-godiobo, moto esebea-ri pua. Ina nou e,

⁴⁰ nio ibose modobo ie keremowotoi mabu Imese Urubia Kiauri Dubu nu korowameai tau nio umoro pua aise amadi-apimaidiro-ri.'

Morobise woko kisioidiro dubu etu ra

⁴¹ Pita ro ibo gemodowa Iesu, 'Aber a Naramu, iedi totomu ro oro ro na-orowauti-die neibi a-nimowauti-bidie ra, o urubia sirio a-imowauti ra?'

⁴² Taie Aber a Naramu ro Pita ibo gemowameai, 'Etio ra morobise woko urubia, siware kimaragoidiro mutu? Nedi wisa tato woko urubia ro eputa dubu ro woko nama-imio-ri, neio ro eputa dubu edi woko urubia ro mea mino to amadime-emeauri-ri. Nedi urubia ro mea tau korobai ato, neio borubi wisa tato woko urubia ohona to mea mino to amadimi-iwarebidiro-ri.

⁴³ Nedi urubia ro meana neio ro amadimi-iwia-ri, mabu neio nou ro ohona kimio moro ato amadi-iwia-ri.

⁴⁴ Morobise ia ie nio mo ro ibo nimowapotai, idaibo sosoro urubia eputa dubu edi namabu sirio ro neio aboto ama-iapoi-ri emeauri ri.

⁴⁵ Kaupoti ido nedi woko dubu ro ibo nama-utura-ri, “Ei! Mo eputa dubu orowameai pua, sabowa nou ro dese emeserai pua.” Nedi dubu ro nou ro borubi woko urubia upi dubu ama-iadotiti-ri nou ro neio ubauba mino to ama-iworohuti-ri. Nedi dubu ro ibose kiho kidio nou ama-iworohuti-ri.

⁴⁶ Iato nou eputa dubu namadi-orowameai-ri nedi korowameai tau ro aise amadi-apimaidiro-ri nou keremododiai tato moro ato eputa dubu ro nato aise amadi-emuhia-ri. Iedi dubu ro nou ro ubauba ia mino to ama-ado-ri. Taie nou ioudo aise amadi-ehera-ri borubi owera kirowidiro tato urubia aboto.

⁴⁷ Ina beda urubia ra eputa dubu ro woko na-gimapoi isioidiro ri, neio umoro ie eputa dubu ubi beda sosoro ra. Kaupoti nedi urubia ro eremododiai pua nedi woko ro nou kisioidiro sapuwo to, ibose neio ro isioidiro pua. Nou idaibo sosoro urubia eputa dubu aboudo auna temeteme amadimi-iwia-ri.

⁴⁸ Ina beda urubia ra umoro tato eputa dubu ubi beda sosoro ra, ina ubauba tanaro na-isioidiro-dumo, nedi urubia ro eputa dubu aboudo temeteme kainaimere se amadimi-iwia-ri.

Etio aboto giapoi Godi ro namabu sirio neio ro emeauri ri, modobo ie neio ro Godi ubi tanaro mea se neito kemesioidiro. Etio aboto giapoi Godi ro imese namabu sirio, modobo ie neio ro Godi ubi tanaro mea ia se neito kemesioidiro.’

Iesu ro ihodutiti urubia

⁴⁹ Ina Iesu ro ibo, 'Mo nedi duriomoro ro neito na-nou-ro era owateai ri nou-ro. Mo auna ubi ie era aise kiriware aboto.

⁵⁰ Auna temeteme tau mo ro anama-owea-ri, mo obo to edi tau ato namadimo-owarumia-ri, idaibo sosoro mibo maumo ato mo nou ro anama-omidiro-ri womu tato koroporeai.

⁵¹ Nio ibo a-imaragoidiro-dumo ra mo nedi duriomoro ro neito na-nou-ro miro owou ri urubia aboto? E e, mo miro owou ri ou pua. Urubia ihoduti ri nou-ro.

⁵² Abora nedi tau ro neido 5 urubia atu moto ato na-omidiro-bimo, neibi mo sapuwo to amabima-arapeputi-ri. Idaibo netewa didi neibi serawo amabimo-oi-ri netewa teibo aboto. Ibose netewa teibo neitiro serawo amado-oi-ri netewa didi aboto.

⁵³ *Abeamio ro simara dubu merebusere ubauba mino to amadimi-iworohuti-ri. Osio mere ro ibose neio simara abeamio ubauba mino to amadimi-iworohuti-ri. Mamio ro simara busere ubauba mino to amadimi-iworohuti-ri. Busere ro ibose simara mamio ubauba mino to amadimi-iworohuti-ri. Daramio ro eteamio ubauba mino to amadimi-iworohuti-ri. Ina eteamio ro ibose neio simara daramio ubauba mino to amadimi-iworohuti-ri.'*

Umoro aise gi-iamo-ri etou tanaro kororosioidiro ra

⁵⁴ Ibose Iesu ro auna topira iato gimowauti, 'Nio ro kowea ato daroho bubu tumu sapuwo rido kiwomi ato nio umoro samo to koi ie ibo daroho amadi-ou-ri. Tuturu to eremasebidiro-ri pua daroho aise keretei ie.

⁵⁵ Ibose surama na-ihudurai-die, nio umoro hio ito koi ie ibo korosa tau e.

⁵⁶ Nio imese karatigi urubia ie! Nio umoro ie toboro ato, daro duriomoro ato etona tanaro ro kororosioidiro ra, nio umoro keba se koi ie. Ina mabu boira abora nedi tanaro ro Godi ro na-isioidiro-die nio ro maumo mea se owea tato?’

Oro koto to kowapotai dubu nou mutu edi mibo ro aise doporeai

⁵⁷ ‘Mabu boira oro ro mea se ihoduti tato meamea tanaro kisioidiro aboto?’

⁵⁸ Oro ata dubu ro koto to na-owou, iedi dubu ro nou mutu edi mibo ro ipi ato samo to ba-doporeai. Oro ro mea se koporeai tato, modobo pua oro nou ro aise kowou koto kiauri dubu aboto. Oro iato nou ro pesomani tu to ama-edea-ri ina nou ro dibura to ama-ibiria-ri.

⁵⁹ Oro iato ama-imidirotiti-ri kosuruwo gabo tato ie, womu tato boira oro mani momuo se nama-iaiwai-ri iedi dubu ro nou aboto.’

13

Ubauba aboudo derewesegerai-mo

¹ Iedi tau ro nato arua urubia na-gorowotoi Iesu abato, neio ro ibo nou aboto, ‘Amia Gariri urubia Paireti boso urubia ro ta-giopiauti-dumo. Neio Tarena Moto ato dao gimatowo-rimo Godi aboto. Ina neio edi karima ro kiwoubua namabu karima mutu goto to atu se giroruwo-rimo.’

² Iesu ro neio ibo gimowameai, ‘Nio ro ibo a-imaragoidiro-dumo ra nedi urubia ro pamo na-gowea-dumo neio auna ubauba tanaro

kisioidiro urubia ie? Ina arua Gariri urubia neio ro ubauba kisioidiro pua?

³ Marasio nou mabu rido pua. Nio mo ro a-nimowapotai, nio modobo ie morobise to kerewesegerai ubauba aboudo. Nio kerewesegerai tato, nio ro pamo ibose to amadimi-iaurititi-ri.

⁴ Ina ohu moto na-geresebuti, 18 Ierusarema urubia pamo ta-giwia-rimo Siroama ato. Nio ibo a-imaragoidiro-dumo ra neio auna ubauba tanaro kisioidiro urubia ie? Ina arua urubia Ierusarema sabowa ato neio ubauba kisioidiro pua?

⁵ Marasio! Nio ibo nimowapotai morobise to derewesegerai-mo, ina nio kerewesegerai tato nio pamo ibose amadimi-iaurititi-ri.'

Pigi ota iopu tato ie

⁶ Urubia Iesu ro nedi totomu ro nou gimowauti, 'Ata pari kisioidiro dubu ro pari ato keba se pigi ota ta-garo edi ota ro auna ta-goi. Ata tau pari abera ro edi pigi ota ro nato garaturiomai, nou ubi ie pigi iopu idoho ri. Kaupoti edi pigi ota ro noudo iopu iroridiro pua.

⁷ Taie pari abera ro ibo pari woko dubu aboto, "Nedi pigi ota ro sirio tau to naraturio-die 3 kisimisi ta-giporeai-bi kotoi kawa kotoi, puara patupatu iopu tato. Tau se naro mo ro, abora iopu kiasesuti tau e, marasio ba-deba sogosogo se otoi. Goto bobo nou ro tima se owasiouti arua ota iopu kibouti sapuwo to."

⁸ Kaupoti pari edi dubu ro emeaurititi, nou ro ibo pari abera aboto, "Auna dubu tau se eba ate buro, kaupoti kisimisi to ma-motoi tauo. Iopu

hata ama-iasesuti-ri, goto anama-emowoiti-ri
ibose momoso sugamuso mutu
anama-emaremuti-ri iopu hio to kiasesuti
sapuwo to.

⁹ Ota iopu ata kisimisi ato nama-iasesuti-ri, io
modobo ie ba-motoi eba ri pua, kaupoti iopu
kiasesuti tato marasio nato aise ba-mereba.” ’

*Komidiro saiki ato Iesu ro bigi temeteme orobo
meana gowai*

¹⁰ Iu urubia komidiro saiki ato Iesu karadabu
moto ato gitamudiro.

¹¹ Edi moto ro nato ata orobo iato ta-gomidiro
nu ubauba urio ro na-emorohotiti-ro temeteme
nou ro omiotiti. Nou mea se irohotiti pua
kiraposowa se irohotiti, bigi kemituputai aboto
modobo pua. Nou ro 18 kisimisi ta-giporeai edio
temeteme ro nou ro kowati.

¹² Taie edi orobo ro Iesu ro na-gowea, nou ro
aise garamairiai-ro. Nou ro ibo, ‘Urubia orobo
oro temeteme aboudo modobo ta-woi.’

¹³ Taie Iesu tu teibo nou abato aise giedea-ma,
nou bigi iato aise geremituputai. Iato nu
na-geremasibai ibo mo meana ta-noi, taie Godi
nou ro iato gemowaibiti.

¹⁴ Iu urubia karadabu moto kiauri dubu auna
ia serawo goi Iesu ro edi tanaro na-gosioidiro, Iu
urubia komidiro saiki ato. Iedi dubu ro urubia
aboto aise gerewesegerai, nou ro ibo, ‘Nio ro
modobo ie arua 6 saiki na-iamo woko nato
kisioidiro idaibo temeteme urubia meana
kiwaititi aboto, ibo pua komidiro saiki ato. Nio
ro neito iworoho mamu komidiro saiki ato
durupi meana kiwaititi sapuwo to. Mabu nu

woko ie, ina komidiro saiki ato, woko modobo pua kisioidiro, sabi ie!

¹⁵ Nedi dubu ro Abera Naramu ro ibo gemowameai, 'Nio imese karatigi urubia ie! Nio ata ro idomari to kiauri ra burumukau o doniki obo sogoi se na-wotoi saiki tuturu komidiro saiki ato? Nirimagare oro kou e nu hodo kemopurutai ie taie aise kowaboi ie obo kidio moro to.

¹⁶ Nedi orobo ro meana nou ri nowai mo ro, mabu nu Aberaham orora ie, nu Satani ro ta-gemotohiti 18 kisimisi to imidirotiti. Ina iedi orobo ro mo ro kemopurutai modobo ra nedi komidiro saiki ro nato?'

¹⁷ Iesu ro nedi oweru ro karo na-goporeai odio urubia ro gowea-rimo nu masawe neio iato siripo aise goi-rimo. Kaupoti iedi topira ro iato na-gorowomidiro neio auna ia kamade ro giwati, Iesu ro beda meamea tanaro sirio gisioidiro nou sapuwo to.

Totomu masitadi ota iopu sapuwo to ie

¹⁸ Iesu ro a-gutura ibo urubia aboto, 'Godi ro kiwaboi tanaro beda sosoro ra? Mo ro beda sosoro to nama-emabuti-ri?

¹⁹ Masitadi ota iopu urubia dubu ro na-warō pari ato auna beda sosoro koi ra, Godi ro kiwaboi tanaro idaibo sosoro ie. (Masitadi mirie iopu sosoro ie, kainakaina ia ie.) Iedi ota iopu ro kosuruwo ato auna ota to kararapoi ie. Nou atemo na-iheruti iato tumu pawa ro na-owea-dumo neio ota atemo ato toto aise keremari ie.'

Totomu isiti parowa sapuwo to

20 Iesu ro ina neio ibo gimowapotai, 'Godi ro kiwaboi tanaro mo ro nio aboto beda sosoro to anama-emabuti-ri?

21 Nou idaibo sosoro kororosioi diro ie urubia orobo ro auna parowa na-emagagai iato isiti panese kainai mutu iato kowagobei diro ie. Taie edi parawa ro kainai se aupai-ri pua, auna ia se kaupai ie.'

Magere kurukuru e Godi ro kiwaboi tanaro maumo to

22 Iesu Ierusarema sabowa to na-gidiai, ipi gabo ato edi sabowa ro na-giamo nou iato ta-garaperewado urubia iato ta-gitamudiro.

23 Taie Iesu ata dubu ro nato gemodowa, 'Auna dubu, Godi ro sipu tato urubia se amadi-iapopo-ri ra?'

Iesu ro nou ibo gemowameai,

24 'Godi ro kiwaboi maumo to magere kurukuru e. Nio pupuwo diasibai-mo ito kodouti aboto, mabu magere kurukuru e. Sirio urubia ro pupuwo amadimi-iasibawado-ri kodouti aboto, kaupoti neio modobo pua.

25 Saiki ata moto abera ro magere aise ama-opai-ri. Nio goto araradi ato beda urubia ro orowotoi magere nio ro ioudo amadimo-ohoiouti-ri ibo amadima-aro-ri, "Auna dubu, nimo magere dimodobura-ro."

Kaupoti nio nou ro ibo ama-imowameai-ri, "Nio mo urubia pua, nio mo mutu idabutiti pua."

26 Ina nio ro nou ibo amadime-emowameai-ri, "Oro umoro ie nimo! Ibose nimo oro mutu ohona ta-nihotiti-mo. Nimo sabowa ato oro ro mea oweru ta-nitamudiro-titi."

²⁷ Kaupoti nu ibo amadi-utura-ri, “Nio mo urubia pua, nio mo mutu idabutiti pua. Hio to neido daragare-mo! Nio auna ubauba tanaro kisioidiro urubia ie!”

²⁸ Godi ro kiwaboi tanaro maumo ato Aberaham, Aisaki, Iakobo nio ro sosoro amadimi-iwia-ibiri. Ibose Godi ipusu owera urubia neio sosoro nio ro amadimi-iwia-ri. Kaupoti nio temeteme idobi kiriri kiriri beda buro amadime-emarotiti-ri. Mabu iedi tau ro nato Godi ro kiwaboi tanaro maumo rido nio nou ro nato amadi-iherai-ri.

²⁹ Godi ro kiwaboi tanaro maumo ato nou ro auna soriomu ama-osiodiro-ri ina urubia erere duriomoro rido amadidimo-oroho-ri. Arua urubia saiki boido idiowado-die, arua urubia saiki beda moro to orioduti, arua urubia sie boido aro-die, arua urubia nigori boido aro-die, neio ioudo amadidimo-ou-ri nedi soriomu ro nou aboto.

³⁰ Gare neito ma-diedea-rimo! Abora etio ra soppu ato na-orowomidiro neio Godi ro ohu to ama-iwoubua-ri. Ina etio ra abora ohu ato na-orowomidiro neio Godi ro soppu to amadi-iwororuo-ri.’

Iesu ro Ierusarema urubia gimohoio

³¹ Iedi atu tau ro nato arua Parasi urubia nato gou-rimo Iesu aboto neio ro ibo, ‘Oro ro nedi duriomoro ro demeserai-ro ata duriomoro to ba-dodau mabu oro Herodi ro opia ri emediawado.’

³² Iesu ro na-girorowai nedi owera ro nou ro ibo neio aboto, ‘Ba-dou-mo edi serawo tumu soka ro demowapotai-mo ibo, “Nedi saiki ro, ina kowaroho mo nedi woko ro nou

nama-osioi diro-ri. Urubia abou do ubauba urio
nama-imabodoidiro-ri. Ibose ubauba temeteme
ro beda urubia iwati nedi urubia ro mo ro
meana nama-iwaititi-ri.”

³³ Ina saiki ata mo Ierusarema sabowa to nato
nama-ou-ri. Modobo pua Godi ipusu owera
dubu erese moro ato kopia, nou Ierusarema ia
ato kopia modobo ia ie.

³⁴ Nirimagare babio, Ierusarema urubia nio ro
iopiautiti-dumo Godi ipusu owera urubia, arua
neio nio ro nadi to iopiautiti-dumo. Mo ro sirio
tau nio ubi ti-nemamotiti mo asesepu maumo
ato iwomidiro ri, beda sosoro ra mamu kakaba
ro kainakaina na-iohidiro tamu maumo ato.
Kaupoti nio ubi tato ie mo asesepu maumo ato
korowomidiro.

³⁵ Ina noudo ie ma-dowea-mo, nio arua urubia
ro anamadimi-iburutai-ri, moto imedio-ri pua.
Nio mo ro morobise owera nama-imowapotai-ri
mo sosoro nio ro iauri-ri pua womu tato ata tau
nama-ererede-ri mo aboto nio ro nato
amadimu-utura-ri, “*Godi ro korosa ta-gomia,
Abera Naramu pupuwo mutu. Oro nou se tou-die,
korosa towamo oro abato.*” ’

14

*Temeteme dubu Iesu ro sipere saiki ato gowai
meana*

¹ Ata Iu urubia komidiro saiki ato, Iesu ata
Parasi auna dubu ro garamairiai-ro ou ri nou
moto ato iho ri. Iesu ro beda tanaro gisioi diro,
nu urubia ro idomari to gemaipirio-rimo. Neio
ubi ibo giamo nou ro ata sabi ata esebea ri, taie
neio ro nu nato orobai rie.

² Ina Iesu sosoro gabo ato, ata dubu tu ra sairo ra ta-giaupai-rimo, nou temeteme mutu gomidiro.

³ Taie Iesu ro Mose sabi kitamudiro urubia, Parasi urubia mutu, neio nou ro nato gimodowa ibo, 'Sabi ra temeteme urubia nimo komidiro saiki ato meana kiwaititi?'

⁴ Iesu neio ata ro emowameai pua. Iesu ro iedi temeteme dubu ro na-gowoubuwa-ro meana aise gowai, meana na-gowai taie iato gemeiriai simara moto to.

⁵ Ina Iesu ro atu urubia ina nato gimodowa, 'Oro mere boinana o burumukau obo bobo to na-eretei nimo komidiro saiki ato, oro ro idomari to kiauri ra o keihai ra ioudo? E e oro ro idomari to iauri ri pua, keihai ie.'

⁶ Taie neio ro na-girorowai-rimo nedi owera ro neio ata ro nou owera kemowameai modobo pua.

Oro nakara se modobo pua auna to kararasoro

⁷ Soriomu abera ro edi urubia girumai ohona nou mutu iho ri, nedi urubia ro Iesu ro na-giwiia neio meana komidiro moro se girobai-rimo, Iesu ro nedi totomu ro nou mabu rido gimowauti.

⁸ 'Ata dubu ro na-wararemai marete soriomu, ina oro nato na-worumai-die, oro modobo pua auna dubu komidiro moro ato komi. Mabu ata auna masiro dubu korumai ie soriomu abera ro, nou oro mutu atu sosoro pua.

⁹ Nitiro edi dubu ro girumai-ma, nou ro ibo ama-utura-ri oro aboto, "Nedi komi moro ro demeserai-ro nedi dubu ro nou ro ama-omi-ri nato, oro sopu to dororuwo. Taie oro ioudo

siripo mutu amadi-eribua-ri sopu ato
ama-omi-ri.

¹⁰ Oro soriomu abera ro korumai ato,
dorogora urubia beda moro ato irowomidiro
titi iato komi modobo ie, mea komidiro moro
emarario mamu. Ina soriomu abera oro aboto
kou ato oro nou ro ibo kemowapotai ie,
'Namutuna neito dioidiro-ro nato domi-ro.' Ina
oro arua urubia ro namadimo-owea-ri soriomu
abera ro mea komidiro moro ato
nama-owomi-ri, oro masiro auna aise ama-oi-ri
soriomu urubia sirio sosoro gabo ato.

¹¹ Abora awawo to nakara se etio ro
ararasoro-dumo neio saiki ata Godi ro sopu to
ama-iwororuwo-ri. Kaupoti nedi tau ro nato etio
ro ararasoro-dumo dorogora se urubia to, saiki
ata neio Godi ro awawo masiro ama-imio-ri." '

¹² Iesu edi dubu ro gorumai-ro ohona iho ri
nou aboto iato gutura ibo, 'Oro soriomu
kisioidiro ato oro ro modobo pua simara urubia,
oro gu urubia, oro namuturubi, ibose etio ra
namabu sirio mutu neio kiroru soriomu ohona
kiho aboto. Ata tau nedi urubia ro neio ata ro
soriomu nama-osioidiro-ri oro wisa neio ro
amadimo-orumai-ri soriomu ohona iho ri neio
mutu.

¹³ Oro soriomu kosioidiro ato namabu tato
urubia, sairo ubauba urubia, temeteme urubia,
idomari pogo urubia, idaibo sosoro urubia neio
gi-iroru-ri.

¹⁴ Ina oro Godi ro korosa neio sapuwo to
amadi-owai-ri. Mabu idaibo sosoro urubia ro
modobo pua soriomu kosioidiro aboto, oro wisa
neio ro emowameai-ri pua. Kaupoti, saiki ata
neio kirumai sapuwo to soriomu aboto, oro wisa

Godi ro ama-emowameai-ri. Mea tuputupu urubia keba se etio ro gorowaburo-rimo neio Godi ro pamo rido beda tau ato namadi-iwameai-ri, oro ro beda urubia giwarebai neio sapuwo to oro wisa nou ro nato ama-emowameai-ri.'

Totomu auna soriomu sapuwo to ie

¹⁵ Iesu ro edi totomu ro na-gorowauti ata dubu ro na-girowidiro nou ro ibo Iesu aboto, 'Godi ro edi soriomu nama-osioidiro-ri Godi ro kiwaboi tanaro maumo ato edi urubia ro namadimi-iho-ri edi ohona ro neio auna kamade ro ama-iwati-ri.'

¹⁶ Ina edi dubu ro Iesu ro ibo gemowameai, 'Totomu ibo owamo. Ata dubu ro auna soriomu nato gemeriai nou ro sirio urubia nato giroru ou ri iedi soriomu ro nou aboto.

¹⁷ Soriomu kosioidiro tau na-gorobai soriomu abera ro sowake dubu nato gemeiriai nou ro kirapoi urubia ou ri nedi soriomu ro nou aboto. Sowake dubu ro ibo, "Awawo urubia, nio dou-rimo ohona ta-imododiai auna dubu ro."

¹⁸ Kaupoti nedi kiromai urubia ro owera siriosirio garo-rimo. Keba dubu ro ibo gutura, "Nirimagare mo goto kere dese to nomidai ina nou nama-owaseidiro-ri. Nirimagare auna dubu ba-demowapotai ibo mo ou-ri pua."

¹⁹ Ina ata dubu ro ibo, "Mo 10 burumukau dese to nimidai ina neio nama-iwaibirio-ri. Nirimagare auna dubu ba-demowapotai mo ou-ri pua."

²⁰ Ina ata dubu ro ibo, "Mo orobo dutu ata nedeia, nirimagare auna dubu ba-demowapotai mo ou-ri pua iedi soriomu ro nou aboto."

²¹ Taie iedi sowake dubu ro imese gorowameai iedi urubia ro beda sosoro owerā garo-rimo nou ro auna dubu iato gemowauti. Auna dubu ro na-girorowai nedi owerā ro nu auna ia serawo ro gorobai. Taie nou ro ibo, “Ba-dorowameai ina gabo barā ato dorogorā se urubia na-orowomidiro neio ioudo ba-dirobo-ro. Namabu tato urubia, sairo ubaubā urubia, temeteme urubia, idomari pogo urubia, neio se ba-dirobo-ro.”

Taie edi sowake dubu ro aise gaimai auna dubu owerā gabo modobo, nou ro iato girobo-ro edi urubia ro imese giwodoro nou moto goro to.

²² Tau egea mere se gororoporeai sowake dubu ro ibo, “Auna dubu oro owerā gabo modobo urubia mo ro ta-niwou-ro torowomidiro moto goro ato, kaupoti moto bobo momuo se towamo urubia sipu tato ie moto irotomuai pua.”

²³ Taie auna dubu ro ibo, “Ba-dedei sabowa tirobu-die tumu ato urubia iato torowomidiro neio ba-didabuai-ro mo moto kirotomuai sapuwo to.

²⁴ Nio mo ro ibo mimowapotai-ro keba se mo ro beda urubia nirumai neio ata ro iedi soriomu ohonā ro otopai-ri pua.” ’

Iesu ubi tanaro disioidiro, simara ubi tanaro huru dimowou

²⁵ Iesu sarō rido sirio urubia ro gowasoro-rimo, taie nou ioudo na-girimeterai-ro nou ro ibo neio aboto,

²⁶ ‘Nio ubi na-iamo mo kowasoro aboto, nio modobo pua auna se kimaragoidiro simara abeamio aboto, mamio aboto, upi aboto, merebusere aboto, naramio, mabiamio aboto.

Ina nio ia simara keremiro
na-eremaragoidiro-dumo mo aboto
imaragoidiro tato, io nio modobo pua mo
kowasoro urubia to kararasoro.

²⁷ Modobo ie saiki gabogabo ato Godi ubi
tanaro se kemesioidiro, ina karaburai nou
sapuwo to, io modobo ia ie. Iedi tanaro ro nio ro
kisioidiro tato, io nio modobo pua mo kowasoro
urubia to kararasoro.

²⁸ Ina nio ubi na-iamo koikoi moto kididi
aboto nio ro keba se kimaragoidiro to kididi ie
beda mutu ota amadimi-iaremuti-ri edi moto ro
koporeai aboto. Nio ro idaibo tanaro kisioidiro
tato etu umoro ra nio ro posi kawakawa
amadimi-iahuti-ri, edi moto ro kididi to nio ro
oporeai-ri pua.

²⁹ Ina urubia ro namadimi-iauri-ri edi moto ro
posi kawakawa nama-orowotoi-ri nio neio ro
gaga amadimi-imororouti-ri.

³⁰ Neio ro ibo amadima-aro-ri, “Nedi urubia ro
ota modobo iwai pua, moto katamuai kawa
gatamuai-rimo, modobo pua koporeai aboto.” ’

³¹ ‘Ata eputa dubu boso gowou-ro ata eputa
dubu aboto. Boso edi eputa dubu ro gowou-ro
nu 20,000 boso koroho urubia mutu e. Boso edi
eputa dubu aboto na-gowou-ro, nou boso
koroho urubia 10,000 kawakawa ie. Nou umoro
ta-goi ibo nu nou ro ubauba ama-owai-ri. Taie
nedi dubu ro aise gomi urubia mutu owera mea
mino to imodobowa ri.

³² Nou ro ibo, “Nu mo ro kemowameai
modobo ra? Iedi eputa dubu ro 20,000 boso
urubia mutu e. E e, modobo pua mo ro
kemowameai.” Taie iedi eputa dubu ro isana ipi

ato gou-ro, nou ro urubia nato gimeiriai iedi eputa dubu ro miro oweru gemowou-rimo.

³³ Ina noudo ie, etu ubi ra mo kowasoro aboto, nu beda namabu sirio iworohuti modobo ie imese kimeseruti.'

Mea topo nio ro aseperai mamu

³⁴ 'Damenā mea topo ie, kaupoti nu simara topo na-iasoperai nio aboudo modobo ra ina topo kowameai aboto?

³⁵ Iedi damena ro ubauba to imese arapoi, goto meana nou ro owai-ri pua. Urubia aboudo modobo ato owamo edi damena gohi ro keherai aboto.

Etu ra mo oweru modobo ato kirowidiro aboto, nu mo oweru gare se ba-memedeā-ro.'

15

Sipisipi na-gararaseperai nou totomu e

¹ Takesi kimade urubia amia ubauba urubia mutu neio sirio tau a-wiradabutiti-mo, Iesu oweru gare emedeā ri.

² Kaupoti Parasi urubia Mose sabi kitamudiro urubia mutu, neio ro iedi tanaro ro na-iaurititi-mo, neio ro ibo, 'Ma-diauri-mo nedi dubu ro nou ubauba urubia mutu se idabutiti ohona atu moro to neio mutu iato kiho ie.'

³⁻⁴ Taie neio Iesu ro nedi totomu ro nou gimowauti, 'Etu umoro ra nio ata ro 100 sipisipi na-iworohuti ina kaupoti nato na-wodau, 99 sipisipi nou ro egea mere se mea moro ato kimeserai ie. Taie nu iato aise kaimai ie edi sipisipi ro osora ri. Nou ro kosora ie womu tato koweā.

⁵ Taie nou ro kowea ato kamade mutu aise kohiai ie, edi sipisipi ro kamitiai se

⁶ kowahau e sabowa to. Taie nou ro ibo namuturubi aboto, “Dou-rimo abora kamade anamadimi-iworohuti-ri, mo aboudo edi sipisipi ro na-garasoperai ta-nowea.”

⁷ Ina idaibo sosoro ie Godi nu sowake urio mutu auna ia kamade ro kiwati ie Adiri sabowa ato urubia mere ubauba aboudo na-erewesegerai ina orio keremiro na-omidai. Ina idaibo sosoro ie 99 mea tuputupu urubia sapuwo to kamade auna se iamo-ri pua.’

Mani iopu na-gararaseperai nou totomu e

⁸ Ina ata totomu Iesu ro iato gimowauti ibo, ‘Ata orobo ro auna wisa siriba mani 10 to na-iworohuti, ina ata nato na-wasoperai nu keba se erempa se keremowatea ie, nou ro erempa pina to meana se nato kosora ie edi mani iopu ro, nou ro moto goro mea mino to kotobiti ie, womu tato nou ro kowea.

⁹ Nou ro beda tau ato owea iato namuturubi iromai. Nou ro ibo, “Dou-rimo abora kamade namadimi-iworohuti-ri. Mabu mo ro edi mani iopu ro na-naseperai abora ta-nowea.”

¹⁰ Ina idaibo sosoro ie urubia mere ubauba aboudo na-erewesegerai ina orio keremiro na-omidai Adiri sabowa ato Godi nou sowake urio mutu auna kamade ro kiwati ie.’

Urubia mere na-gararaseperai nou totomu e

¹¹ Ina Iesu ro ata totomu iato gimowauti ibo, ‘Ata dubu netewa teibo mere teibo mutu na-imidirotiti,

¹² ina saro mere nato gou-ro abera aboto nou ro ibo, “Idau oro ido to araburai-wiri, mo do to

edi namabu ro na-giapo, abora se domia-ro!"
Taie abera ro nou owera se girorowai mere
teibo nou ro erere se iato gimohoduti-ma.

¹³ Iedi saro mere ro na-geremowoiti taie imese
gasiriai ata muso duriomoro to. Taie ito
na-gorowateai nu edi mani gebari ro dorogara
se tanaro kisioidiro ato giporeai.

¹⁴ Taie tuturu to pua edi duriomoro ro nato
auna ia sogoi tau ro gereredeai. Nu ia ibose
asotaina gosora nu mani ta-giporeai.

¹⁵ Taie simara ubi ato nato gou sabowa kiauri
dubu aboto woko irobai ri. Nedi mere ro
sabowa kiauri dubu ro giro kemeauri woko
aboto gemeiriai.

¹⁶ Nu auna ia sogoi ro owatiti, giro ro edi
ohona ro ihotiti-mo, nou auna ubi ro owamotiti
kiho aboto. Kaupoti nou urubia aboudo ata tu
ata iaurititi pua.

¹⁷ Taie nu kimaragoidiro nato giwia nou ro
beda tanaro gisioidiro. Nou ro ibo, "Mo abera
edi sowake urubia ro neio meamea ohona
ihotiti-dumo. Kaupoti mo abora nou e sogoi ro
noti nowati aupise ie karaburai aboto.

¹⁸ Mo anama-orowameai-ri Idau aboto. Ina
mo ro ibo anama-utura-ri nou aboto, 'Idau mo
auna ubauba tanaro nisioidiro Godi aboto ibose
oro aboto.

¹⁹ Abora mo oro mere to kararasoro modobo
pua, mo oro sowake mere to
nama-ararasoro-ri.' "

²⁰ Taie nu abera aboto imese gorowameai-ro.
Abera ro mere muso rido ioudo gowea-ro
na-gou-ro nu auna nirimagare aise goi mere

aboto. Abera ro aise gemarario mere nou ro aise gohiai iato gosome kamade ri.

²¹ Mere ro ibo, “Idau mo auna ubauba tanaro nisioidiro Godi aboto ina ibose oro aboto. Abora mo modobo pua oro mere to kararasoro.”

²² Kaupoti abera ro woko urubia aboto ioudo gutura-ro, “Mea ia orio obotama samo to dememidai-rimo, tu reini dowori-mo, sairo pata teibo sairo ato demedea-mo.

²³ Ibose ata dubu ro mou burumukau dawade memopia-ro, abora soriomu e nimo kamade anamadimi-iworohuti-ri.

²⁴ Mo mere ta-garaburai abora nu pamo rido ta-orowameai-ro, nu tau se garaseperai kaupoti nu abora ta-nowea-mo.” Taie iato neio kamade ro gereredeae.

²⁵ Nou naramu pari aboudo na-gorowameai-ro, moto aupiaupi na-gemowaititi-ro nou ro nato girorowai kamade diamo na-garo-rimo moto goro ato.

²⁶ Nou ro ata sowake dubu nato gemodowa, “Moto goro ato etou tanaro ro ororosioiido-die?”

²⁷ Ina sowake dubu ro ibo, “Oro neama ta-orowameai-ro ina burumukau dawade ta-emopia oro abera ro, mabu oro neama mea se orowameai-die.”

²⁸ Naramu auna serawo ro gorobai, nu moto to odoro pua soriomu aboto. Ina nu abera ro aise gemosuruwo-ro binio to gemediawado odoro ri.

²⁹ Kaupoti keba mere ro ibo, “Ma-diauri! Mo sirio kisimisi ta-niporeai oro woko kemesioiido dibura dubu sosoro, ibose sirio tau oro ubi tanaro mo ro aise nisioidirotiti. Kaupoti mo namuturubi mutu oro ro ata nakomu ata

emapoi pua idaibo nanigosi dawade ata opia ri soriomu nari.

³⁰ Kaupoti oro edio mere ro na-orowameai-die oro ro edi mani ro na-gomia era gabo mamio ato giporeai. Ina nou e oro ro burumukau dawade nou emopia.”

³¹ Abera ro ibo, “Mona ia oro mo ia mere ie! Oro mo mutu nato atu se nimidirotiti-do. Mo edi namabu sirio ro oro do ie.

³² Nu nimo ro soriomu kamade mutu kemesioidiro modobo ie. Mabu oro neama buro ta-garaburai, ina abora nu pamo rido ta-orowameai-ro, nu tau se garaseperai kaupoti nu abora ta-nowea-mo.” ’

16

Namabu kemeauri dubu kimaragoidiro mutu e

¹ Iesu ro kowasoro urubia nedi totomu ro nou gimowauti, ‘Ata dubu besinisi mutu e. Taie nou edi namabu sirio ro ata dubu aboto nato giapoi emeauri ri. Taie iedi besinisi dubu ro ata tau ato urubia aboudo oweru nato girorowai ibo, “Oro mani kemeauri dubu ro namabu ubauba mino to emeauri.”

² Taie nou besinisi dubu ro aise gorumai-ro ou ri nou aboto. “Mo ro oro sapuwo to oweru ta-nirorowai. Oro ro etou tanaro gisioidiro? Abora oro ro peba titi dosioidiro nedi besinisi ro oro ro beda mino to gowaboi. Mabu oro mo ro woko rido anama-owagare-ri.”

³ Taie edi kemeauri dubu ro nakara se iato gimaragoidiro, “Mo woko rido nama-owagare-ri ina mo ro beda woko nama-isioidiro-ri sabowa to nama-orowameai-ri? Mo aboudo modobo pua

pari gowo bobo woko kimesioidiro, ibose namabu ri korowaro siripo ie amia urubia aboto.

⁴ Mo dese to umoro noti noi ibo mo ro beda tanaro nama-osioidiro-ri, ina noudo ie mo woko kaseperai ato, urubia ro mo anamadimo-owoiriamuti-ri."

⁵ Taie edi kemeauri dubu ro urubia nou ro iato girumai namabu doro to etio ro gimade-rimo besinisi dubu aboudo. Nou ro keba dubu iato gemodowa ibo, "Oro ro besinisi dubu aboudo doro to beda mutu namabu gimidai?"

⁶ Nou ro ibo, "Mo ro 100 oribi isi doromu nou nimidai."

Ina kemeauri dubu ro ibo, "Domi, doro peba ato disioidiro 50 oribi isi doromu."

⁷ Ibose ina kemeauri dubu ro ata dubu aboto iato gapimaidiro, "Oro ro beda mutu gimidai?"

Nou ro ibo, "Mo ro 100 parowa baiko nimidai."

Ina kemeauri dubu ro ibo, "Domi, peba ato disioidiro 80 parowa baiko diatiti."

⁸ Besinisi dubu ro owera na-girorowai nou sapuwo to, nou ro iedi kerewai kerewai kemeauri dubu ro iato gemowabu edi tanaro ro na-gisioidiro. Mabu kemeauri dubu kimaragoidiro tututu mutu e.

Io, sopo duriomoro urubia auna umoro ie kimaragoidiro mutu tanaro kisioidiro aboto. Kaupoti etio ro orowotoi woroworo ato neio umoro auna se iamo pua idaibo tanaro nou kisioidiro aboto.

⁹ Nio mo ro a-nimowapotai ibo, sabowa gabogabo urubia na-orowomidiro neio mutu aise gi-idabuti-ri, duriomoro namabu aise

gi-iaiwo-ri namabu tato urubia aboto. Neio ido oro namuturubi to amadima-ararasoro-ri. Ina noudo ie oro Godi ro kamade mutu amadi-emaiddorai-ri womu tato womu tato keremiro aboto na-owamo-die Adiri sabowa ato.

¹⁰ Ina etio ra kainakaina namabu mea se na-iauri-dumo ina ido auna sosoro namabu neio ro mea se amadimi-iauri-ri. Etio ra kainakaina namabu ubauba se na-iauri-dumo ina ibose auna sosoro namabu neio ro mea se iauri-ri pua.

¹¹ Oro ro sopo namabu nato mea se iauri tato, ina oro morobise keremiro namabu Godi ro etou sapuwo to ama-omia-ri kemauro aboto?

¹² Ata dubu namabu oro ro emasogoro tato, ina oro simara sapuwo to namabu etio ro amadimo-omio-ri?

¹³ Ata dubu ata ro modobo ia pua netewa teibo eputa dubu teibo ubi woko kimesioidiro-ma. Nou ro ata eputa dubu nirimagare kemati ie, ina ata eputa dubu aboto ubi tato koi ie. Ata eputa dubu owera se kirowidiro ie ina ata eputa dubu owera aise kemowabeouti ie. Nio ro modobo pua Godi ubi gabo ato koroho ina namabu ubi gabo ato koroho. Godi ra namabu ra nio ro eputa dubu teibo to iasoro-mari pua. Imese gabo tato ia ie.'

Iesu ro urubia arua owera gimowauti

¹⁴ Iedi Parasi urubia ro na-gorowotoi Iesu ro beda tau ato gimowauti owera neio ro na-girorowai-rimo mani sapuwo to, nou neio ro sete to gedea-rimo mabu neio mani sogoi urubia ie.

¹⁵ Taie nou ro ibo Parasi urubia aboto, 'Nio urubia sosoro gabo ato nakara se arasoro-dumo

meamea urubia to. Kaupoti Godi umoro ie nio maumo beda sosoro iamo. Urubia ro meana to edi tanaro ro na-iasoro-dumo, isana iedi tanaro ro Godi ro ubauba ia to iasoro-die.

¹⁶ Mose ro edi sabi giaiwai-ro ibose Godi ipusu oweru urubia ro edi buka ro na-gisioidiro-rimo urubia neido gitamudiro-rimo womu tato Ioane neito ti-gorowapotai-ro. Ioane edi tau ato gou-ro womu tato abora Godi ro kiwaboi tanaro sapuwo to imowauti-dumo. Iedi tau ro nato urubia sirio pupuwo aise iasibowado-dumo Godi edi kiwaboi maumo ro neito odouti ri.

¹⁷ Kaupoti edi sabi sirio ro womu to ererede-ri pua. Nedi duriomoro gebari ro, toboro mutu saiki ata womu to amadi-ererede-ri. Kaupoti Mose edi sabi sirio ro nou aboudo ata kainai oweru ata ararasoperai-ri pua.

¹⁸ Beda dubu ro kararubia ra nu simara orobo, ina nou ro ata orobo nato na-edea, io nu Godi sosoro gabo ato piro tanaro kosioidiro ie. Ibose iedi kararubia orobo ro ata dubu ro nato na-edea, iedi dubu ro kedea ra Godi sosoro gabo ato nou ro piro tanaro kosioidiro ie.'

Suana sirio dubu Reseresi mutu nou totomu e

¹⁹ Iesu ro ata totomu ibo gimowauti, 'Ata dubu suana sirio dubu e, nu meamea obotama neito iremedutiti. Suana nou ro iosoratiti pua, modobomodobo ato iamotiti.

²⁰ Ina ibose edi duriomoro ro nato ata ikonikoni dubu ta-gomidiro masiro Reseresi, nou suana tato dubu e. Sirio tau nou simara namuturubi ro aise oworohotiti-mo edi suana sirio dubu ro nou moto araradi to.

²¹ Reseresi auna ubi ro owamotiti suana sirio dubu edi ohona mapapati ro, okoko soro barugu ato na-iaremotiti nou kiho aboto. Isana nu ikoni soka ro owosometiti-mo sapuwo to nou kiho ie.

²² Imese sirio tau ibo irowatiti womu tato nou ti-garaburai. Nou urio Godi sowake urio ro aise gorobai-rimo taie imese gowou-rimo, Aberaham edi tumodi sapuwo ro nato gowomi-rimo. Ibose edi suana sirio dubu ro, tuturu to omidiro pua, nu saro rido iato aise garaburai. Nu pamo durupi bobo to na-gedea-rimo

²³ urio aise gemobodiai era duriomoro to, nu temeteme iamo iato emarotiti. Taie nu muso rido neido na-girarowea nou ro Aberaham se gowea Reseresi mutu mea se gomidiro-rido.

²⁴ Suana sirio dubu ro ibo, “Abera Aberaham! Mo natonato demati-ro, Reseresi demowapotai, mo obo nupu neito memowarario-ro amatoko owododoria na ie, mo nato era korosa ro nowea temeteme iamo nemaro.”

²⁵ Kaupoti nu Aberaham ro ibo gemowameai, “Mona ia nasa oro aboto, ma-dimaragoidiro nitiro keba se duriomoro ato na-imidirotiti-do meamea namabu oro ro ta-iaurititi, kaupoti Raserese ubauba to imdirotiti. Nu abora Reseresi tau e, nu kamade iworohuti. Ma-dowea oro abora temeteme iamo noti imaro.

²⁶ Ina oro ro a-iauri ra, turi bobo gebari towamo, ma-dowea auna bobo ie. Reseresi ro modobo pua ito kabu, ina oro ioudo kabu neitiro aboto bobo gebari ie ma-dowea-ro, gabo tato ie.”

²⁷ Ina suana sirio dubu ro ibo, “Abera Aberaham, idaibo gutura-ro! Ina modobo ra Reseresi kemeiriai

²⁸ mo 5 niramio sabowa ato ta-nimeserai. Modobo ra nu ito kou neibi nou ro imowapotai-biri ibo modobo pua neibi ata neito kou mo beda temeteme moro ato nomidiro.”

²⁹ Kaupoti Aberaham ro ibo, “Nirimagare Mose edi sabi sirio ro na-gisioidiro iato tiamo ina Godi ipusu oweru urubia ro edi oweru ro na-gisioidiro-rimo neibi abato tiamo, modobo ie iedi oweru ro neibi ro nou kibodoro.”

³⁰ Suana sirio dubu ro ibo, “E e Abera Aberaham ata pamo dubu ata ro ama-ou-ri neibi nou ro ama-imowapotai-biri, taie nato aise amabime-erewesegerai-ri ubauba aboudo.”

³¹ Kaupoti nu Aberaham ro ibo gemowameai, “Mose edi sabi sirio ro ibose Godi ipusu oweru urubia ro edi oweru ro na-gisioidiro-rimo neibi ro kirowidiro tato, ina pamo dubu neibi aboto kou sekere neibi modobo pua nou ro kiwesegerai-ibi.” ’

17

Iesu ro ubauba sapuwo to gitamudiro

¹ Iesu ro ibo kowasoro urubia aboto, ‘Koko kiwaibirio tanaro amadidimo-ou-ri urubia ubauba tanaro kisoidiro aboto. Etu ro kowaboi ra ata mere kainai ubauba tanaro kosoidiro aboto, nou ro auna ia ubauba wisa koweia ie.

² Godi nou aboto auna serawo ama-oi-ri. Beda dubu ro gowodoro mere kainai ubauba to nou aboudo modobo ie auna nadi wagoha rudo kemebuai oromo damo to keherai, nedi wisa ro kainai ie. Kaupoti Godi ro iedi wisa ro namadi-aiwai-ri nou aboto auna ia ubauba wisa nou ro ama-oweia-ri.

³ Mea se deremowotoi! Oro aboto boinana kimibiria dubu ro ubauba tanaro na-wosioidiro, nu hio to demadowerai ibo, “Oro ro ubauba tanaro osioidiro. Ba-dorodiobo ido osioidiro ate.” Ina nu nama-erewesegerai-ri nu edi ubauba ro oro ro nato ba-dematopeamuti.

⁴ Ina ibose nedi atu dubu ro nou ro kaupoti saiki ato omuomu se na-isioidiro ubauba tanaro oro aboto, ina atu saiki ato omuomu se na-orowame-die oro aboto ibo “Nirimagare, nedi ubauba ro nou aboudo imese nerewesegerai.” Io oro ro modobo ie nu ubauba kematopeamuti.’

Iesu ro kimibiria sapuwo to gitamudiro

⁵ Kitiodorai urubia ro ibo Abera Naramu aboto, ‘Nimo kimibiria pupuwo dimowai-ro!’

⁶ Ina neio Abera Naramu ro ibo gimowameai, ‘Nio abato kimibiria mirie iopu kainakaina sosoro kiamo ato, nio ro kutura ie deimi ota aboto ibo, “Oro daraubai sipi mutu nakara se dodori oromo ito, iato nakara se ba-dararo.” Oro ro kutura owera nou ro kosioidiro ie, nu kodori ie oromo turi ato nakara se karararo ie.’

Wisa tato woko urubia sapuwo to gitamudiro

⁷ ‘Etu umoro ra nio ata ro wisa tato woko dubu ata na-oworohuti, ina nu pari abato koroho ie o sipisipi kimowotoi. Ina ioudo na-orowameai-die nu oro ro ibo kemowapotai ra? “Oro demobodiai ohona ta-nemaremuti aise ba-diho.” E e, oro ro idaibo owera utura-ri pua nou aboto.

⁸ Oro ro nu ibo kemowapotai ie, “Oro nama-eremododiai-ri mo ohona nato ba-demaremuti-ro. Mo kiho nama-oroporeai-ri, oro mo mapapati saro rido nato ama-iho-ri.”

⁹ Ina nedi wisa tato woko dubu ro oro owera to woko nama-oporeai-ri nou aboto oro ro eso owera kutura ra? E e, utura-ri pua.

¹⁰ Nedi owera ro nio aboto ou-die. Nio Godi ro edi woko gimapoi-ro isioidiro ri nio ro kiporeai ato, modobo ie nio ibo karo, “Nimo meamea urubia pua, dorogora se wisa tato woko urubia ie, idaibo woko nou ri nisioidirotiti-dumo.” ’

Iesu aboto eso owera mutu daimodaimo dubu ro gorowameai

¹¹ Iesu Ierusarema sabowa to na-gou, nou ro Gariri duriomoro Samaria duriomoro neitiro edi turi mesebearo nou se gorohodorai-ro.

¹² Turi mesebearo ato, ata sabowa kainai ta-gowamo, nu ito na-godoro 10 katio urubia ro nato gowea-rimo. Neio ro Iesu na-gowea-rimo

¹³ muso rido ioudo gutura-rimo, ‘Abera Naramu, Iesu! Nimo natonato dimati-ro, nimo oro ro kiwarebai modobo ie.’

¹⁴ Neio Iesu ro na-giwi, nou ro ibo neio aboto, ‘Nio dou-mo Godi ra urubia ra turituri urubia aboto, neio aboto durupi ba-diwapotai-mo ibo nio katio ta-ioiriai-mo.’ Taie neio Iesu owera se girorowai-rimo imese gou-rimo neio aboto. Iedi 10 katio urubia ro na-gou-rimo gabo ipi ato neio ta-geremasibai-rimo ibo nimo katio ta-ioiriai-mo.

¹⁵ Taie kaupoti dubu ro se gorowameai-ro Iesu aboto, ina Godi nou ro auna se iato gemowabu.

¹⁶ Taie ioudo na-gou-ro Iesu sairo mabu ato kauhio to aise girimusubua sosoro woidomari goto to iato giwaposowa, eso owera iato garo Iesu aboto. Nedi dubu ro gorowameai-ro nu Samaria dubu e.

¹⁷ Ina Iesu ro ibo, 'Neio 10 urubia ie meana atu se a-woi-mo ra? Ina nu borubi boira?

¹⁸ Nedi daimodaimo dubu ro nakara se orowameai-die Godi aboto eso owera aro ri.'

¹⁹ Ina Iesu ro iato gutura nou aboto, 'Deribua-ro! Ba-dorowameai simara sabowa to, oro simara kimibiria ro meana nou ro ta-wowai.'

Godi ro kiwaboi tanaro beda tau ato amadi-orowateai-ri

²⁰ Arua Parasi urubia ro Iesu ibo gemodowa-rimo, 'Godi ro kiwaboi tanaro beda tau ato amadi-orowateai-ri nimo aboto?'

Taie neio Iesu ro ibo gimowameai, 'Godi ro kiwaboi tanaro beda tau ato namadi-orowateai-ri, nu urubia ro kiauri mino to orowateai-ri pua.

²¹ Nio amia urubia ro igediouti-ri pua, ibo "Godi ro kiwaboi tanaro nou e neito dou-rimo!" Ina arua ro ibo aro-ri pua, "E e ito mamou nou pua neito dou-rimo, Godi ro kiwaboi tanaro nato towamo." Mabu Godi ro kiwaboi tanaro ata moro ato owamo pua nio ia abato towamo.'

Iesu edi tau ato namadi-orowameai-ri

²² Taie Iesu aise gerewesegerai nou simara kowasoro urubia aboto, 'Ata koko tau tou-die Imese Urubia Kiauri Dubu mo kou aboto nio auna ubi ro ama-iamo-ri mo kowea aboto. Kaupoti iedi tau ro nato mo nato orowameai-ri pua.

²³ Arua urubia ro ioudo amadidimu-utura-ri, "Ei neito dirarowea-rimo urubia dubu nou e, neito dou-rimo!" Ina arua urubia ro amadimu-utura-ri, "E e ito mamou neito dou-rimo nu nou e. Imese Urubia Kiauri Dubu nu nato tomidiro!" Kaupoti nio keba se bato

gotobowa-rimo iato aise dorowotoi, nio ro modobo pua arua urubia kibodoidiro mo osora ri.

²⁴ Imese Urubia Kiauri Dubu edio tau ato namadi-orowameai-ri nedi duriomoro ro neito, beda sosoro ra penenio na-erememiai toboro ato sapuwo rido sapuwo to.

²⁵ Kibase nedi dubu ro urubia ro amadimo-ohoio-ri, ibose edi tau ro nato nu temeteme ama-iwia-ri.

²⁶ Noa tau ato urubia beda sosoro gorowomidiro urubia idaibo mino to ibose to ama-orowomidiro-ri Imese Urubia Kiauri Dubu namadi-orowameai-ri.

²⁷ Urubia ro nedi tanaro ro nou isioidiro-titi-mo, kiho kidio kararemo edi tau ro nato, womu tato Noa ti-godoro ota bokose pe to, taie imese urubia sirio obo ro aise giopia.

²⁸ Ina ibose, urubia beda sosoro gorowomidiro Roti tau ato, urubia idaibo mino to ibose ama-orowomidiro-ri Imese Urubia Kiauri Dubu nato amadi-orowameai-ri. Neio kiho, kidio, namabu korowamamade, namabu keremahudirio, pari kisioidiro, moto keremari idaibo tanaro nou isioidiro-titi-mo Roti tau ato.

²⁹ Kaupoti Roti Sodom sabowa kowaroho duwoduwo ato na-gemeserai-ro, iato era mio daroho iopu sosoro ubauba nibo mutu toboro rido Godi ro nato gemeiriai-ro edi tau ro nato imese urubia aise gipisiamuti.

³⁰ Imese Urubia Kiauri Dubu namadi-orowameai-ri nou idaibo tanaro neio ro amadimo-ororosiodiro-ri.

³¹ Iedi saiki ro nato ata dubu moto maumo ato nama-oroho-ri, nou modobo pua karatea moto

goro to namabu imidai ri. Ibose ata dubu pari abato nama-oroho-ri nedi tanaro ro nato nama-owea-ri, nou modobo pua korowameai sabowa to.

³² Ina nio ro a-imaragoidiro-dumo ra etou tanaro ro gororosioihiro Roti orobo aboto?

³³ Ina etio ra simara durupi sapuwo to na-eremaragoidiro-dumo, neio edi keremiro ro saiki ata amadimi-iasoperai-ri. Etio ra keremiro na-iasepere-dumo mo sapuwo to, nedi urubia ro orio keremiro amadimi-iauri-ri.

³⁴ Nio mo ro ibo a-nimowapotai, iedi duwo ro nato netewa teibo dubu teibo kaupoti moto ato nama-irobu-mari, Godi ro ata se ama-orobai-ri ata amadi-emeserai-ri.

³⁵⁻³⁶ Ibose netewa teibo orobo teibo neitiro ohona kisioidiro moro ato namadi-iwia-mari Godi ro ata se ama-orobai-ri ata imese amadi-emeserai-ri.'

³⁷ Ina Iesu kowasoro urubia ro nato gemodowa-rimo, 'Abera Naramu nedi tanaro sirio ro beda moro ato amadimo-ororosioihiro-ri?'

Ina Iesu ro neio ibo gimowameai, 'Pamo durupi beda moro ato irobu ina banawario sirio neio nibo aboto ito ama-iroruwoidiro-ri.'

18

Garamu orobo koto kiauri dubu mutu

¹ Iesu ro kowasoro urubia nedi totomu ro nouto gimowauti, mabu nou ubi ie neio sirio tau Godi aboto aise kararatoro. Neio kararatoro oweri wisa kimowame tato, modobo pua neio pupuwo tato ro kirobowado.

² ‘Ata sabowa ato koto kiauri dubu iato ta-imidirotiti nou ro Godi sapuwo to auna se imaragoidirotiti pua, ibose nou ro urubia sapuwo to auna se imaragoidirotiti pua.

³ Ina ibose edi atu sabowa ro nato ta-imidirotiti ata garamu orobo. Edi garamu orobo ro nu omuomu se irohotiti oweru mutu koto kiauri dubu aboto, “Edi dubu ro gosioihiro ubauba mo aboto, mo dowaebai-ro mea se koto oweru tuputupu se kiamo aboto!”

⁴ Ina koto kiauri dubu edi tau ro nato egea mere se ubi tato ta-goi edi garamu orobo ro kowaebai aboto. Kaupoti saro gabo ato nou kimaragoihiro ato ibo gereredea-rimo, “Mo ro Godi sapuwo to auna se imaragoidirotiti pua, ibose urubia sapuwo to auna se imaragoidirotiti pua.

⁵ Kaupoti edi garamu orobo ro mo nou ro aise nemaubere-die. Abora nu anama-owaebai-ri, mo ro tuputupu tanaro kisioidiro modobo ie nou aboto, mo nou ro masawe kemowaititi modobo pua.”

⁶ Taie Abera Naramu ro ibo, ‘Oweru neito ma-dirowihiro-rimo, kaupoti sapuwo to kiwatuti koto kiauri dubu ro nio ro ma-demaragoihiro-mo nou ro beda oweru to gutura.

⁷ Godi sirio tau umoro aise iamotiti-die duwo saiki na-irowarotiti-dumo nou ro edi urubia ro girapoi-ro nou ro tuputupu tanaro neio aboto kisioidiro ie. Ibo pua nou umodi neio kararatoro oweru wisa kimowame aboto.

⁸ Nio mo ro ibo mimowapotai-ro neio edi kararatoro oweru ro wisa Godi ro tuputupu

mino to kimowame ie.

Kaupoti Imese Urubia Kiauri Dubu mo nou se ie, neito namadi-orowameai-ri, mo ro urubia kimibiria mutu sirio se anamadi-atowamo-ri ra?

Godi aboto aupise beda sosoro kosiomai ra

⁹ Arua keremowabu urubia iato ta-gorowomidiro. Iedi urubia ro idaibo kimaragoidiro nou giworohuti-rimo. 'Nimo meamea tuputupu urubia ie, ibo pua arua urubia sosoro. Neio ubauba tanaro kisioidiro urubia ie.'

Ina noudo ie Iesu ro neio totomu ibo gimowauti. Nou ro ibo,

¹⁰ 'Ata tau ata Parasi dubu imese gidiai Tarena Moto to Godi aboto araratoro ri. Nedi tau ro nato ata takesi kimade dubu ibose to gidiai Tarena Moto to Godi aboto araratoro ri.

¹¹ Parasi dubu aise gotobowa, taie nou simara sapuwo to Godi aboto nato garatoro. "Godi, oro aboto mo ro eso owera naro mabu mo amia urubia sosoro pua, piro tanaro kisioidiro, ubauba tanaro kisioidiro, arua mamio mutu koroho. Ina ibose iedi takesi kimade dubu ro na-otoi-die mo nou sosoro pua.

¹² Kaupoti woiki maumo ato mo kiho tato komidiro ie saiki teibo to. Mo ro duriomoro namabu 10 soirio to kidabuti ato, kaupoti soirio oro aboto aise kiaiwo ie."

¹³ Takesi kimade dubu nu musomuso se gotoi-ro pari mabu ato gimatarumowado-ro. Nou modobo pua Adiri to kawota tu teibo hoko ato aise geremohiai nou nakara se umoro ie ibo nou ubauba dubu e. Taie nou ro ibo, "Godi mo natonato demati-ro mo imese ubauba tanaro kisioidiro dubu e."

¹⁴ Iesu ro ibo, 'Nio mo ro a-nimowapotai nedi takesi kimade dubu ro na-gorowameai simara moto to, nou Godi ro mea tuputupu dubu to gapoi. Kaupoti nedi Parasi dubu ro Godi ro mea tuputupu dubu to apoi pua.

Nakara se awawo to beda urubia ro ararasoro-dumo neio saiki ata Godi ro sopu to amadi-iwororuwo-ri. Ina etio ra dorogora se urubia keremowabu tato, saiki ata neio Godi ro ohu to ama-iwioidiro-ri.'

Etio ro amadimo-odoro-ri Godi edi kiwaboi maumo ro neito

¹⁵ Arua urubia ro merebusere kainakaina Iesu aboto nato giworoho-rimo nou ro tu itomo ri korosa kimio sapuwo to. Ina nedi tanaro ro kowasoro urubia ro na-gowea-rimo, neio masawe ro giwati mamio abeamio aboto. Merebusere kainakaina neio ro aise gibeouti-rimo neio ubi tato ie Iesu aboto kiworoho.

¹⁶ Kaupoti Iesu ro kowasoro urubia neito gimowapotai, 'Merebusere kainakaina nio ro igidiobuti-mo. Neio mo aboto mou-rimo. Mabu Godi ro kiwaboi tanaro idaibo merebusere kainakaina neio aboudo kodouti gabo modobo ato aidiro-die.

¹⁷ Ina nio morobise owera nimowapotai, etio ra Godi ro kiwaboi tanaro maumo ro neito kodoro tato, merebusere kainakaina ro beda sosoro to odouti-dumo, iedi urubia ro Godi edi kiwaboi tanaro maumo ro neito kodouti modobo pua.'

Eputa dubu karatodai owera ie

18 Ata eputa dubu ro Iesu ibo garatodai, 'Mea kitamudiro dubu, womu tato womu tato keremiro mo ro beda sosoro anama-owea-ri?'

19 Ina Iesu ro nu ibo gemowameai, 'Mo oro ro mea dubu to etou mabu ato napoi-die? Ata mea dubu ata omidiro pua, Godi kaupoti nou se ie imese meana ie.

20 Mose edi sabi sirio ro na-gisioidiro oro auna umoro ie, idaibo *Oro modobo pua arua mamio mutu koroho. Urubia iopiauti mamu. Arua urubia nakomu piro to iwopiro mamu. Koto tau ato urubia owera kakate moro to imoworohuti mamu. Mamu ra abera ra mea mino to gi-iauri-mari.*

21 Kaupoti edi eputa dubu ro, nou ro ibo, 'To nedi sabi ro mo ro kainai rido naratamuai mea mino to nibodorotiti.'

22 Iesu ro na-girorowai edi owera ro nou ro ibo, 'Kaupoti hodo oro aboudo torororidiro-die, oro ba-dorowameai sabowa to oro edi suana sirio ro na-iworohuti mani to ba-mowamade-mo. Ina edi mani ro namabu tato urubia oro ro neito ba-diwarebai. Oro ro nedi tanaro ro nama-osiodiro-ri, ido oro ro meamea wisa ama-iwia-ri Adiri sabowa ato. Ina mo nato ba-dobodoro-ro.'

23 Kaupoti iedi dubu ro nedi owera ro na-girorowai nou kamade tato aise goi, mabu nu sirio namabu aboto auna se gimaragoidiro.

24 Iesu idomari teibo nou ato se giwotobowa-ma nou ro ibo, 'Suana sirio dubu aboudo koko ia ie Godi edi kiwabo tanaro maumo ro neito kodoro.

25 Io idaibo sosoro ie kemoro nira goro rido kodoro ra, ina keresia ra ata sapuwo to?

Modobo ia pua io! Ina idaibo sosoro ie suana sirio dubu ro kodoro koko ia ie Godi ro kiwaboi tanaro maumo ro neito.'

²⁶ Urubia sirio ro na-girorowai-rimo nedi oweru ro neio ro Iesu iato gemowameai-rimo, 'Ina womu tato keremiro etio ro amadimo-owea-ri?'

²⁷ Ina neio Iesu ro ibo gimowameai, 'Urubia ro kisioi diro tato tanaro io Godi aboudo modobo ie.'

²⁸ Pita ro iato gutura Iesu aboto, 'Imese beda mutu nakomu sirio ra nimo ro ta-nimeserai-rimo. Oro nimo ro saro rido ti-nowasoro-dumo.'

²⁹ Iesu ro ibo, 'Nio mo ro morobise oweru mimowapotai-ro. Etio ro imesere-dumo neio simara sabowa, upi, naminiramio, mamio abeamio, merebusere Godi edi kiwaboi tanaro ro nou sapuwo to,

³⁰ neio ro sirio se nedi duriomoro nato amadimi-iwia-ri. Ina ibose ido, womu tato womu tato keremiro neio ro nou amadimi-imidai-ri.'

Iesu ina geremabowa simara pamo sapuwo to

³¹ Iesu ro 12 kowasoro urubia soirio maumo rido aise giwatateai-ro nakara moro to, iato nou ro ibo gimowapotai, 'Nimo Ierusarema sabowa to nidiai-dumo. Imese Urubia Kiauri Dubu sapuwo to oweru Godi ipusu oweru urubia ro keba se ta-gisioi diro-rimo. Nu beda sosoro amadimo-oworohuti-ri morobise to iato amadimo-ororosioi diro-ri Ierusarema sabowa ato.

³² Nu neio ro Iu oweru karo tato urubia aboto amadima-apoi-ri. Ina amadime-emasosowado-ri, marato oweru to

amadime-amaro-ri, gase to amadima-amoruti-ri.
Ibose nou kerei to ubauba mino to
amadime-epesuti-ri. Saro to nu iato
amadimo-opia-ri.

³³ Kaupoti nu bobo ato netewa teibo saiki to
ama-orobu-ri netewa didi saiki nama-orobai-ri
nu pamo rido amadi-orowameai-ri keremiro to.'

³⁴ Iesu kowasoro urubia ro nu edi oweru ro
maumo mea se ememidai pua, oweru maumo
Godi ro a-gowopirua neio aboudo. Neio
eremasibai pua Iesu ro beda tanaro sapuwo to
gimowauti.

Iesu ro pogo dubu idomari teibo meana gemowai

³⁵ Iesu Ieriko sabowa to aupi se gowamo
korowateai, iato ata idomari pogo dubu gabo
kakate ato gomidiro, nou ro koroho urubia
namabu ri giwaro.

³⁶ Nou ro urubia sirio sairo diamo gare
gimedeia na-goroho-rimo, nou ro urubia iato
gimodowa, 'Io etou tanaro ro
ororosioidiro-dioumo?'

³⁷ Ina aupi urubia ro ibo, 'Nasareta sabowa
dubu Iesu io nou ro ou-die.'

³⁸ Ina edi pogo dubu ro nato giaea-ro, 'Iesu oro
Godi ro Kohodowa Dubu e, mo natonato
demati-ro!'

³⁹ Iedi urubia ro gou-rimo kebase nu neio ro
oweru aise gemadohuti-rimo. Kaupoti nu idaibo
neio ro pupuwo bo gemowai-rimo. Ina nou ro
auna ia se iato giaea, 'Iesu oro Godi ro
Kohodowa Dubu e, mo natonato demati-ro!'

⁴⁰ Iesu ro na-girorowai edi owera ro nu aise gotobowa gabo kakate ato. Taie nou ro ibo, 'Iedi dubu ro mo aboto neito dowou-rimo.'

Taie iedi idomari pogo dubu ro Iesu aboto na-gorowateai-ro, nou ro nato gemodowa,

⁴¹ 'Mo ro etou tanaro nama-osioihiro-ri oro aboto?'

Ina idomari pogo dubu ro ibo, 'Abera Naramu, mo ubi ie mea se kirarowo aboto.'

⁴² Taie Iesu ro ibo, 'Oro abora ma-dirarowea. Mabu oro edi kimibiria ro mo abato na-owamo oro nou ro meana ta-owai.'

⁴³ Iesu ro iedi tau ato gutura iedi owera ro iedi pogo dubu ro namabu sirio nato mea se giwia. Taie nu auna kamade goi, iato Iesu aboto aise garadabuai, kamade ri Godi nou ro iato gemowabu. Iesu ro edi tanaro ro na-gosioihiro urubia sirio ro na-gowea-rimo neio ro Godi nato aise gemowabu-rimo.

19

Sekiasi ubauba aboudo gerewesegeai-ro

¹ Iesu Ieriko sabowa aupiaupi na-gemowaititi-ro kodoro aboto ie

² ata dubu iato imidiro nou namabu sirio dubu e. Nedi dubu ro nou takesi mani kimade auna dubu e masiro Sekiasi.

³ Sekiasi komukere dubu e Iesu sosoro kowea modobo pua urubia dubu patu maumo rido. Kaupoti nou auna ubi ro gowamo Iesu sosoro mea se kowea aboto.

⁴ Taie nu keba moro to na-girario ota ohu to aise gioihiro. Nou ro kimaragioihiro to ibo, 'Iesu

ibose to amadi-ou-ri mo ro nu sosoro mea se nato nama-emowea-ri.'

⁵ Iesu ioudo na-gou-ro nu idomari na-gimeriai-ro nou ro Sekiasi se gowea ota ohu ato na-gomidi-ro. Taie Iesu ro ibo, 'Sekiasi, mo abora oro abato anama-omidi-ro, samo to dororuwo-ro.'

⁶ Taie Sekiasi ro na-girorowai nedi owera ro nu ota ohu rido hio ito to aise gororuwo-ro. Taie Iesu nou ro kamade mutu aise gohiai iato neitiro atu se imese gou-rido nou moto to.

⁷ Urubia sirio ro na-girorowai-rimo Iesu ro beda owera gutura Sekiasi aboto, neio auna masawe goi-rimo. Neio ro ibo, 'Iesu modobo pua piro dubu ro na-wadabuai nou moto ato omidi-ro-ri.'

⁸ Kaupoti Sekiasi aise geribidi-ro, nou ro ibo, 'Abera Naramu owera neito ma-dirorowai-ro mo aboto, mo edi namabu sirio ro na-niworohuti turi ato anama-iapepea-ri sapuwo namabu tato urubia neio anama-imio-ri. Mo ro takesi mani piro to edi urubia aboudo na-nimadetiti-ro neio mo ro anama-imowame-ri, ina ohu rido iato anama-imotomo-ri.'

⁹ Taie Iesu ro na-girorowai nedi owera ro nou ro ibo, 'Oro Aberaham gu dubu e. Ina noudo ie oro moto urubia oro ia mutu, nio Godi ro simara ubauba aboudo ta-iapopo-ro.

¹⁰ Mabu Imese Urubia Kiauri Dubu mo nou se ie mo nedi duriomoro neito nou ri nou-ro, etio ro garasoperai-rimo Godi aboudo neio iosora ri ina iapopo ri.'

Totomu netewa didi sowake dubu peteibi sapuwo to ie

¹¹ Iesu ro urubia sirio nedi totomu ro nou gimowauti mabu nu aupise ie Ierusarema sabowa to korowameai aboto. Neio ro ata mino to gimaragoidiro-rimo ibo Godi ro kiwaboi tanaro samo ito amadi-ororosioiido-ro Ierusarema sabowa ato. Ina noudo ie

¹² Iesu ro ibo, 'Ata auna dubu nu muso duriomoro to gou eputa dubu masiro omidai ri. Ina nu ioudo orowameai rie simara duriomoro to, eputa dubu to nou ro omidiro rie.

¹³ Nu ido gasiriai ito, tauo kebase nou ro 10 sowake urubia giramairiai-ro. Taie neio erere se mani nato gimio. Nou ro ibo, "Nedi mani ro neito besinisi ba-ditamudiro-mo womu tato mo neito korowameai nio aboto."

¹⁴ Kaupoti nedi dubu ro duriomoro urubia ro a-gohoio-rimo neio ubi tato ie nou ro komidiro aboto eputa dubu to. Taie neio ro arua urubia nato gimeriai-rimo, nou neio ro saro rido gobodoro-rimo. Neio ro ibo, "Nimo ubi tato ie nedi dubu ro nimo eputa dubu to nou ro kararasoro."

¹⁵ Kaupoti nedi dubu ro eputa dubu masiro aise gomidai, taie nu iato simara duriomoro to aise gorowameai-ro. Nou ro ibo, "Dirumai-mo iedi sowake urubia ro mo ro mani keba se etio aboto niaiwo, mo umoro oi rie ibo, neio ro orio mani beda mutu giwia-dumo."

¹⁶ Keba dubu ro ibo, "Auna dubu, mo oro ro edi mani iopu ro na-nomia-ro, mo ro 10 tau to orio mani ta-nosioidiro."

¹⁷ Eputa dubu ro ibo, "Oro mea sowake dubu e, oro umoro ie kainakaina tanaro kisioidiro mea mino to. Oro mo ro auna sosoro woko

nama-omia-ri. Oro gabamani to nama-owomi-ri
10 awawo sabowa oro ro ama-iauri-ri.”

¹⁸ Iato ata sowake dubu ro ibo, “Auna dubu, mo oro ro edi mani iopu ro na-nomia-ro mo ro neito 5 tau to orio mani ta-nosioidiro.”

¹⁹ Eputa dubu ro ibo, “Oro ibose mo ro auna woko anama-omia-ri. Oro ro 5 awawo sabowa ama-iauri-ri.”

²⁰ Taie iato ata dubu ro gosuruo-ro nou ro ibo, “Eputa dubu, oro mani nou e oro ro edina nomia-ro mo ro tako maumo ato nemoworohuti.

²¹ Mabu mo tere ie oro koko dubu e. Ata dubu ro kiedea ie edi namabu ro oro ro nou kimade ie. Oro sabowa ro oworohuti, oro woko kisioidiro pua.”

²² Eputa dubu ro ibo, “Oro imese ubauba sowake dubu e! Oro edi owera to na-warodie wisa oro aboto orowameai. Oro auna umoro ie mo koko dubu e, a? Ata dubu ro kiedea ie edi namabu ro mo ro kimade ie. Mo sabowa ro noroworohuti, mo woko kisioidiro pua.

²³ Mabu boira mo mani banega to emedea tato? Mo idaibo na-norowameai-die oro ro didi mani ohu rido ba-nemotomai.”

²⁴ Taie iedi eputa dubu ro aise gerewesegerai gomo ato edi urubia ro gorowotoi neio aboto nou ro ibo, “Iedi mani ro dowasiri-mo nou abato na-iamo, 10 tau to orio mani edi dubu ro gosioidiro nou aboto ba-daiwai-mo.”

²⁵ Kaupoti neio ro ibo, “Auna dubu, nu mani mutu e, nou ro 10 tau to orio mani ta-gosioidiro.”

²⁶ Ina eputa dubu ro ibo, “Etio abato na-iamo sirio se neio ohu rido anama-imotomo-ri. Ina etio abato ra kiamo tato, neio aboudo momuo se anama-iwatateai-ri.

²⁷ Abora mo nasa urubia boira mo etio ro neseai-rimo eputa dubu to komidiro aboto? Nedi urubia ro neito ba-diwou-rimo mo sosoro gabo to, neio nio ro nato ba-diopiauti-mo.” ’

Iesu eputa dubu to godoro Ierusalem sabowa to

²⁸ Iesu ro urubia totomu kimowauti na-goroporeai, nu keba se ioudo gasiriai-ro Ierusalem sabowa to.

²⁹ Oribi Podo abato edi sabowa teibo ro na-giamo-ma Betepage ra Betani ra aupise ie kiwasomai-ma iedi sabowa teibo ro. Taie nou ro netewa teibo kowasoro dubu teibo nato gimeiriai-ma ata sabowa to keba se ou ri. Taie nou ro ibo,

³⁰ Nitiro keba se dou-do edi sabowa ro neito, ba-dodoro-do sabowa goro to, nitiro ro iato amado-owea-ri orio doniki kainai kemobuai ama-otoi-ri. Nedi doniki kainai ro nou gimini ohu ato, ata dubu ata ro omidiro pua. Nitiro ro kowea ato ba-demopurutai-rido mo aboto neito ba-dowou-rido.

³¹ Nitiro ata dubu ata ro nama-imodowa-mari, “Etou mabu rido emopurutai-do edi doniki kainai ro?” Ina ba-demowapotai-do ibo, “Nimo Abera Naramu ubi ie nou ro koworohuti.” ’

³² Taie edi kowasoro dubu teibo ro keba se ioudo gasiriai-rido edi sabowa ro neito, iedi doniki kaini ro iato aise gowea-rido kemobuai na-gotoi. Iesu ro edi owera to gimowauti-ma, neitiro ro doniki kainai hodo to kemeubai kotoi se gatowamo-rido.

³³ Doniki namuturubi ro na-giwia-marimo kemopuruti moro ato, neio ro ibo, ‘E nitiro ro doniki kainai etou mabu rido emopurutai-do?’

³⁴ Ina kowasoro dubu teibo ro ibo, 'Neitiro neito Abera Naramu owera gabo modobo nou-diedo, nu ubi ie nedi doniki ro nou ro koworohuti.'

³⁵ Taie neitiro ro edi doniki kainai ro imese gowaguwo-rido Iesu aboto. Neitiro ro na-gowateai-rido nou aboto, neitiro edi ohu sedo ro aise gipuruti-rido doniki gimini ato iato gisouti-rido. Taie Iesu neitiro ro aise gowia-rido doniki gimini ohu to,

³⁶ Ierusarema sabowa to imese godoro edi doniki ro neito. Ina arua kowasoro urubia ro na-gowea-rimo neio ibose ohu sedo aise gipuruti-rimo, taie keba gabo moro ato iato gisouti-rimo.

³⁷ Nu Ierusarema sabowa kowasomai aupise ie, ipi gabo ato Oribi Podo gawagogo ato kowasoro urubia sirio auna topira ro gorobu. Neio ro beda pupuwo korosa tanaro iaurititi-mo neio auna kamade ro nou ri giwati, neio ro auna ia se Godi iato gemowabu-rimo.

³⁸ *Nimo Eputa Dubu nou se ie, Godi ro oro korosa ta-gomia, Abera Naramu pupuwo mutu oro nou se tou-die, korosa towamo oro abato. Adiri sabowa ato miro iato towamo-die, Godi ohu ato etu ro imidirotiti-die imese gebari pere ia ie!* Nedi owera ro neio ro Iesu neito gemowabu-rimo.

³⁹ Arua Parasi urubia ro na-girorowai-rimo kowasoro urubia kiaiauti moro ato, neio ro ibo, 'Kitamudiro dubu, oro kowasoro urubia dimadowerai! Modobo pua neio idaibo na-iaiauti-dumo!'

⁴⁰ Iesu ro neio ibo gimowameai, 'Nio mo ro imese nimowapotai, mo kowasoro urubia ro idaibo kiaiauti kemeserai rasiri ie, nadi ro ba-siaiauti-mo.'

⁴¹ Iesu Ierusarema sabowa aupiaupi na-gemowaititi, nou ro sabowa gebari na-gowea iato nou ro idobi se gememai.

⁴² Nou ro ibo, 'Mo imese auna ubi ro owamo abora nio ro umoro koi aboto ibo miro etou tanaro ro amadi-owou-ri. Kaupoti nio aboudo nedi tanaro ro abora ta-woropirowa.

⁴³ Auna ubauba tau nedi sabowa gebari ro nou ro ama-orobai-ri. Boso urubia ro amadime-emowaperai-ri, nadi amadimi-itomuti-ri neio kirarato moro ie.

⁴⁴ Ierusarema oro urubia mutu ubauba amadimo-owai-ri ata nakomu ata masiro ararasoro-ri pua, imese aise amadimo-opisiamuti-ri. Nedi tanaro sirio ro nou ri amadimo-ororosoidiro-ri, mabu Godi ia ro odoro-die nio ubauba aboudo iapopo ri, kaupoti nu nio ro mea se eibimai pua.'

Iesu Tarena Moto ato namabu gimagagawado

⁴⁵ Iesu edi kodoro ro na-godoro Tarena Moto kara goro to, nou ro nato namabu korowamade urubia sirio se giwia namabu gorowamade-rimo mani to. Taie edi urubia sirio ro nou ro ioudo aise gibodoidiro-ro.

⁴⁶ Nou ro ibo, 'Tarena Buka ato owera ibo tiamo *Mo moto owamo ibo Godi aboto kararatoro moto ie. Ina abora nio ro piro urubia koropiro moro to apoi-dumo.*

⁴⁷ Iesu sirio saiki aise irohotiti Tarena Moto kara goro to urubia sirio nou ro aise

itamudiroititi. Ina edi sabowa ro nato ta-irowomidiroititi Godi ra urubia ra turi turi awawo urubia, Mose sabi kitamudiro urubia, duriomoro kiauri urubia mutu. Neio ro Iesu kopia gabo nato gemosora-rimo,

⁴⁸ kaupoti nu neio ro kopia modobo pua.

Urubia sirio nou abato aise iateidiroititi mabu neio auna ubi ro iamotiti nou oweru kemowidiro aboto.

20

Iu eputa urubia ro Iesu a-gemodowa-rimo nou korosa boido gowai

¹ Ata saiki Iesu Tarena Moto ato gomidiro nou ro urubia iato gitamudiro, ibose mea oweru nou simara sapuwo to gimowauti. Ina iato Godi ra Urubia ra turituri awawo urubia, Mose sabi kitamudiro urubia, Iu duriomoro kiauri urubia mutu, neio atu se nato gou-rimo Iesu emodowa ri.

² Neio ro ibo, 'Nimo ma-dimowapotai-ro oro ro edi tanaro na-isioidiro beda pupuwo korosa to isioidiroititi? Boido gowai oro ro?'

³ Ina neio Iesu ro ibo gimowameai, 'Ina nio mo ro ibose anama-imodowa-ri,

⁴ Ioane ro urubia obo to na-iwarumiautiti edi pupuwo korosa to na-isioidiroititi nou ro Godi aboudo a-gomidai ra o urubia aboudo ra?'

⁵ Taie neio nakara se iato geremowagomea-rimo. Neio ro ibo, 'Nimo ro nu ibo namadime-emowameai-ri, "Nu pupuwo korosa Godi aboudo gomidai-ro". Ina Iesu ro ibo ama-utura-ri nimo aboto, "Ina mabu boira nio ro Ioane oweru imibiria tato?"

⁶ Ina nimo ro ibo namadimu-utura-ri, “Ioane pupuwo korosa urubia aboudo gomidai-ro”, iedi urubia sirio ro na-orowotoi-die, nimo neio ro nadi to anamadimi-ibo-ri. Mabu neio ibo timaragoidiro-dumo Ioane Godi ipusu oweru dubu e.’

⁷ Taie neio ro Iesu wisa ibo gimowameai-rimo, ‘Nimo umoro pua nou ro idaibo pupuwo korosa boido gowai.’

⁸ Ina neio Iesu ro ibo gimowameai, ‘Ina mo edi tanaro sirio ro na-nisioi-ro mo ro pupuwo boido nowai? Nio aboto mo ro owapotai-ri pua.’

Pari ubauba urubia ro emeaurititi-mo nou totomu e

⁹ Iesu ro urubia nedi totomu ro nou gimowauti, ‘Ata dubu auna gereipi pari gosioi-ro. Taie nou ro aise giapoi emeauri ri pari kemeauri urubia aboto. Nou ro ibo, “Nedi pari ro mea mino to ba-demeauri-rimo, nio aboto niapoi. Awawo namadimo-oi-ri, arua nio do ie, arua mo do ie.” Taie nu iato imese gasiriai ata muso duriomoro to iato imidirotiti tuturu tau to.

¹⁰ Taie nou umoro na-goi ibo gereipi abora gumuni ta-goi-dumo. Nou ro keba sowake dubu nato gemeiriai pari kemeauri urubia aboto, arua gereipi gumuni imade ri, ina iwou ri nou aboto. Kaupoti nu neio ro na-gowea-rimo nu aise gado-rimo tu ia se gemeiriai-rimo ata nakomu tato.

¹¹ Ina iato pari abera ro ata sowake dubu gemeiriai, ina nu neio ro atu sosoro ibose to gado-rimo. Ibose neio ro nou aboto ata siripo

tanaro gosioidi-ro-rimo, tu ia se gorowameai-ro pari namutuna aboto.

¹² Ina netewa didi tau giwai nou ro ina ata sowake dubu iato gemeiriai-ro. Nedi sowake dubu ro neio ro temeteme gomia-rimo. Taie iato geherai-rimo pari goro rido ibose nu tu ia se gorowameai.

¹³ Taie pari kiauri dubu ro kimaragoidiro to ibo, “Mo ro abora beda tanaro anama-osioidi-ro-ri? Modobo ie mo ia simara ubi mere nou kemeiriai. Neio ro nou ubauba mino to oworohuti-ri pua, mea mino to amadimo-oworohuti-ri.”

¹⁴ Taie nu ioudo na-gou-ro, neio ro nu muso rido gowea-rimo, neio atu moro to na-garadabuai-rimo, neio ro ibo, “Modobo pua nedi pari ro nou ro imese moro to kirahidimai, mesuai-rimo taie pari nimo do to nato ama-ararapoi-ri.”

¹⁵ Neio ro iato na-gado-rimo kara goro rido aise geherai-rimo iato gopia-rimo.

Ina pari abera ro beda tanaro ama-osioidi-ro-ri nedi urubia ro neio aboto?

¹⁶ Nu ioudo namadi-ou-ri neio nou ro ama-iopiauti-ri, ina edi pari ro amia urubia aboto ama-iapoi-ri.’

Urubia ro Iesu edi totomu ro na-girorowai-rimo, neio ro ibo, ‘Modobo ia pua nedi tanaro ro kororosioidi-ro!’

¹⁷ Kaupoti Iesu na-girarowea neio aboto nou ro ibo, ‘Ina Tarena Buka owera maumo beda sosoro hatiamo, *Moto keremari urubia ro edi nadi ro na-gowatebetai-rimo kakate moro ato na-owamotiti, edi nadi ro moto nou ro kowotoi ie.*

18 Urubia edi nadi ro nou ro kihumo ato, neio temeteme aise kiauri ie, ibose edi nadi ro na-weretei-die urubia nou ro kipatauti ie.'

19 Mose sabi kitamudiro urubia, ina Godi ra urubia ra turituri urubia, duriomoro awawo urubia, neio ro na-girorowai-rimo Iesu ro edi totomu ro na-gimowauti, iato neio gabo giosora-rimo Iesu samo to korobai aboto, koto to owou ri. Mabū neio ta-geremasibai-rimo ibo Iesu ro edi totomu ro na-gimowauti pari kemeauri urubia sapuwo to, io neio giwauti. Kaupoti neio tere ro giwati modobo pua urubia sosoro gabo ato Iesu korobai.

Takesi mani kiaremo modobo ra gabamani aboito

20 Taie Iesu neio ro idomari to gemaipirio-rimo nou ro edi tanaro ro na-gisioihiro. Ibose neio ro arua karatigi urubia ta-gituputai-rimo, iato gimeiriai-rimo Iesu aboto. Neio Iesu nasa urubia ie, ina namuturubi to garatigi-rimo. Neio maumo ubi a-giamo ibo Iesu ro utura ri ata ubauba owera, ina Gabamani Dubu aboto nato owou rie.

21 Taie edi karatigi urubia ro Iesu nato garatoro-rimo ibo, 'Kitamudiro dubu, nimo umoro tinoititi-dumo oro ro edi owera ro na-iarotiti, ibose na-itamudiroititi morobise ie. Oro ro ibo pua arua urubia se kiwarebai ina arua urubia kiwarebai tato. Oro ro imese sirio tau to irowautiti Godi edi morobise gabo ro nou sapuwo to.

22 Ina nimo ma-dimowapotai-ro modobo ra nimo ro takesi mani kiaremo gabamani aboto?'

²³ Kaupoti neio edi karatigi tanaro ro Iesu ro umoro ta-goi. Neio ubi ie nou ro karasaubuti oweru utura ri. Ina Iesu ro ibo,

²⁴ 'Mani iopu neito ma-dowou-rimo. Nu etu asaso ra, ina etu masiro ro owamo?'

²⁵ Taie neio ro ibo, 'Roma gabamani eputa dubu masiro Sisa, nou asaso iateidiro masiro mutu.'

Iesu ro neio ibo gimowameai, 'Ina beda nakomu ra Sisa masiro mutu modobo ie Sisa kemowameai. Ina Godi ro beda nakomu iaiwo-die modobo ie Godi kemowame.'

²⁶ Taie karatigi urubia ro edi poinai gemedea-rimo Iesu nou ro korobai modobo pua. Nou ro edi oweru to gimowauti nou neito eremamuai rie. Kaupoti neio ro korobai modobo pua, neio imese sirio se aborabora ro girobai. Neio ata ro oweru aro pua imese gasio se gemowadau.

Pamo urubia kireribua kemodowa oweru ie

²⁷ Sadusi urubia ro ibo imibiria-dumo pamo urubia neio ereitorowado-ri pua, imese moro to korowaburo ie ina keremiro owea-ri pua. Neio arua nato gou-rimo Iesu aboto, nu neio ro nato gemodowa-rimo

²⁸ ibo, 'Kitamudiro dubu, Mose ro idaibo oweru nou gisioidiro. Ata dubu karaburai ato, ina nou ro garamu orobo na-emeserai-die mere besere tato, ina nou neama ro ba-medea. Nou ro edi merebusere ro na-irasomai nou do pua, edi pamo dubu ro nou merebusere to kararasoro ie.

²⁹ Iedi tau ro nato 7 naminiramio ta-gorowomidiro. Ata orobo kebase naramu ro ta-gedea, nou mutu ta-imidirotiti-do iato edi

dubu ro aise garaburai. Taie edi orobo ro nou ro mere besere tato gemeserai-ro,

³⁰ ina edi garamu orobo ro neama dubu ro aise gairiawado, nou mutu ibo wimidi-ro do nou ro ata mere besere ata arasomai pua, taie iedi neama dubu ro aise garaburai.

³¹ Ina iato ata neama ro gedea iedi garamu orobo ro neitiro ibo wimidi-ro do ibose nou ro ata mere besere ata arasomai pua. Taie edi dubu ro aise garaburai. Edi garamu orobo ro 7 naminiramio ro karemo to ti-goroporeai. Ina nu neio ro mere besere tato gemeserai-rimo.

³² Taie edi orobo ro saro rido aise garaburai.

³³ Ibose Godi ro urubia pamo rido nama-iwoubua-ri, edi orobo ro etu orobo to ama-ararapoi-ri?'

³⁴ Ina neio Iesu ro ibo gimowameai, 'Kararemo owamo ibo sopo duriomoro urubia tanaro ie, osio busere kararemo, busere uramio ro kiaremo.

³⁵ Kaupoti etio ra Godi ro modobo urubia to na-giapoi keremiro ina kiwia aboto, Adiri sabowa ato araremo-ri pua.

³⁶ Neio iato modobo pua korowaburo mabu neio Godi sowake urio sosoro ama-irowomidi-ro. Neio Godi merebusere to amadima-ararasoro-ri, mabu nedi urubia ro Godi ro kebase pamo rido ta-giwameai-ro.

³⁷ Ina morobise ie nimo Mose ro keba se ta-nimowapotai-ro pamo urubia orio keremiro amadimi-iauri-ri. Iedi ota ro era ro na-gouho nou sapuwo to, Mose ro owera ta-gisioidi-ro Abera Naramu aboudo. Nou ro ibo, *Aberaham, Aisaki, Iakobo mo neibi ro ti-nemowabutiti-bimo.*

³⁸ Neibi ta-gorowaburo-birimo ina abora neibi keremiro ie. Godi abora neibi ro temowabu-bimo. Mabu imese sirio urubia teremiro-dumo Godi sosoro gabo ato.'

³⁹ Taie arua Mose sabi kitamudiro urubia iato na-gorowotoi neio ro ibo Iesu aboto, 'Kitamudiro dubu, oro edi wisa oweru ro na-warodie imese modobo ia ie.'

⁴⁰ Ina nou ata ro kemodowa aboto modobo pua.

Godi ro kohodowa dubu Deibidi Naramu Abera ie

⁴¹ Ina urubia Iesu ro iato gimodowa, 'Mabu boira urubia ro Godi ro kohodowa dubu nu Deibidi mere to na-wasoro-dumo?

⁴² Deibidi ro nakara se oweru ta-gisioidiro Ohare Tarena Buka ato ibo, *Godi ro ta-gutura mo Abera Naramu aboto, mo tumodi sapuwo ato oro ro ba-domidiro*

⁴³ *womu tato oro nasa urubia mo ro anama-itaumai-ri oro sairo mabu ato.*

⁴⁴ Godi ro kohodowa dubu Deibidi ro Abera Naramu to gasoro. Ina mabu boira arua urubia ro Godi ro kohodowa dubu Deibidi nasa to na-wasoro-dumo?'

Iesu ro urubia Mose sabi kitamudiro urubia sapuwo to gimowauti

⁴⁵ Urubia sirio Iesu oweru gare na-gemedea-rimo, taie nu iato aise gerewesegerai kowasoro urubia aboto nou ro ibo,

⁴⁶ 'Mose sabi kitamudiro urubia nio ro mea se dimowotoi-mo. Neio auna ubi ie ohona kimade moro ato koroho meamea namabu to keremeduti ie bagea neio urubia ro imowabu rie. Neio kodouti ato Iu urubia karadabu moto

to neio keba moro kimaberawado ie. Neio auna ubi ie urubia ro meamea keta kimosouti orowomititi na.

⁴⁷ Ibose nedi urubia ro garamio mamio auna se isaubuti-dumo. Ina neio Godi aboto kararatoro ato tuturu kararato oweru nou karowado ie urubia ro imowabu ri. Nedi urubia ro idaibo tanaro na-isioidirotiti-dumo, neio Godi ro ubauba temeteme timerebidiro-die saiki ata amadimo-owe-ri.'

21

Morobise kaiwai tanaro beda sosoro ra

¹ Iesu Tarena Moto ato na-gomidiro nou idomari na-giwawota nou ro namabu sirio urubia nato giwia Godi sapuwo to mani na-gibiti-rimo mani bokose to. Nu edi mani bokose ro nou gomo ato gomidiro.

² Ina nou ro ibose ta-gowea ata garamu orobo nu auna mani iopu teibo ibiria-ma pua, auna namabu neito komidai modobo pua.

³ Nou ro ibo kowasoro urubia aboto, 'Nio mo ro morobise oweru mimowapotai-ro, nedi namabu tato garamu orobo ro nou ro ata nakomu ata emeserai pua moto goro ato. Nou kaiwai tanaro ibo pua namabu sirio urubia sosoro.

⁴ Neio abato paease beda mani ro iamo io neio ro nou iaremo-dumo. Ina nedi garamu orobo ro nu namabu tato orobo ie, kaupoti nou abato beda mani kainai ro owamotiti ohona imade na nou ro momuo se noti iedea.'

Iesu ro Tarena Moto sapuwo to gimowauti

⁵ Iesu arua kowasoro urubia Tarena Moto ibo gemowagomea-rimo. 'Nedi Tarena Moto ro meamea nadi to gididi-rimo. Ina arua urubia ro mea sosoro namabu ta-giaiwo-rimo.'

Kaupoti neio Iesu ro na-gimororowai nou ro ibo,

⁶ 'Saiki ata, ata nadi ata otomaidiro-ri pua nedi Tarena Moto ro nato neio imese goto to amadime-erebeduti-ri.'

*Womu tau ato ubauba tanaro
amadimo-ororosioiido-ri*

⁷ Ina kowasoro urubia ro Iesu nato gemodowa-rimo, 'Nimo oro ro ma-dimowapotai-ro nedi tanaro ro Tarena Moto to beda tau ato amadimo-ororosioiido-ri? Ina etou tanaro anamadidimi-iauri-ri kororosioiido aboto?'

⁸ Taie neio Iesu ro ibo gimowameai, 'Nio modobo ie keremowotoi mea se ba-dirarowo-mo, modobo pua nio amia urubia ro kisaubuti. Mabua arua urubia tou-dioumo, mo to amadima-aratigi-ri. Neio ro ibo amadima-aro-ri, "Mo Iesu nou se ie." Ina neio ro karasaubuti oweru amadima-aro-ri ibo, "Womu tau ta-gorowateai-die abora tanaro noto-ororosioiido-dumo." Kaupoti nedi urubia ro neio oweru aise irowidiro ate.

⁹ Ina ibose nio ro amadimi-irowidiro-ri bosu oweru erere duriomoro ato namadimo-ororosioiido-ri ibose urubia amadimo-ororoio-ri, karado aise ama-ou-ri, kaupoti nio nato tere oi ate. Nedi tanaro ro keba se amadimo-ororosioiido-ri, kaupoti womu tau saro rido amadi-ererede-ri.'

¹⁰ Iesu ro ina ibo, 'Ata duriomoro urubia ata duriomoro urubia mutu neitiro boso ibo keremedea ie. Ina ata gabamani ata gabamani mutu neitiro serawo ibo keremedea ie.

¹¹ Ibose erere duriomoro ato, awawo sopu momuruwo ro duriomoro neio ro amadimo-omuruwouti-ri. Ina erere duriomoro ato auna sogoi tau ro ama-araremo-ri, ibose urubia sirio erere temeteme ro ama-iwotodai-ri. Ina tere tanaro amadimo-ororosioiido-ri toboro ato urubia sirio umoro oi ri ibo womu tau aupise tou-die.

¹² Kaupoti nedi tanaro ro keba se amadimo-ororosioiido-ri, nio etio ra kimibiria urubia nio urubia ro amadimi-irobo-ri ubauba mino to amadimi-iworohuti-ri. Nio lu urubia karadabu moto to amadimi-iworoho-ri koto iato amaidimi-iwaititi-ri, ina nio dibura to aise amadimi-iaremo-ri, mabu nio mo kowasoro urubia ie. Eputa urubia gabamani mutu neio sosoro gabo ato amadimi-iwotoburio-ri nio koto owera nato amadima-aro-ri.

¹³ Kaupoti nio abato meamea tau ama-iamotiti-ri mo sapuwo to iedi awawo urubia ro imowauti ri.

¹⁴ Ina abora modobo ie nio mea se kimaragoidiro, nio modobo pua auna se kimaragoidiro ibo nio ro beda owera amadimu-utura-ri.

¹⁵ Kaupoti mo umoro ie nio muro mo ro anama-imio-ri koto abato beda owera to amadima-aro-ri. Ina nio amia urubia ro koto abato owera karo mutu neio ro nio iwameduti-ri pua.

¹⁶ Ibose nio mamio abeamio, naminiramio, namuturubi, gu urubia, nio aboto

amadime-erewesegerai-ri nio arua neio ro
amadimi-iasouti-ri arua urubia aboto iopiauti ri.

¹⁷ Imese sirio urubia nio neio ro masawe
amadimi-iwia-ri mabu nio mo ubi tanaro
isioidirotiti-dumo.

¹⁸ Kaupoti nedi tanaro ro
namadimo-ororosioidiro-ri nio ohu takamai
neio ro amadimi-iwasomai-ri. Nio urio neio ro
iwasomai-ri pua.

¹⁹ Nio koko se namadimi-iwotoi-ri nio ro
womu tato womu tato keremiro nato
amadimo-owea-ri.'

*Ierusarema sabowa boso urubia ro
amadimo-osamodorowado-ri*

²⁰ 'Ibose nio ro amadimi-iwia-ri boso urubia
Ierusarema sabowa namadime-emowaperai-ri.
Nio umoro nato ba-doi-mo ibo Ierusarema
sabowa neio ro amadimo-opisiamuti-ri.

²¹ Iedi tau ro nato beda urubia ro
ama-orowomidiro-ri Iudia duriomoro ato, neio
modobo ie korowodau podo duriomoro to. Ibose
Ierusarema sabowa ato etio ro
ama-orowomidiro-ri neio modobo ie kosuruwo
ata moro to korowadau. Ina ibose beda urubia
ra aupi sabowa ato nama-orowomidiro-ri neio
ro modobo pua auna sabowa kara goro to
kodoro. Mabu neio ro mea koropirowa moro ata
iato owea-ri pua.

²² Mabu iedi tau ro nato Ierusarema urubia
Godi ro ubauba wisa ama-imio-ri. Iedi ubauba
wisa ro namadimi-iwia-ri, Tarena Buka ato beda
owera gisioidiro-rimo nou sapuwo to nedi
tanaro ro morobise to amadimo-ororosioidiro-ri.

²³ Iedi tau ro nato niro mutu mamio ibose
bamuai mutu mamio neio beda sosoro to
amadimo-orowati-ri? Nirimagare babio tanaro

patu iedi mamio ro neio sapuwo to imese koko ia se ama-iamo-ri. Nedi tau ro nato urubia sirio auna ia ubauba ro amadi-iwia-ri. Nedi tau ro nato Godi auna serawo nato amadi-emagagai-ri nedi duriomoro urubia ro neio aboto.

²⁴ Nedi urubia ro neio boso urubia ro giri to amadimi-iopiauti-ri arua neio ro amadimi-irobo-ri ina erere daimodaimo duriomoro to amadimi-imudidiro-ri. Ierusarema sabowa wagoa to Iu oweru karo tato urubia ro amadimo-oturai-ri simara se womu tato Iu oweru karo tato urubia tau nama-oroporeai-ri.'

*Iesu korowameai aupiaupi nama-orobai-ri
aborabora tanaro nato amadimo-ororosioi-ri*

²⁵ 'Saiki ra sagana ra kiboni mutu neio abato aborabora tanaro amadimo-ororosioi-ri urubia sirio umoro koi sapuwo to ibo womu tau ta-norobai-dumo. Urubia sirio nedi sopo duriomoro gebari ro nato na-orowomidiro neio auna tere ro ama-iwati-ri ina amadima-aradoruti-ri. Mabu buru oromo ato auna gawia ro ama-araremo-ri bukupu gebarigebari nou ro ama-iwouburio-ri toboro gururu beda sosoro ra idaibo sosoro ie.

²⁶ Iedi tau ro nato urubia tere ri sapuwo pamo amadimo-orowaburo-ri. Mabu duriomoro ato beda tanaro namadimo-ororosioi-ri neio kimaragoidiro ro ama-iopia-ri. Mabu toboro sopo momuruwo ro pupuwo to ama-omuruwouti-ri ina kiboni sirio simara moro ato orowotoi-ri pua.

²⁷ Ina iato tuturu to owamo-ri pua urubia ro amadimo-owea-ri Imese Urubia Kiauri Dubu nu

simara woroworo pupuwo korosa mutu tema
ohu rido amadi-orowapotai-ri tema.

²⁸ Nedi tanaro ro kororosioihiro aboto
namadima-araratamuai-ri nio modobo ie koko
se korowotoi ina sirio tau kamade ro kiwati
mabu tau aupi se ta-gorobai-die nio Godi ro
ubauba aboudo nato amadi-iapopo-ri.'

*Erere tau sapuwo to dewao ota ro urubia umoro
kiwaititi ie*

²⁹ Iesu ro kowasoro urubia nedi totomu ro
nou gimowauti. 'Nio ro ma-diauri-mo arua ota
dewao ota mutu.

³⁰ Neio orio puara kisuwoduti ato, nio umoro
samo to koi ie ibo surama tau aupise ie.

³¹ Ina idaibo sosoro tanaro neio ro
amadimo-ororosioihiro-ri. Nio ro
namadimi-iauri-ri nedi koko tanaro ro
namadimo-ororosioihiro-ri, nio umoro
amadimo-oi-ri ibo Godi ro kiwabo tanaro
aupiaupi ro ta-gorobai-die.

³² Ina nio mo ro morobise ia oweru
nama-imowapotai-ri, nedi tanaro ro
namadimo-ororosioihiro-ri urubia abora
na-orowomidiro nedi duriomoro ro nato nedi
tanaro ro neio abato amadimo-ororosioihiro-ri.

³³ Nedi duriomoro gebari ro, toboro, sopu ato
imese sirio namabu patu neio imese
amadima-araraseperai-ri. Kaupoti mo ro beda
oweru niarotiti araraseperai-ri pua, ibose to
ama-iamotiti-ri.'

Sirio tau aise gi-eremododiai-ri

³⁴ 'Mea se deremowotoi-mo! Nio ro modobo
pua sirio tau kidio kiworohuti, ina kidio
daradara koroho, ibose auna se kimaragoidiro

duriomoro tanaro sirio aboto. Nedi tanaro peteibi ro nio ro namadimi-isioidiro-ibiri, ina mo korowameai saiki namadi-apimaidiro-ri nio nou ro poinai sosoro ama-irobai-ri.

³⁵ Mabu mo korowameai saiki namadi-apimaidiro-ri, imese urubia sirio nedi duriomoro gebari ro nato neio nou ro amadi-imuhia-ri.

³⁶ Ina noudo ie nio modobo ie sirio tau keremododiai. Abera Godi nio ro modobo ie kararatoro nedi ubauba ro namadimo-ororosioioidiro-ri nio neido karagarewado aboto. Ibose Abera Godi nio ro modobo ie kararatoro nio Imese Urubia Kiauri Dubu nou sosoro gabo ato, garegare tato orowotoi-ri.'

³⁷ Iesu sirio tau ibo irowatititi, nou ro urubia Tarena Moto ato itamudiroititi. Ina duwo nagi-ereredeai-ri nu auna sabowa rido aise isuwodutititi Oribi Podo ohu ato imidirotiti.

³⁸ Iesu ina kowaroho duwoduwo korowameai ie Tarena Moto to, ina urubia sirio nou aboto aise irohotiti-mo Tarena Moto to nou owera irowidiro ri.

22

Eputa urubia ro Iesu kopia gabo gemodobowauti-rimo

¹ Iedi tau ro nato Isiraere urubia Patapata Beredi Kiaupai Tato Soriomu kosioidiro tau aupise ia se gowamo-ro. Isiraere urubia ro Kimasaudai Soriomu to asorotiti-mo.

² Ina Godi ra urubia ra turituri awawo urubia, Mose sabi kitamudiro urubia mutu Iesu opia ri

gabo egea se giosora-rimo. Mabu neio urubia ro kiwia rie nou tere ro giwati.

³ Ina iedi tau ro Satani Iudasi Kerioti dubu nou niro turi to aise godoro nu nou ro goworohuti. Iudasi nu Iesu 12 kitiodorai dubu ata nou se ie.

⁴ Taie Satani beda tau ato godoro Iudasi aboto, nu iato aise gemobodiai Godi ra urubia ra turituri awawo urubia aboto, ibose Tarena Moto kemotoi awawo urubia aboto. Nu neio mutu geremowauti Iesu sapuwo to nou ro beda sosoro ama-apoi-ri.

⁵ Neio ro nedi owera ro na-girorowai-rimo neio auna kamade goi-rimo. Taie neio ro ibo, 'Iesu oro ro namadi-owaboi-ri nimo aboto, oro mani nato anamadimo-omia-ri.'

⁶ Ina Iudasi ro ubi to aise gomidai nedi tanaro ro nou kosioidiro sapuwo to. Nou ro mea tau gosora urubia tato moro ato Iesu orobai ri ina apoi ri neio aboto.

Kimasaudai soriomu kowasoro dubu teibo ro gemododiai-rido

⁷ Iedi saiki ro na-gorowateai-ro, Kimasaudai Soriomu saiki ro gereredea. Iedi tau ro nato kisioidiro ie Patapata Beredi Kiaupai Tato Soriomu. Ibose kimatowo sapuwo to sipisipi kainakaina nato kiopiauti ie, Mose edi sabi owera ro nou kibodoro aboto.

⁸ Taie Iesu ro Pita ra Ioane ra aboto nato gutura, 'Nitiro ba-dou-do Kimasaudai Soriomu sapuwo to ohona ba-dimododiai-do.'

⁹ Ina Iesu neitiro ro ibo gemowameai-rido, 'Oro ubi na-owamo neitiro ro kosioidiro aboto beda moro ato namado-osioidiro-ri?'

¹⁰ Ina neitiro Iesu ro ibo gimowameai-ma, 'Nitiro iedi sabowa ro neito namado-orowateai-ri, nitiro ro amado-owea ri ata dubu obo bageto mutu moto to namadi-idiai-ri. Iedi dubu ro nitiro ro aise ba-dobodoro-do beda moto to odoro edi moto ro neito ba-dou-do.

¹¹ Ibose nitiro ro moto abera amado-owea-ri nu ibo ba-demowapotai-do, "Nimo kitamudiro dubu ibo utura-die, 'Apira urubia ibi gugu modobo ato a-owamo ra? Mo Kimasaudai Soriomu ohona kowasoro urubia mutu iato anamadimo-osioidiro-ri.' "

¹² Nitiro nou ro umoro ama-iwai-mari auna ibi gugu ohu ato towamo, imese nakomu sirio iato modobo ato iamo. Nitiro ro Kimasaudai Soriomu ohona iato ba-dimododiai-do.'

¹³ Neitiro ito na-gasiriai-rido, Iesu ro beda sosoro oweri garo imese tanaro sirio ibose to gororosioioidiro-rimo. Taie iato neitiro ro Kimasaudai Soriomu ohona iedi moto ro iato aise gimododiai-rido.

Abera Naramu ohona kiho

¹⁴ Edi tau ro ta-gorobai Iesu nu kitiodorai urubia mutu moto goro ato atu moro ato ta-gorowomititi, edi Kimasaudai Soriomu ohona ro nou iho rie.

¹⁵ Taie Iesu iato gutura neio aboto, 'Tuturu tau to mo auna ubi ro owamotiti Kimasaudai Soriomu ohona kiho nio mutu, mabu mo ido temeteme anama-iwia-ri.

¹⁶ Ina nio mo ro mimowapotai-ro ido ata Kimasaudai Soriomu ohona ata mo ro iho-ri pua, womu tato Kimasaudai Soriomu maumo

momuo se namadimo-ororosioi diro-ri Godi ro kiwaboi tanaro maumo ato.'

¹⁷ Iesu ro waini obo panikere na-gomidai-ro eso owera iato garo Godi aboto. Nou ro ibo, 'Nedi waini obo ro panikere ato na-omidiro kodio to ba-demosuwo-mo.

¹⁸ Ina mo ro ibo mimowapotai-ro ido mo ro waini obo odio-ri pua womu tato Godi ro kiwaboi tanaro neito namadi-orowateai-ri.'

¹⁹ Iesu ro ina patapata beredi na-gomidai-ro nou ro iato gekekeouti, eso owera na-garo taie nu kitidorai urubia erere se iato gimio. Nou ro ibo, 'Nu mo durupi ie ba-diho-mo, mo ro nio sapuwo to anama-aiwai-ri. Nio ro idaibo sosoro tanaro ba-disioidirotiti-mo mo kemaragoidiro sapuwo to.'

²⁰ Ina iedi patapata beredi ro kiho na-giporeai-rimo, Iesu ro panikere na-gomidai-ro nou ro ibo gimowapotai nu kitidorai urubia, 'Nedi waini obo ro na-omidiro mo ro orio hodo nasaubiai urubia aboudo mo karima nama-isuputi-ri. Nedi orio hodo kemasaubiai ro mo karima nama-isuputi-ri nio sapuwo to ie neido ama-aratamuai-ri.'

Mo beda dubu ro anama-apoi-ri

²¹ Iesu ro ibo, 'A-wowea-bimo, nibi mo mutu na-iho-bimo mo nibi ata ro ubauba urubia aboto anama-apoi-ri. Nedi dubu ro nama-apoi-ri nu namutuna to aratigi.

²² Keba se Godi ro gabo ta-gisioidiro, Imese Urubia Kiauri Dubu mo nouse ie mo ro anama-araburai-ri. Kaupoti edi kapoi dubu ro nou aboto, auna ia ubauba tanaro ama-ororosioi diro-ri.'

²³ Taie kitiodorai urubia nakara se nato geremodoruti-birimo ibo, 'Neibi nato na-nomidiro-bimo nedi tanaro ro nou aboto, neibi ata ro ama-osiodiro-ri.'

Oro modobo ie sowake dubu to kararapoi

²⁴ Iesu kitiodorai urubia neio nakara se owera to nato gororobai-rimo ibo, 'Nimo etu ata ro ama-omidiro-ri auna to.'

²⁵ Kaupoti Iesu ro neio ibo gimowameai, 'Godi umoro tato urubia erere duriomoro ato na-irowomidiro-titi neio eputa urubia mutu e. Urubia neio ro auna se imagegeaititi-dumo. Nedi eputa urubia ro auna ubi ie neio ubi tanaro se kisioidiro. Neio ubi ie mea kiwarebai urubia to kiasoro.

²⁶ Kaupoti nio ro idaibo tanaro isioidiro ate! Eputa dubu to etu ro kararasoro ra nio abato nu modobo ie sopu to korowororuwo. Ina keba to etu ro otoi nu modobo ie sowake dubu to kararasoro. Nedi owera ro nio ro ma-dimaragoidiro-mo!

²⁷ Auna dubu etu ra? Beda dubu ohona kemowou ra, o ohona etu ro kemowou ra? Nio ibo imaragoidiro-dumo beda dubu ohona kemowou ra, nu auna dubu e. Kaupoti mo nio mutu nato na-nirohotiti mo nio ohona kimoworoho dubu sosoro ie.

²⁸ Mo nio mutu na-nirohotiti sirio koko tau ta-niaurititi, ina mo nio ro emeseretiti pua nio mo abato aupise iateidiro-titi.

²⁹ Ina mo Godi ro beda sosoro napoi-ro eputa dubu to ararasoro ri, nio mo ro ibose to anama-iapoi-ri eputa urubia to ararasoro ri.

³⁰ Ina noudo ie nio ia ro amadimo-odoro-ri mo edi kiwabo'i maumo ro neito soriomu ohona atu

se iato anamadimi-iho-ri. Ibose Isiraere edi 12 gu ro na-iamo nio neio eputa urubia to amadima-ararasorotiti-ri, eputa urubia sea to nio ro ama-irowomidiro-ri.'

Kimibiria iasepere mamo

³¹ Iesu ro ibo, 'Saimoni! Saimoni! Owera neito ma-dirowidiro-ro! Satani ro Godi aboudo umoro owera ta-imidai-ro ibo nio nou ro ama-iwaibirio-ri. Satani ro nio aboto idaibo sosoro kiwaibirio tanaro nou ama-isioidiro-ri, pari kisioidiro dubu woiti iopu rido takamai kiamotuti beda sosoro ra idaibo sosoro ama-ihoduti-ri.

³² Godi mo ro ta-nararatoro oro modobo pua kimibiria kiaseperai. Oro mo aboto namadi-erewesegerai-ri, oro kimibiria borubi nato ba-diwarebai neio kimibiria pupuwo ba-dimowaititi.'

³³ Ina Pita ro Iesu ibo gemowameai, 'Abera Naramu, oro dibura to namadime-edea-ri mo ibose to anamadime-edea-ri. Oro namadimo-opia-ri mo ibose to anamadimo-opia-ri.'

³⁴ Taie Pita Iesu ro ibo gemowameai, 'Kakaba owera kowaroho duwoduwo ato ido to ama-utura-ri tauo keba se mo oro ro netewa didi tau to anama-aratiouti-ri. Oro ro ama-utura-ri nedi duwo ro nato ibo, "Mo umoro pua Iesu."'

Modobo ie umoro umoro to koroho

³⁵ Iesu ro ibo nou kitiodorai urubia aboto, 'Nio mo ro edi tau ato nitiodarai nio mani pauso tato, keta popo tato, tamaka tato tu kawakawa nimeriai. Ina nio ohona kiroidiro namabu mutu modobo ato iamoo pua ra?'

Ina kowasoro urubia ro ibo, 'E e, nimo ohona kiroidiro namabu mutu modobo ato giamo.'

³⁶ Kaupoti neio Iesu ro ibo gimowapotai, 'Abora tanaro ata sosoro ie woki sorosoro to gi-oroho-ri. Nio ro nedi namabu teibo ro nou ba-diwou-mo mani pauso, keta popo nou se ba-dimidai-mo. Ibose oro etu ra giri tato nama-ou-ri oro ro beda durupi suana iwou ba-mowahodorai-mo ina giri neito ba-derememidai.

³⁷ Tarena Buka ato oweri ibo tiamo, *Nu sabi kisebo dubu sosoro amadimo-oworohuti-ri*. Nio mo ro ibo nimowapotai iedi Tarena Buka oweri ro mo aboto morobise to ba-mororosoidiro. Io, oweri sirio mo sapuwo to Godi ipusu oweri urubia ro na-gisoidiro-rimo tau aupise ou-die neio mo aboto amadimo-ororosoidiro-ri.'

³⁸ Ina kitiodorai urubia ro ibo, 'Abera Naramu neito ma-dirarowea-ro, nimo abato netewa teibo giri teibo tiamo-ma.'

Ina Iesu ro ibo, 'Io modobo ie, taie.'

Iesu Godi mutu geremowauti-rido Getesemeni pari Ato

³⁹ Iesu Ierusarema sabowa na-gemeserai nou imese giro Oribi Podo ohu to kowasoro urubia mutu, nu sirio tau ibo irowatititi.

⁴⁰ Nu ito na-gorowateai taie kowasoro urubia nou ro nato gimowapotai, 'Nio Godi ba-dararatoro-mo ibo, "Koko kiwaibirio tanaro aboudo, oro ro modobo ie nimo kiwagareawado." '

⁴¹ Taie Iesu ro kowasoro urubia iedi moro ro nato aise gimeserai-biro, nou neibi aboudo na-giaubai emia ro egea mere se gemopai. Taie

nu iato kauhio teibo to aise girimusubua Godi aboto iato gararatoro. Nou ro ibo,

⁴² 'Abera oro ubi koi ato idaibo sosoro ba-mororosioi diro-mo. Modobo ra nedi ubauba tanaro ro kororosioi diro tato mo aboto? Kaupoti ibo pua mo simara ubi ato kosioi diro, oro ubi ato aise ba-mororosioi diro-mo.'

⁴³ Ina iato sowake urio ro gorowapotai-ro Adiri sabowa rido Iesu pupuwo owai ri.

⁴⁴ Iesu edi tau ro nato auna ia mibo ro gahidimai, ina auna ia se Godi aboto iato gararatoro. Nou ro edi kararatoro owera ro na-garo nu auna ia kahane to gorowati, ina edi kahane ro karima sosoro kisuputi idaibo sosoro gisuputi goto to.

⁴⁵ Nu edi karatoro owera ro beda tau ato goporeai nu iato kowasoro urubia aboto aise gorowameai-ro. Neio nou ro norou kirobu moro ato giwia, mabu neio mibo kimaragoidiro mutu giwatabuti.

⁴⁶ Taie nou ro ibo neio aboto, 'Nibi adimo ato se gimaudutai-bimo. Diriribua-bimo modobo ie nibi Abera Godi kararatoro pupuwo kimia-ibi sapuwo to. Ina awawo kiwaibirio tanaro na-wou-dioumo nio koko se modobo ato ama-orowotoi-ri.'

Iesu sirio urubia ro gorobai-rimo

⁴⁷ Iesu isana kowasoro urubia owera gimowauti, iato tuturu to pua urubia sirio na-gou-rimo Iesu aboto. Edi urubia sirio ro Iudasi ro gimudo-ro, Iudasi nu Iesu 12 kitiodorai dubu ata nouse ie. Ina nu Iesu aboto na-gorowateai taie nou ro aise gosomeai.

⁴⁸ Kaupoti Iesu ro ibo, 'Iudasi, Imese Urubia Kiauri Dubu oro ro na-osomeai idaibo oro ro ta-wapoi nasa urubia aboto.'

⁴⁹ Iedi moro ro nato iedi urubia ro na-gorowotoi Iesu gomo ato neio ro na-gowea-rimo etou tanaro ro amadimo-ororosioi diro-ri, neio ro ibo, 'Abera Naramu, modobo ra nedi urubia ro nimo ro giri to kiado?'

⁵⁰ Taie ata dubu giri se gopodia-ro nato ti-gotoi Godi ra urubia ra turituri auna dubu, nu edi sowake dubu ro tumodi gare nou ro aise gowatua.

⁵¹ Iesu ro ibo, 'Aai idaibo tanaro dimeserai-mo!'

Taie nou ro edi sowake dubu ro gare aise gemadoborea.

⁵² Iesu orobai ri nedi urubia ro neio ro gou-rimo Godi ra urubia ra turituri awawo urubia, Tarena Moto kemotoi awawo urubia, ina Iu duriomoro kiauri urubia. Iesu ro neio ibo gimowapotai, 'Nio neito na-wou-dioumo gamini ra giri ra mutu mo ado ri a-wou-dioumo? Nio ata dubu ata mo ro a-nopia ra?

⁵³ Mo nio mutu dose eremiri pua, nio sirio saiki Tarena Moto ato ta-nitamudiro titi. Mo nio ro nato ba-norobai-rimo, kaupoti nio nakara moro eremowea-diomo abora nio tau e mo aboto ubauba tanaro kisioidiro aboto. Duwoduwo maumo ato ubauba tanaro idaibo sosoro isioidiro titi-dumo.'

Pita ro Iesu garatio

⁵⁴ Iesu urubia ro na-gorobai-rimo taie nu imese gowaboi-rimo Godi ra urubia ra auna ia

dubu moto to. Nu Pita ro musomuso se gobodoro-ro.

⁵⁵ Pita ito na-gorowateai neio era mabu ato gorowomidiro era ta-gaduruti-rimo era ro giaso.

⁵⁶ Ata sowake besere ioudo na-gou-ro Pita nou ro ioudo a-geibimo-ro era pina woroworo ato na-gomidiro. Sowake besere ro ibo, 'Nedi dubu ro Iesu mutu ta-irohotiti.'

⁵⁷ Kaupoti Pita bagea oweru gutura. Nou ro ibo, 'Mo umoro pua oro beda dubu ato aro-die.'

⁵⁸ Ina egea mere se ibo gorowomidiro iato ata dubu ro ibo, 'Oro ata nou se ie Iesu mutu ta-irohotiti-do.'

Ina Pita ro ibo, 'E e mo pua io.'

⁵⁹ Ina tau egea mere se ta-gadomaidiro ata dubu pupuwo to ioudo gutura-ro. 'Morobise ie nu Iesu mutu ta-irohotiti-do mabu nu Gariri dubu e.'

⁶⁰ Kaupoti nu Pita ro ibo gemowameai, 'Urubia dubu, mo ata umoro tato ie oro beda oweru to aro-die!'

Pita oweru karo oporeai pua iedi tau ro nato kakaba oweru nato gutura-ro.

⁶¹ Abera Naramu ioudo na-girarowea-ro nu idomari teibo imese Pita ato se giwotobowa-marō. Taie Pita ro kimaragoidiro to nato giwia Iesu ro keba se beda oweru garo-ro, 'Kakaba oweru kowaroho duwoduwo ido to amadi-utura-ri tauo kebase mo oro ro netewa didi tau to anama-aratiouti-ri.'

⁶² Taie nou ro edi oweru ro kimaragoidiro to na-gimagareai nou ro nirimagare to gomidai. Taie nu iato kara goro rudo aise gosuruo-ro auna idobi to gorowati.

Urubia ro Iesu a-gemasosowado-rimo

⁶³ Iesu edi urubia ro gemotoi-rimo nu neio ro aise gemasosowado-rimo ina iato gado-rimo.

⁶⁴ Nu woidomari obotama to aise gowasiai-rimo. Neio ro ibo iato garo-rimo nou aboto, 'Oro Godi ipusu owera dubu ra, a? Nimo aboto morobise to ma-dorowapotai-ro ibo abora oro etu ro ado!'

⁶⁵ Neio ro ibose Iesu aboto sirio ubauba ia owera ta-garowado-rimo.

Iesu awawo eputa urubia aboto gowou-rimo

⁶⁶ Iedi saiki ro na-gowaroho duriomoro kiauri urubia, Godi ra urubia ra turituri awawo urubia, ina Mose sabi kitamudiro urubia, neio atu moro to nato garadabuai-rimo. Taie Iesu neio aboto kemotoi urubia ro aise gowodoro-rimo koto owera aro ri.

⁶⁷ Eputa urubia ro Iesu nato gemodowa-rimo ibo, 'Nimo oro ro dimowapotai-ro! Oro Godi ro kohodowa dubu nou se ra?'

Ina neio Iesu ro ibo gimowameai, 'Nio mo ro nama-imowapotai-ri nedi owera ro nio ro imibiria-ri pua.

⁶⁸ Ina nio mo ro nama-imodowa-ri mo wisa owera nio ro emowameai-ri pua.

⁶⁹ Kaupoti nedi tau ro neido na-waratamuai Imese Urubia Kiauri Dubu nu imese pupuwo ia Godi nu edi tumodi sapuwo ro nato amadi-omidiro-ri.'

⁷⁰ Neio ro ina atu se nato gutura-rimo, 'Ina oro Godi mere ra?'

Neio Iesu ro ibo gimowameai, 'Nio edi owera to utura-dioumo io mo nou se ie.'

⁷¹ Neio atu se ina nato gutura-rimo ibo, 'Nedi dubu ro ubauba owerā nakara se tutura-die, ina mabu boira nimo ro ubauba na-nemosora-dumo? Nu nimo ro simara gare to noti nemororowai-dumo!'

23

Iesu Paireti ro gemodoruti

¹ Edi awawo urubia sirio ro neio atu se aise giriribua-rimo Iesu neio ro gowaboi-rimo Roma gabamani dubu aboto masiro Paireti.

² Neio ro Iesu Paireti abato iato gowauti-rimo. Neio ro ibo, 'Nimo ro Iesu nou mabu ato norobai-dumo, mabu nou ro urubia ata sosoro to itamudiro, nimo urubia nou ro kakate moro to iwou. Nou ro urubia ibo imowautiti, modobo pua takesi mani kiaiwo auna ia eputa dubu Sisa nou aboto. Ina nu ia ibose nakara se ta-iarotiti ibo mo Godi ro kohodowa dubu eputa dubu nou se ie.'

³ Taie ina Paireti ro Iesu nato gemodowa, 'Oro Iu urubia eputa dubu nou se ra?'

Ina Iesu ro Paireti ibo gemowameai, 'Oro ro edi owerā to na-utura-die io mo nou se ie.'

⁴ Taie Paireti aise gerewesegerai Godi ra urubia ra turituri awawo urubia aboto ina urubia sirio aboto. Nou ro ibo, 'Nedi dubu ro Iesu mo ro ata ubauba ata emowea pua.'

⁵ Neio ro Paireti aboto owerā ina ina aise garowado-rimo ibo, 'Duriomoro nou ro owaudorowado. Nou ro edi bagea kitamudiro ro Gariri duriomoro rido gatamuai-ro, ina Iudia duriomoro to gou-die nimo isaubuti ri.'

Iesu Paireti ro gemeiriai Herodi aboito

⁶ Paireti ro na-girorowai iedi oweru ro neio iato gimodowa ibo, 'Iedi dubu ro Gariri dubu ra?'

⁷ Edi tau ro nato Gariri duriomoro Herodi ro giauri. Paireti ro Iesu nou ri gemeiriai Herodi aboto, Herodi edi tau ro nato Ierusarema sabowa to ta-gou-ro iato gomidiro.

⁸ Herodi ro na-gowea Iesu nou auna kamade ro gowati mabu nou ro Iesu sosoro iaurititi pua, oweru se irowidirotiti nou sapuwo to. Herodi auna ubi ro owamotiti Iesu sosoro kowea aboto ina nou ro ata pupuwo korosa tanaro ata osioidiro ri nou sosoro gabo ato.

⁹ Herodi ro Iesu omuomu se gemodoruti, kaupoti Iesu ro nu wisa oweru emowame pua.

¹⁰ Ina iato ta-gorowotoi Godi ra urubia ra turituri awawo urubia, ibose Mose sabi kitamudiro urubia neio ro Iesu binio to gowauti-rimo Herodi aboto.

¹¹ Ina saro to Herodi nou simara boso urubia mutu neio ro Iesu sete to goworohuti-rimo, taie nu neio ro bagea to eputa dubu obotama iato gowoiti-rimo. Taie nu ioudo Herodi ro aise gemeiriai Paireti aboto.

¹² Keba se Paireti ra Herodi ra neitiro serawo eremowomidirotiti-do. Kaupoti edi saiki ro nato neitiro iato aise garadabuai-rido.

Iesu opia ri Paireti ro gapoi

¹³ Paireti ro iato girumai Godi ra urubia ra turituri awawo urubia, duriomoro kiauri urubia, ina duriomoro ia urubia. Neio atu se iato garadabuti-rimo.

¹⁴ Paireti ro neio nato gimowapotai, 'Nedi dubu ro mo aboto na-owou-dioumo, nio ro

owauti-dumo ibo nimo urubia nou ro kakate moro to iwou. Kaupoti nio ro edi owera ro na-warō-diemo, nu mo ro nio sosoro gabo ato nemodoruti, ina nou abato mo ro ata ubauba ata owea pua.

¹⁵ Ina ibose nu Herodi ro na-emodoruti nou ro ata ubauba ata emowea pua. Ina nu nou mabu ato owameai-die mo aboto. Ma-diauri-mo nu morobise ie nou ro ata ubauba ata osioidiro pua, nu mo ro nou mabu ato kopia ie.

¹⁶⁻¹⁷ Ina noudo ie nu kebase mo owera to amadima-ado-ri taie sabowa to ido to nato anama-emeiriai-ri.'

¹⁸ Kaupoti urubia sirio ro na-girorowai-rimo nedi owera ro neio atu se nato giaiauti-rimo ibo, 'Nedi dubu ro dopia-mo! Barabasi ro ba-morowameai sabowa to!'

¹⁹ (Barabasi ro gidabuti urubia boso nato gosioidiro-rimo auna sabowa ato, urubia kiopiauti nou ro gatamuai. Ina nu dibura to nou mabu ato gedea-rimo.)

²⁰ Paireti ubi ie Iesu emeiriai ri sabowa to, ina urubia nou ro nato gimowapotai.

²¹ Kaupoti neio ro auna se nato giaiauti-rimo, 'Meremopoguti ota kemowotowa ato! Meremopoguti ota kemowotowa ato!'

²² Ina Paireti ro netewa teibo tau ta-giwai owera karo mutu, ina nou owera mutu aise gorowameai-ro, nou ro netewa didi tau giwai. Nou ro ibo, 'Mabu boira? Nou ro etou ubauba tanaro gosioidiro? Nu mo ro ata ubauba ata emowea pua nou mabu ato kopia ie, aise namadima-ado-ri taie sabowa to nato anama-otiodorai-ri.'

²³ Kaupoti urubia sirio inaina aise
giaiauti-rimo neio auna ubi ro giamo Iesu ota
kemowotowa ato kemopoguti aboto, ina auna ia
se nato giaiauti-rimo.

²⁴ Paireti ro Iesu neio ubi ato aise gaidodorai
ota kemowotowa ato emopoguti ri.

²⁵ Taie dibura to edi dubu ro gedea-rimo
Barabasi urubia ubi ato Paireti ro aise
gowosuruwo-ro. Keba se Barabasi ro gidabuti
urubia, boso nato gowou-rimo auna sabowa to
nou urubia kiopiauti dubu e. Wisana Iesu Paireti
ro aise gaidodorai nedi Iu urubia sirio ro neio
simara ubi tanaro nou aboto ororosioidiro ri.

Iesu ota kemowotowa ato gemopoguti-rimo

²⁶ Iesu neio ro ioudo na-gowosuruwo-rimo nu
simara ota kemowotowa se garatidiro-ro. Taie
ipi gabo ato neio ro Saimoni nato
gematimai-rimo nu Sairini sabowa dubu e
koroho moro rido gorowameai-ro. Nou boso
urubia ro nato gemutura-rimo ibo, 'Ei, oro ro ota
kemowotowa demaratai!' Saimoni ro Iesu aise
goduria ota kemowotowa se gemaratidiro-ro.

²⁷ Ibose Iesu imese sirio ia urubia ro
gobodoro-rimo saro rido. Ina iedi topira ro nou
maumo ato arua mamio ta-garadabuai-rimo
Iesu neio ro idobi mutu gowaboi-rimo.

²⁸ Kaupoti Iesu neio aboto na-gerewesegerai
nou ro ibo, 'Ierusarema mamio mo idobi
nemerete-mo! Nio merebusere mutu nakara se
idobi auna se deremerete-mo!

²⁹ Mabu ata tau tou-die urubia ro ibo
amadima-aro-ri, "Teri mamio nio garegare tato

ama-irowomidiro-ri, nio ro merebusere sapuwo to kimaragoidiro siriosirio iworohuti-ri pua."

³⁰ *Ibose urubia ro amadima-aro-ri ibo, Podo nio neito dosiomai-rimo nimo diahidimai-rimo! Damera nio ro ibose nimo diahidimai-rimo!*

³¹ Mo ro nedi owera ro nutura mabu mo mea ota sosoro ie, ina urubia ro mo ubauba mino to noworohuti-dumo. Kaupoti nio pamo ota ie, era sosoro ie nio ido ubauba ia ubauba ia mino to amadimi-iworohuti-ri.'

³² Ibose netewa teibo sabi kisebo dubu teibo Iesu mutu atu se giwaboi-birimo kimopoguti-bi moro to.

³³ Neibi edio moro to giwaboi-birimo masiro ararasoro ibo Eputa Soro podo. Taie boso urubia ro Iesu iato gemopoguti-rimo sabi kisebo dubu teibo mutu ata pere sapuwo ato ina ata tumodi sapuwo ato.

³⁴ Taie Iesu ro ibo, 'Abera neio ro nedi tanaro ro na-osioidiro-dumo ba-dimatopeamuti. Mabu neio umoro pua etou tanaro osioidiro-dumo.'

Ina Roma boso urubia ro durumai iato geremewehere-rimo, etio durumai ro giagobeidiro-rimo tuturu tau to, Iesu obotama neio ro gowamade-rimo.

³⁵ Urubia sirio ro Iesu aupise giauri-rimo ina Iu eputa urubia ro sete to ubauba ia mino to goworohuti-rimo. Neio ro idaibo owera nou garo-rimo, 'Nu arua urubia se iwarebidirotiti ina mabu boira nou nakara se orowarebai tato? Nu Godi ro kohodowa dubu ato modobo ie nu nakara se korowarebai.'

³⁶ Ina boso urubia ro nu iato gemasosowado-rimo, neio

³⁷ Iesu aboto na-goroho-rimo karakara obo omia ri. Neio ro ibo, 'Oro Iu urubia eputa dubu ato oro modobo ie nakara se korowarebai.'

³⁸ Neio ro eputa abato idaibo titi nou gematiti-rimo ibo, *Nou Iu urubia eputa dubu e.*

³⁹ Ata sabi kisebo dubu na-gororidiro nou ro Iesu iato gemasosowado, 'Oro Godi ro kohodowa dubu nou se ra, a? Dorowarebai nakara se, ibose mo dowarebai-ro!'

⁴⁰ Ina ata sabi kisebo dubu ro nu aise gemadohodai nou ro ibo, 'Idaibo garo, oro ro modobo ie Godi tere kemati. Nou ro beda wisa owea oro ro idaibo wisa nou owea.

⁴¹ Modobo ie neitiro ro kiwia nedi ubauba wisa ro, mabu neitiro simara ubauba tanaro sapuwo to niwia-do. Kaupoti nedi dubu ro nou ro ata ubauba ata osioidiro pua nu didi poro to iwia temeteme.'

⁴² Taie nou ro ibo, 'Iesu, oro eputa dubu to nama-omi-ri, mo ba-demaragoidiro-ro.'

⁴³ Ina nou ro ibo gemowameai, 'Oro morobise owera nemowapotai, abora nedio tau ro nato oro mo mutu ama-imidirotiti-ri kamade duriomoro ato.'

Iesu a-garaburai

⁴⁴⁻⁴⁵ Saiki turi ato gotoi edi tau ro nato, duriomoro gebari imese duwoduwo ro ta-gatimuti, mabu saiki mea se imewia pua womu tato adimo saiki ti-gorobai. Ina Tarena Moto goro ato auna obotama ta-wororidirotititi, nu turi ato aise garapepea. Ibi gugu imese tarena ia ie iedi obotama ro Godi sosoro nou ro ta-owaseidirotititi.

46 Taie Iesu ro Abera auna se nato garahuomai, 'Idau *mo urio oro aboto naiwai*.' Iedi owera ro nou ro karo na-goporeai iato nu aise garaburai.

47 Nu edi boso eputa dubu ro gemotoi edi tanaro ro na-gororosioiido-romo nou ro Godi iato gemowabu. Nou ro ibo, 'Morobise ie nou ata ubauba tato ie mea tuputupu dubu e.'

48 Iedi urubia sirio ro na-gou-romo kemopoguti tanaro iauri ri, neio eputa se giweisorawado-romo idobi mutu gorowame-romo, mabu neio ro mea tuputupu dubu dorogora se mabu ato gemopoguti-romo.

49 Kaupoti Iesu edi urubia mutu irohotiti, neio muso rido gorowotoi-ro ioudo girarowo-romo. Ibose Iesu edi mamio ro gobodoro-romo Gariri duriomoro rido neio ro ibose muso rido giauri-romo.

Iesu pamo durupi nadi goro to gibiria-romo

50-51 Ata dubu masiro Iosepa nou Aramatea sabowa dubu e. Nu mea tuputupu dubu e, nou ro a-masebidirotiti Godi edi kiwaboi tanaro ro neito orowateai ri. Nu ata lu kanisere dubu e, kaupoti eputa urubia edi tau ato na-geremowauti-romo Iesu kopia sapuwo to, nu ubi oi pua.

52 Taie Iosepa na-gou Paireti nou ro iato gemodowa Iesu pamo durupi ota kemowotowa rido owororuo ri. Paireti iato ubi aise goi.

53 Taie Iesu pamo durupi Iosepa ro na-gebedai-ro ota kemowotowa rido taie obotama to mea se iato gemokomuti. Taie nou ro aise gowou nadi goro to ito gibiria. Edi nadi

goro ro ata pamo durupi ata iato owotodai pua, momuo goro ie.

⁵⁴ Iu urubia komidiro saiki Paraide saiki koriodoi ato neido karatamuai ie. Nedi tau ro nato komidiro saiki aupise gowamo karatamuai. Ina noudo ie nedi durupi keremododiai woko ro nou ro koporeai modobo pua nedi tau ro nato.

⁵⁵ Ina Iesu mutu edi mamio ro gou-rimo Gariri duriomoro rido, neio ro Iosepa aise gobodoro-rimo Iesu pamo durupi nou ro beda bobo to gibiria neio ro aise giauri-rimo.

⁵⁶ Taie neio ioudo na-gorowameai-rimo, meamea nibonibo ota puara dehoru mutu iato gidabuti-birimo Iesu pamo durupi emadiriti na. Ata saiki Iu urubia komidiro saiki ro gowaroho, iedi mamio ro aise gorowomidiro mabu Mose sabi ro ibo aro komidiro saiki ato woko isioidiro mamu.

24

Iesu pamo rido Godi ro ta-gowameai-ro

¹ Sande saiki kowaroho duwoduwo ato saiki mea se eredumudiro pua. Taie mamio meamea ota puara na-gimade-rimo Iesu pamo durupi emadiriti na nadi goro to nou giwou-rimo.

² Neio neido na-girarowea-rimo nadi magere gigisi edi na to gemopai-rimo ta-gorodobura-ro.

³ Kaupoti neio neido na-gou-rimo bobo to aise gorowateai-rimo, Abera Naramu Iesu pamo durupi neio ro iato owea pua.

⁴ Neio a-giwaweauti-rimo pamo durupi sapuwo to beda sosoro tanaro ro gororosoidiro-rimo nou gemaragoidiro-rimo.

Ina iedi tau ro nato netewa teibo dubu teibo aise gorowapotai-rido neitiro keakea obotama rido benenio se gerememiouti-rimo imese gotoi-rido neio gomo ato.

⁵ Edi dubu teibo ro neio ro na-giwia-marimo neio auna tere ro girobai taie eputa sopu to aise giborea-rimo. Taie edi dubu teibo ro neitiro ro ibo, 'Keremiro dubu mabu boira nio ro pamo urubia bobo ato na-osora-dumo?

⁶ Nu nato pua ie, abora pamo rido ta-worowameai-ro, keremiro ie! Nio ro a-imaragoidiro-dumo ra Gariri duriomoro ato keba se nou ro beda owera to gimowauti? Nou ro nio ibo ta-gimowauti,

⁷ "Imese Urubia Kiauri Dubu ubauba urubia aboto amadima-apoi-ri ina neio ro ota kemowotowa ato amadime-emopoguti-ri. Kaupoti nu bobo ato tuturu tau to orobu-ri pua, netewa teibo saiki teibo namado-oroporeai-ri, ina ata kowaroho nou nato amadi-owameai-ri pamo rido."

⁸ Edio mamio ro nato gimaragoidiro-rimo ibo, 'Nimo Iesu ro keba se nedi owera ro neito ta-nimowautiti.'

⁹ Nedi mamio ro bobo rido neido na-gorowameai-rimo neio ro owera iato gorowauti-rimo 11 kowasoro urubia aboto ina arua kimibiria urubia aboto, bobo ato beda tanaro ro gororosioiido-rimo.

¹⁰⁻¹¹ Kaupoti edi owera ro neibi ro na-gorowauti-birimo, Iesu kitiodorai urubia ro imibiria pua. Neio ro bagea owera to gasoro-rimo bobo ato etou tanaro ro gororosioiido-rimo. Nu edi mamio ro neio ie

Maria Magadarena, Ioana, Iemisi edi mamu ro Maria, ina amia mamio ta-garadabuai-rimo neio ibo gedei-rimo. Neio ro gimowauti-rimo Iesu kitiodorai urubia bobo ato beda tanaro gowea-rimo.

¹² Iedi oweru ro Pita ro se girorowai nu imese girario bobo to. Nou ro bobo na-gemetai, Iesu pamo durupi iato owea pua, pamo durupi edi obotama to na-gemoupiriamuti-rimo nou ro nou se giwia. Taie iato nu aise gorowameai-ro moto to. Nu kimaragoidiro ro gopia edi tanaro ro gororosoidiro-rimo nou sapuwo to.

Abera Naramu netewa teibo kowasoro dubu teibo aboto gorowapotai

¹³ Iedi atu saiki ro nato, Iesu kowasoro dubu teibo neitiro Emausi sabowa to gou-rido. Ina Emausi sabowa musomuso mere ie Ierusarema sabowa rido.

¹⁴ Neitiro na-gou-rido dese to beda tanaro ro gororosoidiro-dumo Iesu sapuwo to edi oweru ro neito geremowauti-do.

¹⁵ Neitiro keremowauti keremowauti gou-rido, iato Iesu neitiro turituri to egena bo gorosuria. Taie neibi atu se imese gou-birimo.

¹⁶ Neitiro ro nu keibimai moro rido Godi ro ta-giwasiai-ma.

¹⁷ Taie nou ro neitiro nato gimodowa-ma, 'Nitiro na-wou-dioudo etou oweru to eremowagomea-do?'

Ina neitiro iato aise gotobowa-rido nitonito se girarowo-rido.

¹⁸ Ata kowasoro dubu masiro Keropasi nou ro ibo, 'Ierusarema sabowa ato edio tanaro ro

gororosioidiro-dumo oro kaupoti umoro oi pua ra?’

¹⁹ Iesu ro ina iato gutura ibo, ‘Nitiro etou owerā to eremowauti-do?’

Neitiro ro ibo, ‘Neitiro Iesu sapuwo to neremowauti-do nu Nasareta sabowa dubu e. Nu Godi ipusu owerā dubu e, urubia nou ro pupuwo to imowautiti ibose pupuwo korosa tanaro ta-isioidirotiti Godi ubi ato ina urubia ro ta-iaurititi-mo.

²⁰ Ina Godi ra urubia ra turituri awawo urubia, nimo eputa urubia mutu, nu neio ro aise gapoi-dumo opia ri ina ota kemowotowa ato iato gemopoguti-dumo.

²¹ Nedi dubu ro nimo ro ta-nimaragoidirotiti-mo Godi ro nou gohodowa nimo Iu urubia ubauba aboudo iapopo ri, nedi dubu ro Iesu nouse ie. Nedi tanaro ro na-gororosioidiro-dumo abora netewa didi saiki nou to orobai.

²² Ina nimo mamio kowaroho duwoduwo ato na-wou-dumo neio ro nedi owerā ro na-orowauti-dumo nimo a-niwagogorai-dumo.

²³ Mabū nu pamo durupi neio ro iato owea pua. Neio bobo aboudo na-orowameai-dioumo, nimo neio ro nimowapotai-dumo ibo Godi sowake urio teibo hiwo sosoro to kiauri-ma sosoro otoi-do. Neitiro ro ibo, “Iesu pamo pua nu keremiro ie.”

²⁴ Ina nimo arua dubu nato ou-dumo bobo owea ri, neio ito na-orowateai-dumo Iesu iato owea pua, mamio ro beda sosoro to orowauti-dumo ibose to ororosioidiro-dumo.’

²⁵ Taie Iesu ro ibo neitiro aboto, ‘Nitiro imese daradara ia ie! Nitiro umodi ia ie Godi ipusu

owera urubia ro beda owera imowautiti-mo nou kimibiria.

²⁶ Neio ro paease irowautiti-mo ibo Godi ro kohodowa dubu nu temeteme ama-iwia-ri ina nu ido to auna ia masiro Godi aboudo ama-omidai-ri.'

²⁷ Taie Iesu ro mea se nato gemabuti nou ia simara sapuwo to Tarena Buka ato beda owera gisioidiro-rimo. Nedi owera ro Mose buka rido garatamuai-rimo ibose Godi ipusu owera urubia ro ta-gisioidiro-rimo.

²⁸ Neibi Emausi sabowa aupiaupi na-gemowaititi-birimo, nedi dubu teibo ro iato aise gorodiobo-rido kaupoti Iesu aise gouwado.

²⁹ Kaupoti nu neitiro ro aise gemediai-rido neitiro abato omidiro ri. Neitiro ro ibo, 'Dou-ro saiki iopu ta-weretei duwo ro oi-die.'

Taie nu imese gou neitiro mutu,

³⁰ neibi iato aise gomi-birimo, Iesu ro beredi na-gomidai-ro eso owera iato garo. Nou ro na-gesebuti neitiro iato gimio-ma

³¹ edi tau ro nato neitiro idomari Godi ro aise gimodobura-ma, Iesu neitiro ro aise geibimai-rido. Taie edi tau ato gowea-rido, nu ioudo aise gararaseperai-ro, egena bo gururiai-ro.

³² Taie neitiro nakara se iato geremowauti-rido ibo, 'Neibi na-nou-diebimo gabo ato edi owera to na-nimowauti-madie, Tarena Buka owera maumo mea se nimabuti-madie, neitiro abato kamade era sosoro irarebai.'

³³ Taie neitiro ioudo aise gorowameai-rido Ierusarema sabowa to, ina iato 11 kowasoro

urubia, amia urubia mutu neitiro ro iato giwia-rido neio atu moro to ta-garadabuti-rimo.

³⁴ Neio ro owera iato gorowauti-rimo ibo, 'Morobise ie Abera Naramu ta-woubua. Nou nakara se Saimoni Pita aboto ta-orowapotai.'

³⁵ Ina ibose Keropasi tiro ro gabo ipi ato beda tanaro ro gororosioidiro-rimo neitiro ro na-giauri-rido borubi kimibiria urubia iato gimowauti-rido, ibose Abera Naramu ro beredi na-ekekeouti neitiro umoro beda sosoro goi-rido ibo Abera Naramu nouse ie.

Iesu simara kowasoro urubia aboto gorowapotai

³⁶ Iedi tau ro nato netewa teibo kowasoro dubu teibo ro iedi owera ro na-gimowauti-rido kimibiria urubia, taie Iesu neio turituri ato egenabo gorowapotai-ro. Nou ro ibo, 'Miro nio abato ba-mowamotiti.'

³⁷ Kowasoro urubia ro na-gowea-rimo Iesu, neio a-giwagogorai-rimo neio tere ro giwati, neio ro Iesu bamo to gasoro-rimo.

³⁸ Kaupoti Iesu ro ibo, 'Mabu boira nio tere ro na-iwati? Mabu boira mo nio ro eibimai tato? Etou mabu ato ra kimaragoidiro teibo na-iamo nio abato?

³⁹ Tauo mo tu ra sairo ra ma-demeauri-rimo. Nu mo ia ie! Mo durupi nio ro ma-demowaseidiro-rimo. Bamo neio urio ie soro durupi nou tato ie. Mo nio ro ti-niauri-dumo simara durupi to noroho.'

⁴⁰ Iesu owera na-goporeai nu tu ra sairo ra neio aboto aise giwawuti.

⁴¹ Neio abato kamade ibose to giamo, ina kimaragoidiro ro giopia, ina noudo ie neio samo

to imibiria tato. Ina Iesu ro neio iato gimodowa, 'Nio abato kouho nakomu ata pоторо ra?'

⁴²⁻⁴³ Taie nu neio ro nakere koura se gomia-rimo neio sosoro gabo ato nou ro komidai iato aise gouho.

⁴⁴ Taie nou ro ibo, 'Nio ro a-imaragoidiro-dumo ra keba se mo nio mutu na-nirohotiti, nedi tanaro ro nou sapuwo to nio mo ro ta-nimowautiti ibo, "Mo sapuwo to sirio ower a ta-gisioidiro-rimo Tarena Buka ato. Arua ower a mo sapuwo to tiamo Mose sabi sirio ato, ina arua ower a mo sapuwo to Godi ipusu ower a urubia ro ta-gisioidiro-rimo, ibose arua ower a mo sapuwo to Tarena Ohare Buka ato tiamo." '

⁴⁵ Ina Tarena Buka ower a Iesu ro na-giwasoro neio imese kimaragoidiro patu nato gimodobura.

⁴⁶ Taie Iesu ro ibo, 'Morobise ie Tarena Buka ato ower a tiamo ibo, Godi ro Kohodowa Dubu temeteme ama-iwia-ri ina netewa didi saiki ato nu pamo rido Godi ro amadi-oweameai-ri.

⁴⁷ Ina nedi ower a ro nio ro nou korosa to urubia amadimi-imowauti-ri ibo, "Ba-derewesegerai-mo ubauba aboudo ina nio edi ubauba ro Godi ro nato ama-imatopeamuti-ri." Nedi ower a ro amadimo-obodorouti-ri Ierusarema sabowa rido imese nato ama-orobodorouti-ri duriomoro gabo gabo to. Io Tarena Buka ower a ibo tiamo idaibo tanaro nou sapuwo to.

⁴⁸ Ina nedi tanaro sirio ro neio beda sosoro gororosoidiro-dumo, nio ro simara idomari to noti iauri-dumo urubia neito ba-dimowauti-mo.

⁴⁹ Nio sapuwo to mo ro anamadi-emeiriai-ri Tarena Urío. Keba ia se nou urubia aboudo Abera ro hodo ta-gasaubiai-ro nou ro emeiriai ri. Kaupoti Ierusarema sabowa nio ro emeseraí ate iato aise ba-dorowomidiro womu tato Tarena Urío neito namadi-ou-ri nio nou ro ama-iatimai-ri, pupuwo nou ro ama-imio-ri.'

Iesu Godi ro gowioro Adiri sabowa to

⁵⁰ Iesu simara kowasoro urubia Ierusarema sabowa rido na-giwosuruwo-ro Betani sabowa to aise giwou. Nu tu teibo ohu to aise giwotobowa-ma nou ro neio meana iato gimia.

⁵¹ Nou ro meana edi kimia ro na-gimia nu iato neio aboudo egenabo goruriai, taie nu Godi ro goto rido aise gaubudiro imese gowioro neio sosoro gabo ato.

⁵² Nu neio ro na-gemawotidiro-rimo kowioro moro ato, Iesu iato gemowabu-rimo. Taie neio ioudo auna kamade mutu aise gorowameai-rimo Ierusarema sabowa to.

⁵³ Neio iato sirio tau Tarena Moto ato aise iradabutititi-mo Godi neio ro iato emowabutiti-mo.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4